

# OLE LIAHONA



**Faaipoipoga i le  
Fuafuaga a le Tama  
Faalelagi, i. 16–33**

**Konafesi Aoao—  
E mo Oe, i. 4, 14**

**Faamanuiaina e ala i le  
Polokalama o le Alualu  
i Luma o le Tagata Lava  
la ma le Tiute i le Atua,  
i. 46–57**

**O Se Taumafataga  
Faaleagaga i le  
Aiga o le Afiafi  
o le Aso Sa, i. 66**



O Iesu e Sefululua-Tausaga-le-Matua  
i le Malumalu, na saunia e  
Carl Heinrich Bloch

“Na maua e [Iosefa ma Maria] ia [Iesu] i  
le malumalu, o nofo i totonus o le au aoao  
o loo faalogologo ia te i latou, ma taufesili  
ia te i latou.

“Ua matua ofo uma lava e na faalogo  
ia te Ia i Lona poto ma Ana upu e tali.

“Ua la ofo ina ua iloa atu o ia e i laua:  
ona fai ane lea o lona tina ia te ia, . . .  
faauta, sa [ma] saili lava ia te oe ma le  
tiga.

“Ona fai atu lea o ia ia te i laua, Se  
a ea le mea na oulua saili mai ai ia te  
au? lua te le iloa ea e tatau ona ou i le  
fale o lo'u Tama?” (Luka 2:46–49; tagai  
i le Luka 2:46, vaefaaamatalaga c; mai le  
Faaliliuga a Iosefa Samita).

## SAVALI

- 4** Savali a le Au Peresitene Sili: Konafesi Aoao—E Le o se Faamanuiaga e Faatauvaa  
Saunia e Peresitene Dieter F. Uchtdorf
- 7** Savali a Faiaoga Asiasi: Faamalolosia o Aiga e ala i le Faateleina o le Tulaga Faaleagaga

## TALA FAAALIA

- 14** O Se Konafesi Aoao mo Na o A'u Lava  
Saunia e Ann Singleton  
*Mai lava i le amataga sei oo i le faaiuga, sa faamafanafanaina a'u ma ou lagonaina pei lava sa na o a'u le tagata maimoa.*
- 22** O Se Vaega Itiiti o le Lagi i le Lalolagi  
Saunia e Elder Robert D. Hales  
O le faaipoipoga o le malumalu e faataunu i se nofoaga.  
O le faaipoipoga faaselesitila e foafoaina i le olaga atoa.

- 28** Tuuina atu i le Atua se Avanoa e Faamanua ai i Tatou  
Saunia e Michael R. Morris  
*O aafiaga o talavou matutua i Atenitina o loo faailoa mai ai o lo tatou usiusitai e tuuina atu ai i le Tama Faalelagi ni avanoa e sasaa mai ai ni faamanuiaga —ma e Na te faia lava.*

- 34** Talafaasolopito o le Aualofa: O Se Vaaiga i le Faaaliga a le Alii mo Ona Afafine  
Saunia e Julie B. Beck  
*E ala i le suesueina o le talafaasolopito o le Aualofa, ua aoaoina ai e le usoga a latou matafaioi taua i le fuafuaga a lo tatou Tama Faalelagi.*

## I LE FAAVAA

Ata na tusia e Robert Casey.

## MATAGALUEGA

- 8** O Mea Faatauvaa ma Faavalea
- 10** Auaunaga i le Ekalesia: Agavaa e ala i Auaunaga i le Ekalesia  
Saunia e Alice A. Lewis
- 12** Tatou te Talanoa ia Keriso: Mauaina o le Filemu i Taimi Faigata  
Saunia e Elder Per G. Malm
- 16** O Le Mea Tatou Te Talitonu I Ai: O Le Sauniga o le Faamauga e Fesootai Faatasai ai ia Aiga e Faavavau
- 18** Tala Faamamai o le Talalelei: O Le Natura e Faavavau o le Faaipoipoga  
Saunia e Peresitene N. Eldon Tanner

- 20** O Tatou Aiga, O Tatou Auaiga: Fausiaina o La'u Faaipoipoga Faavavau

Saunia e Rosana Pontes  
Barbosa Neves

- 38** O Leo o le Au Paia o Aso e Gata Ai


- 74** Tala Fou o le Ekalesia

- 79** Manatu mo Afiafi Faaleaiga

- 80** Seia Tatou Toe Feiloai: O Faamanuiaga o le Malumalu i le Taimi Nei ma le Faavavau  
Saunia e Stacy Vickery



## AUTALAVOU MATUTUA




42

### 42 Lototoa e Auauna Atu

Sauniuni e auauna atu i se misiona? Saili pe na faapeflea ona foia e isi talavou matutua le faaletonu lea e masani lava ona o faatasi ma se filifiliga lelei.

Vaai pe mafai ona e mauaina le Liahona o loo natia i le lomiga lenei. Faaitete: Asiasi i Peru.



## AUTALAVOU

**46 O Le Alualu i Luma o Tatou Aiga Patino**  
Saunia e Hillary Slaughter ma Elyssa J. Kirkham  
*O le Polokalama o le Alualu i Luma o le Tagata Lava Ia e masani lava e patino i le tagata. Ae mo tamaitai talavou e toalua i Iukureini, o le Polokalama o le Alualu i Luma o le Tagata Lava Ia e aofia ai ma aiga.*

**49 Tasi le Upu ma o se Lesona o le Olaga Atoa**

Saunia e Heather Wrigley  
*Aisea na lelei ai o'u faalogoga i le lē ta'uina o le upu? O la'u tali o le taua o le amiosao.*

**50 O A'u ea o se Afafine o le Atua?**

Saunia e Valarie Schenk  
*O le mauaina o se molimau o lona uiga foi o le iloaina lea o lo'u natura paia.*

**52 Aoao, Galue, Faasoa Atu**

Saunia e Adam C. Olson  
*O le a se mea e tutusa ai le Tiute i le Atua ma le tomai faa-Japani e fusu ai? E tolu upu faigofie.*

**54 Tiute i le Atua faatasi ma Tamā**

Saunia e Paul VanDenBerghe  
*Atonu na latalata atili lou fesoasoani nai lo o le mea sa e mafaufauna.*

**55 Valaauina o La'u Korama**

Saunia e Mark Tensmeyer  
*Sa ou le latalata i ositaulaga o la'u korama, ae ina ua ou manaomia le fesoasoani, sa ou faaaogaina se avanoa.*

**56 O Se Sini e Sili Atu**

Saunia e Nereida Santafe de Salinas  
*O le lotogatasi, faatoagaina mai, ma le faauoga o a matou sini sili atu ia. O le fiafia i taaloga ua na o se 'ai faaopoopo.*

## TAMAITI



68

**58 Ia Avea ma se Tagata e Fausia le Aiga**

*O tagata uma e sili atu ma le tasi le aiga. E mafai ona faaaoga e aiga taitasi lau fesoasoani.*

**60 Sauniuni e Faia Papatisoga mo e ua Maliliu**

Saunia e Elyssa J. Kirkham  
*O mea e mafai ona e faia ao le'i oo i le aso o le malumalu, le aso o le malumalu, ma a'o e i ai i totonu.*

**61 Fiafia i le Talalelei**

Saunia e Elder Carlos A. Godoy  
*Ina ua avea au ma se tasi o i latou, sa ou iloa ai le mafuaaga e matuai fiafia ai le Au Paia o Aso e Gata Ai.*

**62 O La Tatou Itulau**

**63 Manatu Lelei**

**64 Aumaia o le Peraimeri i le Fale: O Le a Talai Atu Le Talalelei i le Lalolagi Uma**

Saunia e Ana Maria Coburn ma Cristina Franco

**66 O Le Taaloga i le Aiga o le Afiafi**

Saunia e Rene Riding

**68 Tala ia Iesu: Na Aoao Mai Iesu i le Ala e Taulimaina ai Isi**

Saunia e Diane L. Mangum

**70 Mo Tamaiti Laiti**

O Le Lomiga Faamaonia Faa-Samoa a le Ekalesia a lesu Keriso o le Au Paia o Aso e Gata Ai

**Susuga a le Au Peresitene Sili:** Thomas S. Monson,  
Henry B. Eyring, Dieter F. Uchtdorf

**O Le Korama a Apostolo e Toasefululu:**

Boyd K. Packer, L. Tom Perry, Russell M. Nelson,  
Dallin H. Oaks, M. Russell Ballard, Richard G. Scott,  
Robert D. Hales, Jeffrey R. Holland, David A. Bednar,  
Quentin L. Cook, D. Todd Christofferson, Neil L. Andersen

**Faatonu:** Paul B. Pieper

**Fautua:** Keith R. Edwards, Christoffel Golden Jr.,  
Per G. Malm

**Pule Faatonusili:** David L. Frischknecht

**Faatonu e Fuafuaina ma Faatonutonu:**

Vincent A. Vaughn

**Faatonu o Karafi:** Allan R. Loyborg

**Pule Faatonutonu:** R. Val Johnson

**Pule Faatonutonu Lagolago:** Jenifer L. Greenwood,  
Adam C. Olson

**Au Faatonu Fesoasoani:** Ryan Carr, Susan Barrett

**Aufaigaluega Faatonutonu:** Brittany Beattie, David A.  
Edwards, Matthew D. Flitton, LaRene Porter Gaunt, Carrie  
Kasten, Larry Hiller, Jennifer Maddy, Lia McClanahan,  
Melissa Merrill, Michael R. Morris, Sally J. Odekirk, Joshua J.  
Perkey, Chad E. Phares, Jan Pinborough, Janet Thomas, Paul  
VanDenBerghe, Melissa Zenteno, Manssa A. Widdison

**Pule Faatonusili o Faatufugaga:** J. Scott Knudsen

**Faatonusili Tusiati:** Scott Van Kampen

**Pule i le Gaosiga:** Jane Ann Peters

**Au Mamanu Sinia:** C. Kimball Bott, Thomas S. Child,  
Colleen Hinckley, Eric P. Johnsen, Scott M. Mooy

**Aufaigaluega e Mamanuina ma Gaosia:** Collette  
Nebeker Aune, Howard G. Brown, Julie Burdett, Reginald J.  
Christensen, Kim Fenstermaker, Kathleen Howard, Denise  
Kirby, Ginny J. Nilson, Ty Pilcher

**Tailolomi:** Jeff L. Martin

**Faatonusili Lolomiga:** Craig K. Sedgwick

**Faatonusili o le Tufatufaga:** Evan Larsen

Mo O le okaina o mekasini, ia faafesootai le Faletusi  
Tutotunu i Pesega. Telefoni 64127. Totogi o le Mekasini:  
\$0.55 (Samoa) ī i le kopī. Totogi mo le Tausaga Atoa \$6.60  
(Samoa).

**Auina atu tusitusiga ma faafesili i le Liahona,**  
**Rm. 2420, 50 E. North Temple, Salt Lake City, UT**  
**84150-0024, USA; po o le i-meli:** [liahona@ldschurch.org](mailto:liahona@ldschurch.org)

O Le Liahona (o lona uiga i le Tusi a Mamona o le "tapasa"  
po o se "faatonuala") e lomia i le faa-Alepania, Aminia  
(Sasae), Pisilama, Palekeria, Kemputopia, Sepuanu, Saina,  
Kalaotia, Siekiisolovakia, Tenimaka, Take, Igilisi, Esitonu,  
Fiti, Finelani, Farani, Sihamani, Eleni, Hanikeri, Initu, Iselani,  
Initonisia, Italia, Iapani, Kiripati, Korea, Latvia, Litunia,  
Malakasa, Maselua, Monokolia, Nouei, Polani, Potukale,  
Romania, Rusia, Samoa, Silovenia, Sipaniolo, Suetena,  
Tagaloka, Tahiti, Tai, Toga, Iukureini, ma Urutu, ma  
Viatename. (E eseese lava gagana.)

© 2011 Puletaofia e le Intellectual Reserve, Inc. Ua taofia  
aia tatau uma. Lomia i le lunate Setete o Amerika.

E mafai ona kopī tala ma ata o le Liahona mo le toe  
faaoagaina i lotu po o le aiga ae ia le faiā ai ni pisinisi. E le  
tatau ona kopī ni tala po o ni ata pe afai o faasa mai i le  
laiana o loo tā'ua ai le e ona lea faatufugaga. Auina atu fesili  
e uiga i le puletaofia i le Intellectual Property Office, 50 East  
North Temple Street, Salt Lake City, UT 84150, USA; i-meli:  
[cor-intellectualproperty@ldschurch.org](mailto:cor-intellectualproperty@ldschurch.org).


**For Readers in the United States and Canada:**

September 2011 Vol. 35 No. 9. O LE LIAHONA (USPS 311)  
Samoa (ISSN 1045-0947) is published monthly by The  
Church of Jesus Christ of Latter-day Saints, 50 East North  
Temple, Salt Lake City, UT 84150. USA subscription price  
is \$10.00 per year; Canada, \$12.00 plus applicable taxes.  
Periodicals Postage Paid at Salt Lake City, Utah. Sixty days'  
notice required for change of address. Include address label  
from a recent issue; old and new address *must* be included.  
Send USA and Canadian subscriptions to Salt Lake  
Distribution Center at address below. Subscription help  
line: 1-800-537-5971. Credit card orders (Visa, MasterCard,  
American Express) may be taken by phone. (Canada Post  
Information: Publication Agreement #40017431)

POSTMASTER: Send address changes to Salt Lake  
Distribution Center, Church Magazines, PO Box 26368,  
Salt Lake City, UT 84126-0368.

# Faaopoopoga o loo maua i le Initonet Liahona.lds.org

## MO LE AUTALAVOU



The image displays two side-by-side screenshots of the Young Women website. The left screenshot shows the 'Personal Progress' section, featuring a portrait of a young woman in a white dress, a progress bar, and a sidebar with links like 'Young Women Home' and 'Young Women Mission & Logo'. The right screenshot shows the 'Duty to God' section, featuring a portrait of a young man, a progress bar, and a sidebar with links like 'Duty to God Home' and 'How This Book Is Organized'.

O tusiga a le autalavou i lenei lomiga e mafai ona fesoasoani i le autalavou i  
polokalama o le Alualu i Luma o le Tagata Lava la po o le Tiute i le Atua. Mo  
lomiga fesootai ma le fesoasoani i luga o le initonet i polokalama o le Alualu i  
Luma o le Tagata Lava la po o le Tiute i le Atua, asiasi i le PersonalProgress.lds  
.org po o le DutyToGod.lds.org.

## I LAU GAGANA

O loo maua le Liahona ma isi tusi a le Ekalesia i le tele  
o gagana i le [www.languages.lds.org](http://www.languages.lds.org).

## Autu i lenei Lomiga

*E ta'u mai e numera le itulau muamua o le tusiga.*

**Aiga**, 7, 8, 16, 46, 54, 58, 80

**Alualu i Luma o le Tagata**

**Lava la**, 46

**Amio Sa'o**, 49

**Aualofa**, 7, 34

**Auauna atu**, 10, 34, 55, 68

**Faaaliga**, 4, 7

**Faaiopoipoga**, 18, 20, 22, 28, 40

**Faamoemoe**, 12

**Faatoaagaina**, 56

**Filemu**, 12

**Gagana**, 49

**Galuega faafaifeatalai**, 39, 42,  
64, 70

**Iesu Keriso**, 12, 68

**Konafesi aoao**, 4, 14

**Liua**, 61

**Malumalu**, 9, 16, 28, 40, 46, 60,  
69, 80

**Natura paia**, 50

**Papatisoga mo e ua maliliu**, 60

**Perisitua**, 16, 54, 55, 56

**Perofeta**, 4

**Sauniga**, 16

**Sefuluai**, 41

**Talafaasolopito o Aiga**, 38

**Tiute i le Atua**, 52, 54

**Togiola**, 12

**Tusitusiga Paia**, 50, 66

**Valaauga o le ekalesia**, 10

**Saunia e Peresitene  
Dieter F. Uchtdorf**

Fesoasoani Lua i le Au  
Peresitene Sili



# KONAFESI AOAO— E Le o se Faamanuiaga Faatauvaa

**N**a talanoa se tagata e malosi i le Ekalesia ma se tuaoi e le auai i la tatou eklesia. Ina ua liliu atu le autu o le talanoaga i le konafesi aoao, na fesili mai le tuaoi, "Na e fai mai e i ai a outou perofeta ma apostolo? Ma e faalua i le tausaga i se konafesi a le lalolagi atoa ona latou faaalua mai le upu a le Atua?"

"E moni lava," na tali atu ai ma le lototele le tagata o le eklesia.

Na mafaufau le tuaoi i lena mea mo sina taimi. Na foliga mai e faamaoni lava lona fia iloa ma na ia fesili mai, "O le a se mea na latou ta'u mai i le konafesi aoao lea ua te'a?"

O le taimi la lea na oo ai le tagata malosi o le Eklesia mai le lagona fiafia e faasoa atu le talalelei i le lagona matamuli. Na ia taumafai malosi, ae na le mafai ona ia mafaufau i ni faamatalaga o se lauga se tasi.

Na fai sina faaletonu o lana uo i lenei mea ma faapea mai, "O lona uiga o lau tala ia te au e talanoa mai le Atua i le tagata i o tatou aso ae ua le mafai ona e manatuaina mea Na ia fetalai mai ai?"

Na lagona e le uso lea le lotomaualalo i lenei talanoaga. Ma na ia tauto ai o le a ia faia le mea sili e manatua ai upu na saunoa ai auauna a le Alii i le konafesi aoao.

Tatou te iloa uma lava le faigata o le manatuaina o savali uma o le konafesi aoao, ma e ou te mautinoa e le tatau ona tatou matamumuli ai pe afai tatou te le manatuaina mea uma. Ae ui i lea, e i ai savali i konafesi aoao tatasi o loo tuuina mai o se meaalofa ma se faamanuiaga mai le

lagi e patino lava mo o tatou olaga faaletagata lava ia.

I le sauniuniga mo le konafesi aoao, sei ou fautuaina atu ni matapu faavae autu se tolu e ono fesoasoani ia tatou e maua lelei ai, manatua, ma faaaoga afioga tulei mai auauna a le Alii.

## **1. E i ai i tagata o le Eklesia le aia tatau mo faaaliga patino ao latou faalogo atu ma suesue i saunoaga musuia na fofogaina mai i le konafesi aoao.**

Ao e sauni mo le konafesi aoao, ou te valaaulia oe e mafaufau i fesili sa e manaomia e taliina. Mo se faataitaiga, atonu e te manao i se taiala ma se taitaiga mai le Alii e faatatau i ni luitau o loo feagai ma oe.

O tali i ni au tatalo patino e ono sau sa'o lava mai se lauga faapitoa pe mai se fasi fuaitau patino. O nisi taimi e ono oo mai ai ni tali i ni upu e foliga e le fesootai, se fasi fuaitau, po o se pese. O se loto ua faatumulia i le agaga faafetai mo faamanuiaga o le olaga ma se naunautaiga faamaoni e faalogo ma mulimuli i upu o le fautuaga o le a saunia ai le ala mo faaaliga patino.

## **2. Aua le faalēano i se savali ona e masani ona e faalogo i ai.**

E masani lava ona aoao mai Perofeta e ala i le faisoo mai; o se tulafono o le aoaoga. O le a e faalogo o faisoo mai ia autu ma aoaoga faavae i konafesi aoao. Sei ou faamautinoa atu ia te oe: e le faapea ona o le le lava o le

sogasoga o le mafaufau. E faaaauau pea ona tatou faalogo i savali e uiga i mataupu talitutusa aua o loo aoao mai e le Alii ma faamamafaina i o tatou mafaufau ma loto ni mataupu faavae autu faapitoa e maoae le ttau faavavau lea e ttau ona malamalama ma faatinoina ae tatou te lei oo atu i isi mea. O se tagata faufale atamai e muamua lava ona faataatia le faavae ao le'i faatuina ia puipui ma le taualuga.

**3. O upu o loo laugaina i le konafesi aoao e ttau ona avea ma se faasinoala e faasinoina le ala mo i tatou i masina a sau.**

Afai tatou te faalogo ma mulimuli i musumusuga a le Agaga, o le a avea lea ma se Liahona, e taialaina i tatou i mea tatou te le iloa, o vanu ma mauga faigata o loo i luma atu (tagai i le 1 Nifae 16).

Talu ona amata mai le lalolagi, ua faatuina e le Atua ia perofeta o e talanoa mai e uiga i le finagalo o le lag i tagata o o latou lava taimi. O lo tatou tiutetauave la o le faalogo ma faaaoga ia savali ia na tuuina mai e le Alii mo i tatou.

E le'i tuulafoaiina ma o le a le tuulafaoaia lava e lo tatou Tama Faalelagi alofa muti-mutivale ma agaalofa Lana fanau. Ua ia tofia aposepolo ma perofeta i aso nei, faapei o aso ua mavae. E faaaauau pea ona Ia faaalia Lona finagalo ia i latou.

O se avanoa ofoo fogia le faalogo atu i savali a le Atua mo i tatou taitoatasi i le taimi o le konafesi aoao! Sei o tatou tapena lelei mo lenei faamanuiaga maoae o le taitaiga paia ua tuuina mai e Ana auauna filifilia.

Aua e le o se faamanuiaga faatauvaa. ■



#### **AOAO ATU MAI LENEI SAVALI**

- Faitau faatasi le tusiga. Uunaia le aiga e faailoa mai mea e faalogo i ai i le taimi o le konafesi aoao.
- Ina ia fesoasoani i tamaiti laiti e faaaoga ia fautuaga na tuuina mai e Peresitene Uchtdorf, faaali atu ia i latou se siata o le Au Pulega Aoao (o loo maua i le lomiga o le konafesi i le Liahona). Tau atu ia i latou o le a lauga mai le Au Peresitene Sili ma le Korama o Aposetolo e Toasefululua i le konafesi aoao. Uunaia ia tamaiti e faalogo i le konafesi ma tusi se ata e fesoasoani ia i latou e manatua ai mea sa latou aoaoina. E mafai e matua ona asiasi i le conferencegames.lds.org mo nisi gaoioiga o le konafesi mo tamaiti.



ATA NATUSIA E PAUL MANINI

## Lelei, Lelei Tele, Lelei Silisili

Saunia e Mary-Celeste Lewis

Ina saunoaga i le konafesi aoao ia Oketopa 2007, na saunoa ai Elder Dallin H. Oaks o le Korama a Aposetolo e Toasifulua e uiga i gaoioiga ia e “lelei, lelei tele, lelei silisili.” Ina ua ia oo i le vaega e uiga i le “soona fuafuaina o taimi o fanau mo gaoioiga” sa ou

minoinoi ma le lagona ta’usalaina i lo’u nofoa.

Sa ou iloa ua tele naua mea o loo ou faia. Sa ou i ai i tala faatino a le aoga, aveina ni vasega faigata i le aoga, ma sa ou auai i le tele o isi gaoioiga. Ou te le’i toe auai ma le faamaoni i gaoioiga a Tamaitai Talavou, ma o ou Aso Sa ua faatumulia i le vevesi i le taumafaiga e faamaea meaaoga i le taimi mulimuli. O le faataitaiga o musika ma le toe faafouina o le niusipepa a le aoga ua le toe i ai se lagona malie e faatino ai ae ua avea ma galuega.

Na toe faapupula lelei lava au e le lauga a Elder Oaks i le faatulagaga o ou taimi. Na lelei a’u gaoioiga, ae ua matua tele lava. Sa manaomia ou te filifilia ni [gaoioiga] sili atu ona lelei. Ao ou taumafai e filifili po o fea o gaoioiga e lafai, sa ou iloaina ai o le talalelei a lesu Keriso o le mea sili lea e tatau ona faamuamua e soo se tagata. Sa ou tuuina i le pito i luga o la’u lisi le tatalo ma le suesueina o tusitusiga paia, ma e talu mai lena taimi, ua sologa lelei lo’u olaga.

Na aoao a’u e Elder Oaks afai tatou te faia mea e finagalo le Alii tatou te faia *muamua* o le a sologa lelei isi mea uma. Afai ou te suesueina a’u tusitusiga paia ae ou te le’i taalo i ni taaloga pe tusa foi o le faia o ni a’u meaaoga, o le a maea uma mea taua. Pe a faavae lo’u olaga i le Alii, nai lo le faaopoopo i ai o la pe a uma mea uma, ua i ai i lo’u olaga se fua faatatau faaopoopo o le filemu ma le faamanuaina.

O le taimi nei ua ou matuai faaeteete lava e faalogo i fautuaga o loo tuuina mai i le konafesi aoao!

## TAMAITI

### E Mafai ona Ou Mauaina Tali e ala i le Konafesi Aoao

**N**a aoao mai e Peresitene Uchtdorf faapea afai e te mafaufau i ni fesili ao le’i faia le konafesi aoao, o le a mafai ona fetalai mai le Alii ia te oe e ala mai i Ana perofeta ma apostolo i le taimi o le konafesi.

1. Talanoa faatasi o se aiga po o se vasega, mea e manaomia ona e aoaoina, a le taitoatas i pe tuufatasi. (Mo se faataitaiga: E faapefea ona ou faamlosia la’u molimau? E faapefea ona ou taulimaina se faafitauli i le aoga?) Tusi i lalo au tali, i se fasi

pepa po o i totonu o lau api talaaga.

2. I vайaso e tau atu i le konafesi, e mafai ona e mafaufau ma tatalo e uiga i nei fesili.
3. Faalogo ma le toto’i le taimi o le konafesi (atonu o le a fesoasoani le tusia o ni faamatatalaga). Ona tusi lea o le auala na tali ai e le Alii—e ala atu i taitai o le Eklesia—au fesili.
4. I se isi fasi pepa, e mafai ona e tusiina ai sou lava ata o loo e faia le mea na e aoaoina.



# Faamalolosia o Aiga e ala i le Faateleina o le Tulaga Faaleagaga

**N**a saunoa mai Julie B. Beck, peresitene aoao no le Aualofa: “Ua tupu a'e i totonus ia te au se molimau lofutuina o le taua o afafine o le Atua. . . . e lei i ai lava muamua se tulaga manaomia tele atu o le faateleina o le faatuatua ma le amiontonu faaletagata lava ia. E lei i ai muamua se manaomia tele atu mo ni aiga ma auaiga malolosi.”

E mafai ona fesoasoani tamaitai e fausia ni aiga ma ni auaiga malolosi pe a latou faatinoina se faaaliga faaletagata lava ia. “O le tomai e agavaa ai mo le, mauaina, ma le faatinoina e ala i faaaliga faaletagata lava ia o le tomai aupito taua lea e mafai ona maua i lenei olaga,” na faaauau pea Sister Beck. “O le agavaa ai mo le Agaga o le Alii, e amata i se manao mo lena Agaga ma e manao-mia ai se vaega patino ole agavaa. O le tausia o poloaiga, salamo, ma le faafouina o feagaiga na osia i le papatisoga, e tau atu ai i faamanuiaga o le i ai pea lava pea o le Agaga o le Alii e faatasi ma i tatou. O le osia ma le tausia o feagaiga o le malumalu e faaopoopo foi i le malosi faaleagaga ma le mana i le olaga o se tamaitai. E tele tali i fesili faigata e maua i le faitauina o tusitusiga paia, aua o tusitusiga paia o se fesoasoani lea i faaaliga. . . . E taua foi le tatalo i aso taitasi ia i ai le Agaga o le Alii e faatasi ma i tatou.”<sup>1</sup>

Tatou te faamalolosia faaleagaga foi tagata o tatou aiga pe a tatou fesoasoani ia i latou ia malamalamia i le fuafuaga e faavavau a le Tama Faalelagi. “O a ni mea e mafai ona tatou faia e saunia lelei ai i le faaleagaga a tatou fanau mo a latou matafaioi faavavau?” o le fesili lea a Elder M. Russell Ballard o le Korama a Apostolo e Toasefululu. “Atonu o le tali sili ona lautele o le: Aoao atu ia i latou le auala e ola ai i mataupu faavae o le talalelei.” E oo mai lenei aoaoga e ala i le tatalo i aso uma, suesueina o tusitusiga paia, ma taumafataga faaleaiga faapea foi ma afiafi faaleaiga ma le auai i le Lotu. Na faamalamalamia mai e Elder Ballard: “Tatou te saunia i aso uma, i le taimi nei, mo le ola e faavavau. Afai tatou te le o sauniuni mo le ola e faavavau, o loo tatou sauniuni mo se mea e itiiti ifo, atonu o se mea e matua itiiti ifo lava le taua.”<sup>2</sup>

Suesue i mea nei, ma pe a talafeagai ai, ia talamoaina faatasi ai ma uso e te asia. Faaoga fesili e fesoasoani ai ia te oe e faamalosia ai ou uso ma avea ai le Au-lofa ma se vaega ola o lou lava olaga.

Faatuatua • Aiga • Toomaga

## O Le a se Mea e Mafai ona Ou Faia?

**1.** E mafai faapefea ona ou fesoasoani i o'u uso ina ia faateleina le faalagolago faaleagaga o le tagata ia te ia lava?

**2.** E mafai faapefea ona ou faaleleia lo'u lava tomai ina ia iloa ai ma tali atu i le Agaga Paia?

## Mai lo Tatou Talafaasolopito

### Mai lo Tatou Talafaasolopito

Na aoaoina e le Perofeta o Iosefa Samita ia tamaitai i se fonotaga a le Aualofa ia Aperila 1842 e i ai so latou lava tiutetauave ina ia sailia lo latou lava faaolataga. Na ia saunoa ai, “A mae'a [la'u] aoaoga, o le a outou tali mo a outou lava agasala; o se mamalu manaomia lo outou savavali ai lea i luma o lo tatou Tama Faalelagi ina ia faaolaina ai outou lava; ua ia i tatou uma lava le tiutetauave i le Atua mo le auala tatou te faaleleia atili ai le malamalamia ma le poto ua tuuina mai e lo tatou Alii ina ia mafai ai e i tatou ona faaolaina i tatou lava.”<sup>3</sup> Na ia aoaoina i latou ina ia avea ma ni tagata amiontonu, ina ia avea o ni tagata paia, ma ia saunia mo sauniga ma feagaiga o le malumalu.

### FAAMATALAGA

1. Julie B. Beck, “Ou te Liligi Ifo foi lo'u Agaga i Auauna Fafine i la ona Aso,” *Liahona*, Me 2010, 10, 11.
2. M. Russell Ballard, “Spiritual Development,” *Ensign*, Nov. 1978, 65, 66.
3. *Aoaoga a Peresitene o le Ekalesia: Iosefa Samita* (2007), 380.



# O Mea Faatauvaa ma Faavalea

*"O mea faatauvaa ma mea faavalea ua faataunuina ai mea tetele"  
(Alema 37:6).*

## TALAFASOLOPITO O LE EKALESIA I LE LALOLAGI



## Sierra Leone

Le 1981 sa faalogo ai se tagatanuu o Sierra Leone o, Michael Samura i le talalelei i Holani ma papatiso ai iina. Ina ua toe foi o ia i Freetown, le laumua o Sierra Leone, sa ia talosagaina ni fai-faualalai, ae ona e lei sauni le Ekalesia e auina atu faifeatalai iina, na o tusi faitau o le Ekalesia na auina atu ia te ia. Na amata ona aoao e Uso Samura isi ma faia ni fonotaga faasamasamanoa. O tagata o le ekalesia o e na papatiso i isi atunuu ma ua toe foi atu i

Seirra Leone na faia foi lea tulaga. Sa avea le tausaga 1988 ma tulaga mauluga mo le atunuu. Na pulefaamalumalu i le uluai fonotaga aloaia ia Januari se tagata o le ekalesia o le na papatiso i Siamani. Na taunuu ia Me ni ulugalii faifeatalai se toalua, ma o Iuni na faataunu ai ia uluai papatisoga e 14 i totonu o le atunuu. O Aokuso na faatulaga ai le uluai paranesi—o le Paranesi a Goderich—. Na suaina le eleele i le 2004 mo le uluai falelotu o le Au Paia o Aso e Gata Ai i Sierra Leone.



O LE EKALESIA I SIERRA LEONE	
Tagata auai	8,907
Misiona	1
Itu	2
Paranesi	23

## Gaoioiga Lelei Faaleaiga

Oaiga e auai soo i gaoioiga lelei tuufatasi e mafai ona lagona atili le alofa ma le lotogatasi. O gaoioiga faaleaiga e maua ai le avanoa mo matua e talanoaina ai le talalelei ma fanau, ma o le a tele ina nau-nau atili ai foi tamaiti e faalogo ma usiusitai i matua pe a latou lagona le latalata atu ia i latou.


O gaoioiga lelei faaleaiga e aofia ai:

- **Afiafi faaleaiga:** Na saunoa mai Gordon B. Hinckley (1910–2008), “E matua taua ai lava ona nonofo i lalo tama ma tina faatasi ma a latou fanau, ma tatalo faatasi, aoao i latou i ala o le Alii, talatalanoa i o latou faafitalui faaleaiga, ma tuu atu i tamaiti e faaali ane a latou taleni.”<sup>1</sup>
- **Gaoioiga auauna atu faaleaiga:** E mafai ona e asiasi i se tagata matua o le ekalesia i lau uarota pe taeina faataamilo le lapisi a ou tuaoi.
- **Tafaoga taitoatasati ma Tina po o Tama:** O le a faatagaina ai tamaiti e fausia ni fegalega-leaiga taitoatasati ma patino ma matua.

### FAAMATALAGA

1. Gordon B. Hinckley, “Mo Alii o le Perisitua,” *Liahona*, Nov. 2002, 58.

# Truman O. Angell



**O** Truman Osborn Angell (1810–87) na auauna atu mo le tele o vaitausaga o se tusiata o le Ekalesia, fuafuaina ma faatonuina le tele o fale taua, e aofia ai le Malumalu o Sate Leki. I le aluga o tausaga o lana auaunaga i le Ekalesia, sa lotomaualalo ma usiusitai ia Truman.

Sa fanau o ia i le aso 5 o Iuni, 1810, i Providence, Rhode Island, ISA. Ina ua sefulu ma ona tupu ona tausaga, sa aoainia o ia e se tagata e tele lona tomai i le faakamuta ma le faimeafale, o se ituaiga galuega faapitoa e faaaoga ai laupapa.

Sa folasia atu ia te ia le Ekalesia i le 22 o ona tausaga e lona tuafafine, o le na mauaina se kopi o le Tusi a Mamona mai le faifeautalai o Thomas B. Marsh. Ia Ianuari o le 1833 na papatiso ai ia Truman faatasi ma lona tina o, Phebe, ma lona faletua o, Polly.

E lei leva ona faauina ia Truman e avea ma se tasi o le Korama Lona Lua o Fitugafulu, ae talosagaina loa e le Perofeta o Josefa Samita e tatau ona ia fauina se faleoloa i Katelani, Ohaio. Na teena e Truman, ma sa ia ta'u atu i le Perofeta o loo sauniuni o ia e alu i se misiona. Ae

peitai, o le aso na sosoo ai, na vaai ai ia Truman i le Au Peresitene Sili mai se mea mamao ma lagonaina le uunaia e talia le tofiga faufale mai le Perofeta. Na ia tusia mulimuli ane, “E tusa ai ma lena, sa suia lo’u naunautaiga ae gauai atu i le usiusitai.”<sup>1</sup>

I le 1856 na auina atu e Peresitene Polika Iaga ia Truman i se misiona i Europa, ma faatonuina o ia e “ave ia ata o galuega taua o le tusiata fale” ina ia mafai ona “faaagavaa atili ai o ia e faaauau pea” ona galue i le Malumalu o Sate Leki ma isi fale.<sup>2</sup>

Na tofia ia Truman e avea ma se tusiata fale a le Ekalesia i le 1867. (E le o toe tofia e le Ekalesia se tusiata fale aloaia a le Ekalesia.) E ui o le tele o tausaga o le galue malosi na mafua ai ona lamatia le soifua maloloina o Truman, ae na ia talia ma le agaga lotomaualalo le tofiga. Na ia tusia i lana api talaaga, “Ua ou lagona le lē lavā ae afai ua lagona e le Peresitene ma o’u uso ina ia lagolagoina se anufe o le perfu e pei o a’u e avea ma Tusiata o le


Ekalesia, ia faataga mai a’u ina ia taumafai e auauna atu ia i latou ae lē o le faamata-gaina o a’u lava ia . . . . Ia fesoasoani mai le Alii ia te a’u ina ia faia lea mea.”<sup>3</sup>

Na faatonutonu e Truman le tele o galuega faatino o fale i Iuta, e aofia ai le Fale Liona, le Fale o le Ofagapi, le Utah Territorial Statehouse, ma le Malumalu o St. George Iuta.

E le’i soifua Truman e vaai i le faapaiaga o le Malumalu o Sate Leki i le 1893, ae na ia auauna atu ma le faamaoni o se tusiata fale o le Ekalesia seia oo i lona maliu i le 1887.

## FAAMATALAGA

1. Truman O. Angell, in Kate B. Carter, *Our Pioneer Heritage*, 20 volu. (1958–77), 10:197.
2. Tagai ia Carter, *Our Pioneer Heritage*, 10:204.
3. I le Paul L. Anderson, “Truman O. Angell: Architect and Saint,” i le *Supporting Saints: Life Stories of Nineteenth-Century Mormons*, ed. Donald Q. Cannon ma David J. Whittaker (1985), 161; ua faalaugatasia le sipelaga.



# AGAVAA E ALA I AUAUNAGA I LE EKALESIA

Saunia e Alice A. Lewis

*“O tagata o le Ekalesia ua ia i latou le matafaioi mo lo latou lava soifua manuia faaleagaga ma le faaletino,” o loo ta’u mai i le Tusi-taulima 2: Taitaiina o le Ekalesia. “Ona ua faamanuiaina i le mea-alofa o le faitalia, o lea ua i ai ia i latou le avanoa ma tiute e faatu ai lo latou lava ala, foia a latou lava faafitauli, ma taumafai ina ia ola faalagolago ia i latou lava. E fai e tagata o le Ekalesia lenei mea i musumusuga a le Alii faatasi ai ma galuega a o latou lava lima” ([2010], 6.1.1).*

**S**a 57 ou tausaga, faatoa uma ona tatala le faaipoipoga, ma e itiiti sina malamalamā i galuega i fafo atu o le fale, ma e ua matuai manaomia lava se galuega. Sa ou tausia se fanau e toafa, ma o lenei ua tuua na o au ina ua mavae tausaga e 32 na ou faaipoipo ai, e laitiit se taimi na ou a’oga ai i le kolisi, ma le popole tele sa i ou luma i le taumafai e saili se galuega i lo’u matua ua i ai nei.

Sa ou nofo ma faatalitali e faatalanoa mo se avanoa o se tagata faapitoa mo le faatulagaina ma le gaosiga i le faletusi i le itumalo, ma o le taimi atoa sa ou manatu ai atonu ua leaga lo’u mafaufau e talitonu ai ou te agavaa mo lea ituaiga avanoa. Faatoa uma lava ona ou uunaia au lava e tu i luga ma aluese ae faafuasei loa ona fai mai le failautusi o loo faatali mo a’u i le potu fono. Sa ou lagona le ma’i ae na ou tu sao i luga, fai se tatalo le leoa, ma savali loa.

Na ta’u mai ia te a’u e ni tagata se toalua e manino le tautala ma e atamamai le taua o se poto masani

i ni eria faapitoa o lenei avanoa ma na amata loa ona fesiliglia a’u e uiga i lo’u poto masani. Na manaomia e lenei galuega se tagata e mafai ona faia ni sauniuniga mo fonotaga tetele, e aofia ai faasalalauga, tusi valaaulia, saunia o meaai, ma le tapenaga. Pe na ia te au la le poto masani na manaomia? Sa ou manatu e leai ae na faafuasei lava ona oo mai i lo’u mafaufau se ata o le konafesi a le Aualofa o le siteki. Sa avea au ma fesoasoani i le au peresitene o le Aualofa a le siteki. Sa ou aoao ai i le auala e faatulaga ai ni faatasiga tetele ma faia ni faatauga mo le anoanoai o meaai mo ni vaega se toatele. Na mafai lava ona ou fai atu ma le moni sa ia te a’u le poto masani e faatino tonu ai lava mea ia na manaomia.

Sa faaaauau pea le au fai faatalanaga: “E te lelei i le komepiuta? O le a outou fetusiai ma tagata ma o le a manaomia e fai se siata o le faasologa o le faaaogaina o le potu fono.” Pau lava le mea na oo mai i lou mafaufau

o lou faafetai lea i tagata uma lava na aoaoina au i le faaaogaina o le komepiuta ina ia mafai ona ou faia ni puletini ma kalena a le uarota ma tusi le tusi o tala fou a le siteki. Ioe, ou te lelei i le komepiuta.

“O le a faamoemoe e te fatufatuina ni polokalama ma saunia ni vasega mo tagata lautele. E mafai ona e aoaoina atu ni vasega i tamaiti ma tagata matutua?” o le la fesili lea. Na oso mai i lou mafaufau ia vaega faatausiaiga ma tomai faa-Sikauti Laiti lea na ou faia. Sa ou faamatala atu na ou aoaoina ni vasega a tamaiti ma tagata matutua i lo’u olaga atoa faatagatamatua. Sa ou iloa e sogasoga lou mafaufau ma sa ou mautinoa e mafai ona ou faia ni polokalama mananaia mo tamaiti ma tagata matutua.

Sa faagaeitia au ina ua ou maua le avanoa. Sa ou fiafia i le galuega ma taumafai e fai e pei ona ou faia i se tofiga o le Ekalesia: faalautele la’u galuega, alu i le maila faaopoopo, ma aua le faitio e uiga i le galue-




i itula faaopoopo. Sa ou fatuina ni vasega komepiuta i le gagana Peretania ma faafaigaluegaina se tamaititi aoga talavou e aoao ia vasega i le gagana Sipaniolo. Sa ou aoaoina ia vasega tusiata ma tomai faapitoa ma talimalo i le tele o tagata tusitala ma failauga tautaua. Sa ou teuteuina le faletusi mo aso malolo uma ma faatulaga ni tusi e fesootai i ai.

I se tasi aso sa valaau mai ai se tagata ia te a'u i le galuega, fai mai e valaau mai i le ofisa o le kovana ma e fia iloa pe ou te fia manao i le avanoa e avea ai ma tagata e lagolagosua i le kovana. Sa ou fesili atu ma le ata, "O ai lea?" Sa ia faamatala mai e moni le valaau ma valaauilia a'u ou te sau i se faatalanoaga i le aso e sosoo ai. Sa ou alu ma se lagona faanoanoa atonu o se mea malie. Ae e leai. Sa lelei le aluga o le faatalanoaga ma sa ofoina mai ia te au le galuega i lena lava taimi.

Sa ou faaaogaina i la'u galuega fou ia tomai na ou mauaina mai le tele o tausaga o lauga i le lotu. Sa le mafai

e le kovana ona auai i mea uma na tutupu lea na valaaulia ai o ia; ma o lea, sa faamoemoe ai o lana aufaigalugua e lauga i lona tulaga. O na lauga uma i le lotu ma auaunaga i tofiga faaletaitai ua ou maua ai le poto masani lea ou te manaomia e tautala atu ai i tulaga lautele i senate, tagata maualuluaga o le malo i le lotoifale ma atunu i fafo, ma tagata tautaua. Sa ou galue o se tagata e lagolagosua i le kovana mo le fitu tausaga seja oo i le taimi na ma litaea uma ai.

O fea semanu ou te oo i ai pe ana leai le tele o ituaiga poto masani na ou mauaina ao galue ai i valaauga o le Ekalesia? O mea uma lava sa ou aoaoina mai ao avea ai ma se auauna a le Alii i Lana Ekalesia ua ou maua ai se olaga ua tumu i faamanuiaga. E lei faapea sa na o lou fesoasoani atu i isi ao ou auauna atu, ae sa ou tuputupu ae ai foi i se tulaga matuai saoasaoa lava. Ou te matuai faafetai i le talalelei ma e mausali la'u molimau i le taua o le auauna atu i le Ekalesia. ■



## O SE TEUGATUPE O LE OLAGA ATOA

"Atonu o le a valaau mai le Ekalesia ia te oe e faia se osigataulaga. Atonu o le a valaau mai ia te oe e tuuina atu mea sili e mafai ona e ofoina atu. O le a leai se mea e te maimauina, aua o le a e iloaina ai, o le auaunaga na e tuuina atu, o le a e maua ai faamanuiaga i aso uma o lou ola."

*Peresitene Gordon B. Hinckley (1910–2008), "Matafaioi o le Olaga," Liahona, Me 1999, 6.*

**Saunia e Elder  
Per G. Malm**  
O Le Fitugafulu



# Mauaina o le Filemu I TAIMI FAIGATA

*“Ia outou o mai ia te au, o outou uma o e tigaina ma mafatia i avega, o a’u foi e malolo ai outou” (Mataio 11:28).*

## I SE LALOLAGI O FAIGATA

“Na fetalai atu le Faaola i Ona soo a o feagai o la ma Lona Faasatauroga ma a o latou feagai ma le matatau, lē mautonu, ma sauaga. I Lana fautuaga faalauaitele mulimuli ia i latou i le tino, na la fetalai atu ai: ‘Ua ou fai atu nei mea ia te outou, ina ia outou maua le manuia ia te au. E maua foi outou e le puapuaga i le lalolagi: a ia outou loto tetele; ua ou manumalo i le lalolagi’ (Ioane 16:33).

“O lea la, i se lalolagi o faigata, ia tatou manatua lo tatou faatuatua. . . . Ma ia tatou ola i le olaga i le atoatoa, i le lototele ma le lototoa sili atu nai lo se isi lava taimi.

“Ua manumalo Keriso i le lalolagi ma ua saunia le ala mo i tatou.”

Elder Jeffrey R. Holland o le Korama a Aposetolo e Toasefululu, “O Lenei, e Silisili i Tisipensione Uma,” *Liahona*, lulai 2007, 20.

**I**le taulaga o Kotenepara i Suetena, o loo i ai se auala vatele e i ai ni laau tetele i ona itu e lua. O se tasi aso na ou vaiai ai se āva i le pogati o se tasi o laau, o lea sa ou tilotilo ai ma le fialoa i totonu ma sa ou vaiai ai sa matuai ’ō’ō lava le laau.

Sa ou te’i i le mafai pea ona tu o le laau. O lea sa ou tilotilo ae ai i luga ma ou vaiai ai se fusi uamea lautele na saisai faataamilo ai le vaega pito i luga o le pogati. Sa mau i le fusi ni nai uaea uamea, ma sa saisai foi ia uaea uamea ma taula agai i nisi o fale o loo lata ane. A e tilotilo mamao mai, e pei lava lea laau o isi laau; ae seiloga e tilotilo i ai i totonu ona faatoa iloa lea e se tagata o le laau e ’ō’ō ae e le mausali ma malosi lona pogati. E oo mai le taimi o le a le mafai ai ona faasaoina le laau ma e tatau ai loa ona tuu i lalo.

E pei lava o se laau mu’amu’ā laitiiti e ola faasolosolo seia oo ina avea ma se laau tele, e mafai foi ona tatou tuputupu ae o lea laasaga ma lea laasaga i lo

tatou malosi e mausali ma faatumuina ai, e ese mai le laau e ’ō’ō. O le Togiola faamalolo a Iesu Keriso e mafai ai ona tatou maua le malosi e tulai maualuga ai ma malosi ma faatumuina o tatou agaga—i le malamalama, poto, olioli, ma le alofa.

O le faatuatua ia Iesu Keriso ma le mulimuli i Ana aoaoga e aumaia ai ia i tatou se faamoemoe mautu, ma e avea lenei faamoemoe ma se taula tumau i o tatou agaga. E mafai ona tatou tutumau ma le le mafaagaeitia. E mafai ona tatou maua le toafilemu tumau o le loto; e mafai ona tatou ulu atu i le malologa o le Alii. Vagana lava ua tatou o ese mai le malamalama ma le upumoni, ona faatumuina lea o nofoga i totonu o o tatou agaga i lagona gaogao ii o le leai o se mea, e pei lava o le laau.

Ia tatou taulai atu i mea ia o le a lagolagoina le toafilemu tumau o le mafaufau ma le loto. Ona “malosi ai lea o [lo tatou] faatuatua fai ifo i luma o le



Atua” (MFF 121:45). O le folafolaga e ulu atu i le malologa o le Alii, ia maua le meaalofa o le toofilemu, e matua vavamamao lava mai le faamalieina mo na o sina taimi e le lalolagi. O se meaalofa moni lava faalelagi: “Ou te tuuina atu ia te outou le manuia, o lo’u manuia ou te avatu ai ia te outou: ou te le avatu ia te outou faapei ona avatu e le lalolagi. Aua le atuatuvale o outou loto, aua foi tou te matatau” (Ioane 14:27). O loo ia te Ia le mana e faamalolo ma faamalosia ai lou agaga. O Ia o Iesu Keriso. ■

*Mai le “Malologa mo o Outou Agaga,” Liahona, Nov. 2010, 101–2.*

Mo nisi faamatalaga e uiga i lenei autu, tagai i le Mosaea 24:15; MFF 6:34, 36; 59:23; 78:17–18; Joseph B. Wirthlin, “Filemu i le Loto,” *Liahona*, Iulai 1991, 39; ma Neal A. Maxwell, “Ia Fusi i Aao o Lona Alofa,” *Liahona*, Nov. 2002, 16.

*“Ona o mai ai lea ia te ia o le motu o tagata e toatele, ua ia te i latou o e pipili, o e tauaso, o e gugu, o e mumutu, atoa ma nisi e toatele, ua latou tuu atu ia i latou i vae o Iesu; ona faamalolo ai lea e ia o i latou:*

*“Ona taufaifo ai lea o le motu o tagata ina ua latou iloa atu o e sa gugu ua tautala, o e sa mumutu ua atoatoa, o e sa pipili ua savavali, o e sa tauaso foi ua vaai: ona latou vivii atu ai lea i le Atua o Israaelu” (Mataio 15:30–31).*

### E MAFAI FAAPEFEA ONA TATOU MAUA LE FILEMU MA LE FAAMOEMOE I TAIMI FAALETONU?

Na fesoasoani Elder Jeffrey R. Holland o le Korama a Apose-tolo e Toasefululua e tali lenei fesili i le “O Lenei, e Silisili i Tisipenisione Uma” (*Liahona*, Iulai 2007, 18).

1. “Ola faamaoni i le mafai tatou te mafaia. . . . E le tatau ona tatou nofoa’i ona [o mea e tutupu] o loo i o tatou luma i se mea.”
2. “Aua nei faatagaina le atuatuvalue ma le tamā o le atuatuvalue (o Satani lava lea) e taitai ese i tatou mai lo tatou faatuatua ma le ola faamaoni.”
3. Ia faatuatua. E pule lava le Atua. Na te silafia lou igoa ma Na te silafia ou manaoga.”

*Mafaufau e saili ia tusitusiga paia mo fuaiupu i le faamoe-moe, filemu, ma le faatuatua ia Iesu Keriso.*

O SE KONA-  
FESI AOAO  
MO NA O



# A'U LAVA

*O le mea sa ma fetaia'i sa taufaafese,  
peitai na silafia a'u e le Tama Faalelagi  
i le faaiuga o lena vaiaso muamua o  
Oketopa.*

**Saunia e Ann Singleton**

**S**a ou ola ae i se aiga lea e avea konafesi aoao ma se vaega sili ona tulimatai atu i ai e pei o se aso malolo. Ou te manatua ao ou laitiiti le tuuina mai o se gaoioiga a le Aoga Sa e faafetaui ia ata o le Au Pulega Aoao ma taimi e faaali mai ai i luga o le televisé ao latou lauga mai i le taimi o le konafesi. Ina ua oo ina ou matua, sa ou aoao e matau na Uso Taitai e le na o o latou foliga ae faapea foi i o latou leo ma savali e tuuina mai. I le avea ai ma se tasi e tausaga muamua i le iunivesite, sa ou fiafia lava ina ua valaaulia le matou aufaipese a le inisitituti o mataupu faalelotu e pepese i se sauniga o le konafesi i le Tapeneko. I se faapuupuuga, e oo atu i le 20 o ou tausaga ua leva ona ou maua se lagona faapitoa e uiga i faaiuga o na vaiaso muamua o Aperila ma Oketopa i tausaga taitasi.

Peitai ou te lei aoao lava i le auala e matuai patino ai lava le konafesi aoao. Sa maua e la matou siteki ni pepa ulufale mo le sauniga aoao o le Aualofa ia Setema 2008 i le Nofoaga Autu mo Konafesi. Sa ou naunau lava e feofeoai ma tamaitai o la matou siteki, tulimatai atu i musika ma lauga musuia, ma e faapitoa le agaga lotomaulalo e mafau-fau ai o le a matou faalogo i se savali mai ia Peresitene Dieter F. Uchtdorf, Fesoasoani Lua i le Au Peresitene Sili. Sa ou faalogo ma le naunautai i



upu uma, tusi ma le malosi ni faamatalaga, ma tautino atu o le a faatinoina mea na tuuina mai tatou te faia. Sa ou lagona o se amataga matagofie lea mo sauniga aoao o le a mulimuli mai i le faaiuga o le vaiasco o le a sosoo ai.

Ona olopalaina lea o lo'u lalolagi. Ao ou faigaluega i le Aso Toonai na sosoo ai, sa ou mauaina se valaau mai le telefoni mai la'u fomai e ta'u mai ai o suesuega na faia mo a'u i le vaiasco ua te'a ua faailoa mai ai o le kanesa.

O aso na sosoo ai sa avea lea o ni lagona o le le mautonu, atuatuvalo, popole, faanoanoa, leai se faamoemoe, ma le tiga. Sa ou aafia i le tele o lagona ma na le mafai ai ona maua se moe ma e le matu le tafe ifo o ou loimata. Ou te lei lagonaina lava muamua se fefe tele.

Ina ua oo i le taeao o le Aso Toonai, sa ou fuafua e faalogo i le konafesi ao faia nisi galuega. O lou le malolo, sa ou faamoemoe ai, o le a fesoasoani lea e taulai ese atu ai lo'u mafaufau mai o'u luitau. Peitai sa ou tuuina i lalo le tagamea ma tuu ai pea ipu i le faatanoa fufulu ipu ae ou sioa atu i le televisé. Toeitiiti lava a misi le tata o lo'u fatu ina ua amata e Elder L. Tom Perry o le Korama a Apostolo e Toasefululua le sauniga muamua i lana faamatalaga faapea: "E le mafai ona tatou valoia tauiviga uma ma afā o le olaga, e oo lava i mea ua lalata mai, ae o i tatou, i le avea ai o ni tagata o le faatuatua ma le faamoemoe, ua iloa e aunoa ma se masalosalo e moni le talalelei a Iesu Keriso, ma e le i oo mai mea silisili."<sup>1</sup>

Sa ou mafaufau, e mautinoa lava, o le autu o le a sosoo ai e faatatau lea i le ola mama po o le aso Sapati. Peitai o savali taitasi na sosoo ai na faatatau foi i le faamoemoe i taimi o tofotofoga!

O le Aso Sa o se aso filemu e tuufaatasi ai lo matou aiga i le tatalo ma le anapogi ona o a'u. Sa faaaau pe a ona ou faalogo i upu o le faamoemoe e pei foi ona sa ou faalogo i ai i le aso ua tea, faatasi ai ma se savali faaiu malosi i le aolu mai ia Elder Quentin L. Cook o le Korama a Apostolo e Toasefululua: "Ou te molimau atu o le Togiola a Iesu Keriso ua aofia ai tofotofoga ma faigata uma o le a oo i ai soo se tasi o i tatou i lenei olaga," o lana saunoaga lea. "I taimi tatou te lagonaina ai le fia faapea atu, 'E faamoemoe ua e silafia, sa ou oo i se taimi sili ona faigata,' ia tatou

mautino o loo i ai o Ia iina, ma o loo tatou saogalemu i Ona aao agaalofa."<sup>2</sup>

Masalo o le anapogi po o tatalo pe ua na o so'u lava tulaga faaalia lotomaulalo, ae mai lava i le amataga seia oo i le faaiuga, sa ou lagona le pei o sa'u lava konafesi aoao patino ma e toatasi le tagata maimoa.

O aso, vaiasco, ma masina na sosoo ai na oo mai ai le tele o luitau ao ou feagai ai ma suesuega, taotoga, togafitiga i le leisa ma masini faaonapo nei. Maimau pe ana mafai ona ou fai atu ou te lei lagonaina muamua lava le faanoanoa i lena 12 masina. Ae na ou lagonaina. Peitai i lena vaitaimi, sa ou lagonaina foi le lagolagoina e ala i tatalo ma anapogi a le uarota ma tagata o le aiga, faamanuiaga faaleperisitua na tuuina mai e lo'u tama, ma le faatuatua o lo'u tina. Sa ou fai tauina atoa le Tusi a Mamona i nai masina muamua o ou togafitiga, ma le iloaina o le a oo mai le faamafanafanaga e ala mai i le afioga a le Atua.

Ae peitai o aso sili ona pogisa, e masani ai ona ou tago i la'u kopī masaesae o le *Liahona* ia Novema 2008 ma toe fai tau na upu lea na sau mai se Tama alofa e ala mai i auauna musuia ma e tuusao mai lava i lo'u loto atuatuvalo. Sa ou ofo i le fasi fuaiteau lea ou te lei manatuaina o saunoa i ai Peresitene Thomas S. Monson i lana saunoaga amata: "Ua silafia e lo tatou Tama Faalelagi i tatou taitoatasi ma mea tatou te manaomia. Ia faatumulia i tatou i Lona Agaga a o tatou auai i taualumaga o lenei Konafesi Aoao Lona 178 Faalefatausaga."<sup>3</sup>

Sa ou mauaina se molimau o lena upumoni. Sa silafia a'u e le Tama Faalelagi i le faaiuga o lena vaiasco ia Oketopa. Sa Ia silafia lo'u manaomia o le faamoemoe i Lona alofa ma le faamoemoe i Lona fuafuaga mo a'u. Sa Ia saunoa mai ma sa ou faalogo. ■

*Manatua: Na maea togafitiga o le kanesa o Sister Singleton ia Juni 2009, ma e lei toe ola le kanesa.*

#### FAAMATALAGA

1. L. Tom Perry, "Tuu Atu ia te Ia e Faafaigofie," *Liahona*, Nov. 2008, 7.
2. Quentin L. Cook, "E Faamoemoe Ua e Silafia, Sa Matou Oo i se Taimi e Sili ona Faigata," *Liahona*, Nov. 2008, 105.
3. Peresitene Thomas S. Monson, "Susu Maia ma Talaaao Mai i le Konafesi," *Liahona*, Nov. 2008, 6.

# O Le Sauniga o le Faamauga

E FESOOTAI  
FAATASI AI IA  
AIGA E FAAVAVAU

**A** o i ai i le lalolagi, e mafai ona tatou osia feagaiga paia (folafolaga) ma le Atua i le malumalu paia e ala i le pule o le perisitua. O loo i ai faatasi ma nei feagaiga le avanoa mo tane ma ava e faamau ai (faaipoipo mo le faavavau) ma faamau foi a latou fanau ia i latou. O lona uiga afai tatou te tausia a tatou feagaiga ma le Alii faapea i le tasi ma le isi, o le a le mafai e le oti ona tuueseeseina tumau i tatou. O lenei sauniga o le faamauga o se vaega taua o le fuafuaga a lo tatou Tama Faalelagi mo i tatou ina ia nonofo faatasi ma Ia e faavavau. (Tagai i le MFF 128:9–10; 132:19.)

O le taimi lava tatou te osia ai mo i tatou lava ia feagaiga o le malumalu, o le a mafai foi ona tatou aoina mai ia talafaasolopito o tatou aiga ma faatino sauniga o le malumalu mo o tatou tuaa ua maliliu. O lenei tulaga o le a maua ai e i latou ia sauniga o le malumalu (tagai i le MFF 138:29–37).

O le mana o le perisitua e faamau ai aiga na valoia anamua (tagai i le Malaki 4:5–6) ma faapea foi i onapo nei (tagai i le MFF 2). O valoaga uma e lua na faaalia ai o le a “totoina [e le perofeta o Elia] i loto o fanau o folafolaga na faia i tama, ma o loto foi o fanau o le a liliu i o latou tama” (MFF 2:2).

Na taunuu i le aso 3 o Aperila, 1836, le toe foi mai o Elia lea na folafolaina, i le Malumalu o Katelani i Ohaio, ISA faatoa uma lava ona

faapaiaina, ina ua faaali mai Elia ma isi ma tuu atu i le Perofeta o Iosefa Samita ana ki o le perisitua (tagai i le MFF 110:13–15).

I le taimi nei, e 134 malumalu o loo faaaogaina i le lalolagi atoa, ma e mafai e tagata agavaa o le Au Paia o Aso e Gata Ai ona osia feagaiga ma le Atua ma faamauina o ni aiga mo le faavavau. E mafai ona latou toe foi mai e galulue e fai ma sui mo o latou tuaa ua maliliu, ona faataunuina ai lea o le folafolaga o le liliu o loto o fanau i o latou tama. ■

Mo nisi faamatatalaga, tagai i le Mataupu Faavae o le Talalelei (2009), 227–32; *Faamaoni i le Faatuatua* (2004), 67, 77–81, 38–42, 105–09; ma le “la Agavaa e Ulu Atu i le Malumalu,” *Liahona*, Aok. 2010, 12–13.

“*Ou te avatu foi ia te oe ki o le malo o le lagi: o se mea foi e te fusifusia i le lalolagi, e fusifusia foi lea i le lagi*” (Mataio 16:19).



ATA NA TUSIA E LAUREN FOCHETO, JOHN LUKE, CRAIG DIMOND, MATTHEW REIER, MA DAVID STOKER, ATA O LE MAULAMALO RECIFE PASUA NA PUERTA E LAUREN FOCHETO

**E tatau ona tatou maua ia feagaiga ma sauniga faapi-toa ina ia mafai ai ona toe foi atu e mau faatasi ma lo tatou Tama Faalelagi:**


1. *Ua papatisoina ma faa-mauina i tatou (tagai i le Mataio 3:16–17; Ioane 3:5; 2 Nifae 31:5–18).*



2. *E maua e alii le Perisitua Arona ona mulimuli ane lea maua le Perisitua Mekisateko (tagai i le MFF 128:11).*



3. *Tatou te osia i le malumalu ni feagaiga faaopoopo e fesootai ma le faaeega paia.*



4. *E faamauina (faaipoipo) i le malumalu ia tane ma ava mo le olaga nei ma le faavavau atoa.*



5. *E fananau mai tamaiti i se ulugalii ua faamauina "i totonu o le feagaiga." O tamaiti e le fananau i totonu o le feagaiga e mafai ona faamau i o latou matua.*



6. *Ona tatou saunia lea o igoa o tatou tuaa mo galuega i le malumalu ma faatinio ia sauniga e moomia mo i latou i totonu o le malumalu (tagai i le 1 Korinito 15:29; MFF 128:15–16, 24).*

# OLE NATURA E FAAVAVAU O LE Faaipoipoga



**Saunia e Peresitene  
N. Eldon Tanner  
(1898–1982)**

Fesoasoani Muamua  
i le Au Peresitene Sili

*Na fanau Nathan Eldon Tanner i le aso 9 o Me, 1898, i le Aai o Sate Leki, Iuta. Sa faauuina o ia e avea ma se Apostolo i le 1962 ma i le va o le 1963 ma le 1982, na galue ai o se fesoasoani i le Au Peresitene Sili i lalo o le taitaiga a Peresitene o le Ekalesia e toafā. O se vaega lenei na sii mai lana lauga “Celestial Marriages and Eternal Families,” na saunoa i ai i le konafesi aoao ia Aperila 1980. Mo le saunoaga atoa i le gagana Peretania, alu i le conference.lds.org.*

**O**se tasi o taimi sili ona fafia i le olaga o se tagata o le taimi lea e fuafua ai se faaipoipoga. . . . E saogalemu le mafaufau faapea o le toatele o ulugalii latou te mautinoa i le taimi o le faaipoipoga ua latou faia ni filifiliga sa’o; ae o le tele o taimi e iu loa le tafaoga lea e fai pe a uma ona faapaia, amata loa faafitauli, ma faamuta ai ma le faaipoipoga i le tatalaina.

O le faalausosoo o le tatalaina o faaipoipoga ua taitaiina atu ai nisi i se olaga lea latou te lagona ai le tauau ina sosola ese mai sau-niga ua foliga mai ua leai sona aoga, e aunoa ma se fesoasoani faalelotu po o se isi faata-gaga faaletulafono. O le tele lava o taimi ou te mafaufau ai po o le a le lelei o lo latou iloa e uiga i le faamoemoega o le Foafoaga o le lalolagi lea o loo latou nonofo ai ma po o le a le atoatoa ua latou sailili ai i tusitusiga paia ina ia aoao ai pe aisea na foafoaina ai e le Atua le tane ma le fafine ma faavaeina le sauniga paia o le faaipoipoga.

Sei o tatou mafaufau muamua i le faamoe-moega o le Foafoaga o le lalolagi. O loo faamanino mai i tusitusiga paia e leai lava se isi faamoemoega nai lo le saunia ai o se nofoaga mo atalii ma afafine o le Atua e nonofo ai i le olaga nei ma faamaonia lo latou lava agavaa, e ala i le tausia o poloaiga, ina ia toe foi atu ai i le afioaga o le Atua lea na latou o mai ai.

Ina ua mae'a le Foafoaga o le lalolagi, “Na fetalai ane lea o le Atua, Ina tatou faia ia o le tagata i lo tatou faatusa. . . .

“Ona faia lea e le Atua o le tagata i lona faatusa, o le faatusa o le Atua na ia faia ai o ia; na faia e ia o i laua o le tane ma le faafine.

“Ua faamanuia foi e le Atua ia te i laua; ma ua fetalai atu le Atua i te i laua, Ia fanafanau ia, ma ia uluola, ma ia tumu ai le lalolagi, ia faatoilalo i ai” (Kenese 1:26–28).

Ina ua foafoaina e le Atua le fafine ma avatu o ia i le tane, ua Ia fetalai atu, “O le mea lea e tuua ai e le tane lona tama ma lona tina, a e faatasi ma lava ava: ona avea ai lea o i laua ma tino e tasi” (Kenese 2:24).

Ioe, o le faaipoipoga e faauuina e le Atua, ma e sosoo ai ma lena faatatauga i tane ma ava, ua tatou maua ai mau ia e ta'u soo mai ua avea o ni faamaoniga na avea alii ma tamaitai o ni tane ma ni ava i sauniga o le faaipoipoga lea e sosoo ma taumafataga o le faaipoipoga. Tatou te le o i ai iinei e na o le “aai ma inu, ma ia olioli” (2 Nifae 28:7). Ua tuuina mai ia i tatou se lalolagi ina ia faatoilalo ma ni faatonuga ina ia fanafanau ma uluuluola. E ese le mataina o le iloaina na fetalai mai le Atua “ia



fanafanau” ae le na o le “uluola” e tumu ai le lalolagi (tagai i le Kenese 1:28).

E taua mo i tatou le malamalama, e pei ona tatou aoao mai i tusitusiga paia, e faavavau le Atua, o Ana foafoaga e faavavau, ma e faavavau foi Lana upumoni. Ma o lea, ina ua Ia tuu atu Eva ia Atamu i le faaipoipoga, o le a faavavau lena faatasiga. O le faaipoipoga e faauuina e le Atua ma e faataunuina i Ona malumalu paia e faavavau—e le o faapea seia oo i le oti. Tatou te faitau i le Failauga, “O mea uma e faia e le Atua e faavavau ia” (Failauga 3:14).

Ina ua fesili atu Keriso ia Peteru e tau atu ia te Ia po o ai Ia, na tali mai Peteru, “O Oe o le Keriso, o le Alo o le Atua soifua.” Na tuu atu e Iesu ia Peteru le faamautinoaga na ia iloa lenei mea e ala i le faaaliga mai le Atua le Tama ma o le a Ia ati ae Lana Eklesia i luga o lenei papa. Ona Ia fetalai atu lea, “Ou te avatu foi ia te oe ki o le malo o le lagi: o se mea foi e te fusifusia i le lalolagi, e fusifusia foi lea i le lagi;

*O N. Eldon ma  
Sara Tanner ma lo  
la afafine, pe tusa  
o le 1927. O le la  
tama lona lima ma  
le ui'i o, Elena, na  
fanau i le 1931.*

o se mea foi e te tālā i le lalolagi, e tatalaina foi lea i le lagi” (tagai i le Mataio 16:15–19).

Ina ua o mai ia Iesu le au Faresaio, ua faaososo mai ia te Ia, ma fesili e uiga i le tatalaina o faaipoipoga, o Lana tali na aofia ai mea nei:

“Tou te lei faiatulia ea, o le na faia tagata i le amataga, na ia faia i laua o le tane ma le fafine.

“Na ia fetalai ane foi, O le mea lea e tuua ai e le tane o lona tama ma lona tina, a e faatasi ma lana ava: ona avea lea o i laua o le tino e tasi?

“O lea e le toe toalua ai, a o le tino e tasi i laua. O lenei, o e ua faatasia e le Atua, aua nei faateaeiseina e se tagata” (Mataio 19:4–6).

Ua faailoa mai e nei mau o le faaipoipoga faaselesitila, ua faauuina e le Atua ma e faataunuina e ala i Lana pule i totolu o Ona malumalu paia e faavavau lea, ma o ulugalii ua tuufatasia ma faamauina i le olaga nei ma le faavavau atoa, e fananau mai a latou fanau i totolu o le feagaiga o le talalelei e faavavau. O le a avea i latou ma aiga e faavavau e tusa ai ma lo latou faatuatua. . . .

Na afio mai Keriso i le lalolagi e tuu mai ia i tatou lena lava savali—po o ai i tatou ma po o le a foi le mea e tatau ona tatou faia. Na Ia tuuina mai ia i tatou le fuafuaga o le ata o le ola ma le faaolataga a le talalelei ma fetalai mai e leai lava se isi igoa i lalo ifo o le lagi e mafai ona faasaoina i tatou (tagai i le Galuega 4:12). Ua ia i tatou lena lava talalelei toefuataina i nei aso e gata ai, ma le perofetai soifua o lenei vaitaimi . . . e talanoa mai mo le Atua, e pei o le tulaga o fesoootaiga a le Atua ma tagata i le talafaasolopito atoa. . . .

Ou te iloa, o le talalelei a Iesu Keriso ma le tausiga o poloaiga a le Atua ma feagaiga na tatou osia ma Ia, e mafai ai e i tatou taitoatasi ona fausia o tatou aiga e avea ma se lagi i le lalolagi ao saunia i tatou lava ma a tatou fanau ina ia toe foi atu i lo tatou Tama Faalelagi. ■

*Ua faalaugatasia le sipelaga, faailoga, faamataitusi tetele,  
ma le faaparakalafaina.*

# FAUSIAINA O LA'U

# Faaipoipoga e Faavavau

Saunia e Rosana Pontes Barbosa Neves

**A**o ou talavou, sa ou atiina ae le faatuatua faapea o le faaipoipoga o le a avea ma se aafiaiga matagofie ma faavavau. Ae peitai, sa faigata ia te au le talitonu i ai i taimi uma, ona o faataitaiga o faaipoipoga sa ou ola ae ai e le'i malolosi, ma sa ou tuuina lava i totonus o lo'u loto le popole i le faaipoipoga. Ae sa ou naunautai lava ina ia le pule le toilalo ma le le fafia ae o le a fesoasoani mai le Tama Faalelagi ina ia ou iloa le auala e maua ai se faaipoipoga fafia.

Ina ua 26 o'u tausaga, sa ou faaipoipo atu ia Sidnei i le Malumalu o São Paulo i Pasila. Ao ma tafafao faamasani, sa ma taumafai lava e saunia i maua lava faaleagaga ma faalelagona mo le mea o le a tupu e sili ona taua i o maua olaga. Sa ma filifili i le ituaiga faaipoipoga sa ma mananao i ai, sa ma faatuina faatasi ni sini, ma sa fefaaosoai o maua manatu—o a maua molimau i le talalelei, o ma moomooga ma popolega, ma a ma miti. Sa ma faitauina foi faatasi le apoapoaiga a perofeta e uiga i le faaipoipoga. Sa ma faia mea uma ma te mafaia e saunia ai, ma moomoo ina ia saunia le fafia ma le puipuiga o le tasi ma le isi faapea le ma fanau i le lumanai. Sa ma talosaga atu i le Alii e aumai ia i maua le poto e ola ai i se olaga fafia.



Ua atoa nei le 18 tausaga talu ona ma faaipoipo. I le aluga o nei tausaga, o loo faaauau pea ona ma aoao mai i mataupu o le talalelei, i faantuaga a o tatou taitai, ma, ioe, faatasi ai ma le Agaga. O nisi o mea na ma faia ina ia malosi ma fafia ai le ma ulugalii o le:

1. Tatalo faatasi i aso uma. Pe a ma tatalo i le po, ma te faafetai i le Tama Faalelagi mo le ma ulugalii, mo le alofa o le tasi i le isi, ma e ma te aioi atu ina ia faamalosia o ma'ua lagona ma maua le malosi faaletagata lava ia e feagai ai ma fuafuaga a le



## FAAIPOIPOGA I LE FUAFUAGA A LE TAMA FAALELAGI

**A**o tofu faatalata atu le tane ma le ava (tagai i le 3 Nifae 27:14) i le Alii, a o aoao e i laua e auauna atu ma faapelepele e le tasi le isi, a o taufai fefaaasoai o laua aafiaga o le olaga ma tuputupu ae faatasi ma avea ma tino e tasi, ma a o faamanuiaina i laua e ala i le tuufaatasia o o laua natura tulaga ese, e le pine ae o



fili, lea e galue e faataumaoi ia aiga.

2. Aioi atu mo le faamagaloga. Ma te galulue ia aua lava nei faatagaina le faamaualuga e taofia i ma'ua mai le aioi atu mo le faamagaloga po o le ta'u sa'o atu ua ma sese. E sili atu le taua o le alofa ma le lotogatasi nai lo le iloa po o ai e sa'o ae po o ai foi e sese.
3. E le faia lava se tala leaga e uiga i isi. E manino lava e leai se tasi o i ma'ua e atoatoa, ae ma te le faia lava

laua iloaina le fafia lea e finagalo ai le Tama Faalelagi mo Lana fanau. O le fafia tupito, o le faamoemoega tonu lava lea o le fuafuaga a le Tama, e maua e ala i le osia ma faamamaluina o feagaiga o le faaipoipoga e faavavau."

Elder David A. Bednar o le Korama a Aposetolo e Toasefululu, "E Taua le Faaipoipoga i Lana Fuafuaga Faavavau," *Liahona*, Iuni 2006, 54.

ni tala leaga e uiga i le tasi ma le isi, ma pe a matou faatasi ma nisi, ma te talanoa i mea lelei e uiga i le tasi ma le isi.

4. Puipui le faavae o le faaipoipoga. Soo se taimi ma te maua ai se avanoa—aemaise lava pe a siomia e tagata o e faitio i le faavae o le faaipoipoga—ma te tutu atu mo aiga ma mea ua ma talitonu i ai.
5. Talanoa soo ma faalogo. Ma te taofia mea ma te faia ina ia matuai faalogo atu pe a o talanoa se isi tagata.
6. Ia taulimaina e le tasi le isi i le alofa ma le agalelei. Ma te le faatiga, tuuaia, pe faitioina le tasi ma le isi.
7. Saili pea lava pea le fesoasoani ma fautuaga e uiga i faaipoipoga mai tusitusiga paia ma i saunoaga a perofeta i nei onapo. Ma te le iloa mea uma. Ma te le atoatoa ma e tele ina gallo ma faia ni mea sese. Ma te mananao ia aua nei faatali mo ni faafitauli e aafia ai i ma'ua, ae ma te galulue e fausia se ulugali malosi ao le'i mafai e se mea ona faatiga i ma'ua.

Na fesoasoani nei mea i le faamalosia o le sootaga i lo ma va ma lo'u toalua. Ou te iloa afai ma te fefaaasoai o ma ola ma o ma lagona ma le Tama Faalelagi ma saili le fautuaga mai ia te Ia, o le a musuia i ma'ua e le Agaga Paia ma o le a mafai ona faavavau lo ma aiga, ma manumalo ai i taimi faigata uma. Ma te iloa foi o le a fesoasoani le Tama Faalelagi ia i ma'ua ao ma saili ina ia iloa ma faia Lona finagalo. ■

## O FAAIPOIPOGA MANUIA

**O** faaipoipoga ma aiga manuia, e faavae ma tumau i mataupu faavae o le faatuatua, tatalo, salamo, faamagaloga, faaalolo, alofa, agalelei, galuega, ma gaoioiga faafafia tuufaatasasi."

"O Le Aiga: O Se Folafolaga i le Lalolagi," *Liahona*, Nov. 2010, 129.



Saunia e Elder  
Robert D. Hales

O Le Korama a  
Apostolo e Toasefululua



# O SE VAEGA ITIITI O LE LAGI I LE LALOLAGI

*O le faaipoipoga faaselesitila e manaomia ai le ola i se olaga faapaiaina o le agavaa ma mataupu faavae faaselesitila, lea e taitai atu ai i le fiafia i lenei olaga ma le faaeaga i le olaga a sau.*

**O** le faaipoipoga faalemalumalu e faamalamalama mai ai le nofoaga e te alu i ai e faataunuu ai le faaipoipoga. O le faaipoipoga faaselesitila o le mea lea e te foafoaina e ala i lou faamaoni i feagaiga paia na e osia i le taimi o le sauniga o le faaipoipoga faalemalumalu.

A uma loa ona faia ni osiga feagaiga, o le a manaomia e le faaipoipoga faaselesitila le ola i se olaga faapaiaina o le agavaa ma mataupu faavae faaselesitila, lea e taitai atu ai i le fiafia i lenei olaga ma le faaeaga i le olaga a sau. Afai tatou te ola i tulafono e patino i le faaipoipoga faaselesitila, o le a mafai ona tatou maua, faatasi ai ma o tatou taitoalua ma aiga, se vaega itiiti o le lagi i le lalolagi. Ma pe a tatou ola ai i na tulafono, ua tatou faatinoina ia tulafono lava ia e tasi o loo faatinoina i le lagi. O loo tatou faatinoina le auala e ola ai ma le Tama ma le Alo ma o tatou aiga i le faavavau o le oo mai. Ia te au lava ia o le savali lena i le lalolagi a Le Eklesia a Iesu Keriso o le Au Paia o aso e Gata Ai.



*Pe a e filifiliina sau soa,  
ia mautinoia o loo ia te  
oulua uma se naunau-  
taiga mo se mafutaga o  
se faaipoipoga faase-  
lesitila, se naunautaiga  
ina ia maua se soa mo  
le faavavau, se naunau-  
taiga ia maua se aiga  
mo le faavavau, ma se  
naunautaiga ina ia ola  
ai i le afioaga a lo tatou  
Tama Faalelagi.*

### **Filifiliina o se Soa**

E masani lava ona fesili tagata nofofua o le Ekalesia, “E faapefea ona ou maua le tagata sa’o e faaipoipo i ai?” Sei o’u fautuaina atu se taumafaiga. Fua le tulaga faaleagaga o lau soa faamoemoeina o le lumana. Mua-mua, pe o ni tagata o le Ekalesia, e toaaga ma tuuto atoatoa, pe le malosoi pe le fiafia [i le lotu]? Lua, afai e le lolotu, pe latou te talia le talalelei ma ona aoaoga, pe latou te le mautonu pe le fiafia foi [i le lotu]?

Afai e te faaipoipo i le malumalu i se tagata e toaga mo le olaga nei ma le faavavau atoa i le feagaiga fou ma le faavavau atoa, mata o le a i ai ni ou faafitauli? Ioe. Pe e mafai la ona e foiaina? Ioe. Mata o le a sili atu ona lelei lou avanoa e foia ai ma faamalosia lau molimau nai lo le tulaga e oo i ai pe ana e le faaipoipo i le malumalu? Ioe. Peitai pe ana e faaipoipo i se tasi e le fiafia i le Ekalesia pe le malosi i le talalelei, ua e tuuina oe lava i se tulaga e te ono faia ai se filifiliiga i se aso i le va o lena tagata ma le Ekalesia. E matuai mamafa lava lena tiutetauave.

Pe a e filifiliina sau soa, ia mautinoia o loo ia te ouluuma se naunautaiga mo se mafutaga o se faaipoipoga faaselesitila, se naunautaiga ina ia maua se soa mo le faavavau, se naunautaiga ia maua se aiga mo le faavavau, ma se naunautaiga ina ia ola ai i le afioaga a lo tatou Tama Faalelagi.

### **Tumau ai i le Tulafono**

Na faamanino mai e le Alii ua pau le auala e mafai ona tatou faatasi ai i le faavavau ma a tatou soa o le tumau

ai lea i le tulafono. I se faaaliga faa-onapo nei na Ia fetalai mai ai:

“O lea, ia sauniuni ai lou loto ina ia talia ma usiusitai i faatonuga ia o le a ou tuuina atu ia te oe; aua o i latou uma ua faaalia i ai lenei tulafono e ao lava ina usiusitai i ai.

“Aua faauta, ou te faaalia ia te oe se feagaiga fou faavavau” (MFF 132:3–4).

E tatau i tagata uma o le Ekalesia ona faiatau ma suesue i le vaega e 132 o le Mataupu Faavae ma Feagaiga. E te iloa e leai se tasi e i le va o le Alii ma le tagata lea e faatinoina le sauniga o le faamauga? O se sauniga matagofie ma faamomoiloto.

Na faamanino mai e le Faaola Lava Ia le faamoemoega autu loloto o le faaipoipoga faalemalumalu ina ua Ia fetalai mai, “E faatatau foi i le feagaiga fou faavavau, na faatuina mo le atoatoa o lo’u mamalu; o lē foi na te talia lona atoatoa e ao ina usitai ma o le a usitai i le tulafono, a leai e tausalaina o ia” (MFF 132:6).

Na toe fetalai atu foi le Alii, “O lea, afai e faaipoipo se tane i se ava i le lalolagi, ae na te le faaipoipo ia te ia ia te a’u po o la’u upu, ma la te osi feagaiga a o i ai i laua uma i le lalolagi, o la laua feagaiga ma le faaipoipoga e le tumau pe a oti i laua, ma pe a o ese i laua mai le lalolagi; o lea, e le noatia ai i laua i soo se tulafono pe a la o ese mai le lalolagi” (MFF 132:15).

Pe tatou te iloa ea ua faailoa mai ia i tatou i le Mataupu Faavae ma Feagaiga e le mafai ona tatou au-sia le mamalu maualuga i le malo selesitila, seiloga tatou te ulu atu i le faaipoipoga faaseletila (tagai i le

MFF 131:1–4)? O loo manino mai foi le mea o le a tupu ia i latou o e le a le maua lava ni faamanuiaga o le faaipoipoga faalemalumalu: o lo latou noataga e mavae lea pe a oo i le oti—o se mea matuai faanoanoa lava e mafaufau i ai.

O le fuafuaga a le talalelei ma le faamoemoega o le faaipoipoga faaselesitila e le na o le tuufaatasia o i tatou ae ia faaagavaaina i tatou mo le taui sili a lo tatou Tama Faalelagi: faaeaga i le malo selesitila, fananau i lena malo, ma le ola e faavavau faatasi ma o tatou aiga.

### Fe'aei Faatasi

O le faaipoipoga faaselesitila e pei o le a'e i se mauga. E te nonoaina oe lava i se soa e faavavau, ma amata ai ona oulua o a'e i le mauga. Pe a fananau mai tamaiti, e te nonoaina foi oe faatasi ma i latou ma faaauau pea lau malaga. O le a taofi faatasi e manoia ia tagata fe'aei uma, ae o le a taumafai luitau o le lalolagi o le—matagi, timu, kiona, ma le aisa—e toso ese oe mai lena mauga.

E faapefea ona e ausia le tumutumu? Afai ua fiu ia Tina po o Tama ma tatipi ia manoia lea e nonoa ai faatasi le tasi i le isi ma le la fanau, o le tulaga la e oo i ai o le a pau ese mai le mauga se tasi o i laua ma atonu o le a tosaina mai ai i lalo nisi tagata o le aiga faatasi ma i laua. E mafai ona pauu ese mai le mauga le aiga atoa ma lē ausia ai le tumutumu e faavavau. E le mafai ona tatou faaaogaina lena tulaga lamatia. I le avea ai ma se tagata o le aiga sei o tatou mafaufau pea, o loo nonoaina i tatou i se 'au o le mauga o loo taumafai e toe foi atu i



le afioaga o lo tatou Tama Faalelagi.

Fai mai se alagaupu tautaua, “E te lifina a'u ae ou lifina oe, ma o le a ta fe'aei faatasi.”

O se faaipoipoga faipaaga e le o se mea e faalagolago i ai. E te le faaipoipo i se tagata e te mafaufau e maualuga laitiiti ae nai lo agelu ona e faalagolago lea i lena tagata. Nai lo lena, e te atiina ae oe lava ma au lava meaalofa ma taleni. Ao lua atiina ae, lua te ola faatasi, felagolagomai ma faamalosiau le tasi i le isi.

Ae ma te le'i faaipoipo ma lo'u toalua, sa ou fai atu ia te ia, “E te iloa, Maria, ou te lagona e tatau ona ou galue malosi i le lotoifale ma atonu foi i fafo atu ina ia manuia le pisinisi. E te manao ta te malaga

*O le faaipoipoga faaselesitila e pei o le a'e i se mauga. E te nonoaina oe lava i se soa e faavavau, ma amata ai ona oulua o a'e i le mauga. Pe a fananau mai tamaiti, e te nonoaina foi oe faatasi ma i latou ma faaauau pea lau malaga.*



*O le tulaga faalilolilo  
o se faaipoipoga fia-  
fia o le puipuia lea o  
le mulivae o Achilles  
po le tulaga vaivai  
ma aua e te faatalale  
i vaivaiga o i latou e  
sili ona e silafia, sili  
ona e alofa i ai, ma iu  
ai lava ina sili ona e  
faatiga i ai.*

faatasi?" Sa ia fai mai ioe. E sefulu tau-saga talu ona ma faaipoipo, ae talosa-gaina au ou te alu i Egelani, ma sa ma faatasi ai iina. Ona ma o lea i Siamani ma mulimuli ane i Sepania. Na avea o ia ma se tagata faavaomalo, e tele ana aganuu, ma e tautala i gagana eseese aua sa ia faia se tuutuuga o le a ma galulue ma tutupu ae faatasi.

Ia manatua e tausí ma le agalelei ma le faaaloalo le tasi i le isi mo lou ituaiga tagata ma le mea e te manao e avea ai oe.

Ou te manatuaina se tina i la'u uarota i nai tausaga ua mavae atu ao avea au ma epikopo. Sa i ai ni faafitauli i le la ulugalii. Ao la talanoa mai ia te au, na amata ona ia faaleaga mai lona toalua i soo se itu autu lea e manaomia ai e se alii se faaviivii ina ia faamamaluina ai ia lava. Sa ia talanoa mai i lona lē agavaa o se tamā, lona lē agavaa i fegalegaleaiga faaleulu-galii, lona lē agavaa o se tausiaiga,

ma ona lē agavaa i fegalegaleaiga faaagafesootai.

Sa ou fesili ia te ia, "Aisea e te faia ai lenei mea i se alii e tatau ona e alofa i ai ma lagolagoina?"

Na tali mai, "E sili atu le finau ma se tasi e te alofa i ai aua e te iloa le mea e mafai ona e faatiga atili ai ia te ia."

Ma e moni *lava lana* tala.

Ae peitai, i le avea ai o se Au Paia o Aso e Gata Ai, e tatau ona tatou faaaogaina lo tatou faitalia ma faa-aogaina o tatou avanoa mo le tupu-tupu ae. E tofu uma lava tagata ma vaivaiga. E iloa e le fili le mulivae o Achilles po o le tulaga vaivai o e pele ia te oe, o au uo, o e tou te potu faatasi, ou uso ma tuafafine, ma ou matua. E te malamalamama i *lou* tulaga vaivai po o le mulivae o Achilles? E te iloa le tulaga e tatau ona e aloese mai ai ma po o a ou vaivaiga? O le tulaga faalilolilo o se faaipoipoga fiafia o le puipuia lea o le mulivae o Achilles po le tulaga vaivai ma aua e te faatalale i vaivaiga o i latou e sili ona e silafia, sili ona e alofa i ai, ma iu ai lava ina sili ona e faatiga i ai.

"O lea, ia faamalosia ai ou uso i au talanoaga uma, i au tatalo uma, i au apoapoaiga uma ma au faiga uma" (MFF 108:7). I nisi upu, o aso uma lava e te fesoasoani ai i isi ao e tatalo ma talanoa atu i au faalaeiauga ma i au taumafaiga.

Ou te manatua se ulugalii talavou faatoa uma mai le kolisi. Sa tuu atu ia i laua e se tasi o matua se fale; o le isi matua na tuu atu ia i laua ia meafale ma se taavale fou. Sa la maua mea uma i le lalolagi na tuu atu ia i laua. I totonu o le tolu tausaga ae tete'a i la'ua. La te lei galulue ma ositaulaga.

Sa la faalagolago i isi ma o laua matua o se tootoo, sa la faapipiliina i laua lava, ma sa le tuputupu ae. La te lei aoao i le vaega faigata. La te lei popole e uiga i le taumafaiga ina ia lelei le la ulugalii. Ia mautinoa e te ositaulaga, fetufaai, ma tutupu ae faatasi.

### Lagolagoina o le Tasi ma le Isi

Ina ua uma ona ou galue o se peresitene o le korama a toeaina, se peresitene o le paranesi, ma se epikopo i le silia ma le lima tausaga, na matou siitia atu loa i se uarota fou. E lei leva ae valaaau loa lou toalua e avea ma peresitene o le Aualofa. Sa alu o ia i lana fonotaga muamua ma le epikopo ae fai le matou tuliga ma la'u au laiti e toalua i le faapaologa ma agai atu i le mea e paka ai taavale ma le fale toonai. Sa ou oo muamua i le mea e ta'u o le faatalitali. Sa ou faatali mo le tasi ma le afa itula. Ina ua sau i fafo Maria mai le ofisa o le epikopo, ua tasi le tamaitiiti o loo afisi ao le isi o uu i lou lima. Ou te lei maua le lototoa e fai atu ai se upu, ae na o lou pupula atu e pei o fai atu, "E te iloaina ua itula ma le afa na ou faatali ai mo oe?"

Pau lava le mea na ia faia o le sii i luga o tamailima e lima ma fai mai, "Lima tausaga." O le umi lena na ia faatali ai mo a'u. Ona ou iloaina loa lea, o la'u galuega e fai o le lagolagoina lea o lo'u toalua i lona valaauga e pei ona ia lagolagoina foi au i ou valaauga.

Ou te talosaga atu ia aua nei outou faalagolago atu i o outou taitoalua e pei o se tootoo ae ia tutu malolosi, faamalosiau le tasi i le isi,



ma fesili atu mo se fesoasoani ao oulua tatalo faatasi i po uma. Ou te molimau atu i taimi o lo'u olaga na ou le fiafia ai, mafatia, po o le faanoanoa, ina ua ou se ese, e oo lava i sina iota itiiti, mai aoaoga a le Alii. O la'u tatalo, ia outou maua le fiafia moni ma maua le olioli i se faaipo-ipoga faaselesitila ma se vaega itiiti o le lagi i le lalolagi. ■

*Mai se lauga sa faia i se faigalotu i le Iunivesite o Polika Iaga i le aso 9 o Novema, 1976. Mo le anousi atoa i le Igilisi, asiati i le speeches.byu.edu.*

*Ou te talosaga atu  
ia aua nei outou  
faalagolago atu i o  
outou taitoalua e pei  
o se tootoo ae ia tutu  
malolosi, faamalosiau  
le tasi i le isi, ma fesili  
atu mo se fesoasoani  
ao oulua tatalo faatasi  
i po uma.*



SAN  
SALVADOR  
EL SALVADOR

# Tuuina atu i le Atua

---

## SE AVANOA E FAAMANUIA AI TATOU

Saunia e Michael R. Morris

Mekasini a le Ekalesia

*E faapefea ona i ai i se itu i Atenitina e na o ni nai tamai paranesi ni faaipoipoga faalemalumalu se 17 i lalo ifo o le fa tausaga? Na saunoa mai taitai e faigofie lava le tali: usiusitai.*

**I**na ua siitia atu Gisela Silva e 21 tausaga ma lona aiga mai Mendoza, Atenitina, i le aai o le atunu u e mamao i saute o Ushuaia, sa ia mafaufau pe ua ia tuulafoai ai ma ni ona avanoa e faaipoipo ai i le malumalu. O Mendoza lava ia, e i ai se siteki e faatumulia i ni uarota o le Au Paia o aso e Gata Ai, ao Ushuaia e mamao—e tu i le motu o Tierra del Fuego—ma e na o le 600 tagata e auai i tamai paranesi e tolu.

“Sa faaipoipo o’u matua i le malumalu, ma sa ou manao i lenei faamanuiaga mo au lava ia—e faaipoipo i se tagata faamaoni o le Ekalesia, o se tasi e mafai ona ma fausia se aiga e faavavau,” o lana tala lea. “Ae ina ua ou taunu u i Ushuaia, sa le toatele ni autalavou matutua iinei na ou mafaufau ai pe o le a taunu u lena mea.”

Na tutusa lava popolega o Lucas Romano ma Gisela. I le taimi o lana misiona i Iurukuei, na siitia atu lona aiga i Ushuaia. Ina ua ia faatasi ma i latou ina ua maea lana misiona, na vave ona ia iloaina e toatele atu alii talavou nofofua matutua nai lo tamaitai talavou nofofua matutua. Ae ui i lea, na ia naunautai e usitai i taitai o le lotoifale ma tafafao faamasani i na o tagata lava o le Ekalesia.

Na faigofie atu ona mulimuli i lena fautuaga ina ua uma ona feiloai Lucas ia Gisela i le lotu ma ua ia lesitala i vasega Igilisi i se aoga lea e faiaoga ai Lucas. Na amata ona momoli e Lucas ia Gisela i le fale pe a uma le vasega, ma amata ona la tafafao faamasani. Ao tatalo le tagata lava ia e uiga i le la mafutaga ua tuputupu ae, fai mai i laua na oo mai lena faamaoniga i “lea fuaiupu ma lea fuaiupu, o lea mataupu ma lea mataupu” (2 Nifae 28:30; MFF 98:12).

ATA O LE MAUIMAU O BUENOS AIRES ATENTINA NA PUEBLA E NÉSTOR CERBETO: FAAFANIA  
O LE MOUNTAIN HIGH MAPS © 1993 DIGITAL WISDOM, INC.



O Aperila 2005, na faaipoipo faaletulafono ai ia Lucas ma Gisela, e pei ona manaomia e le tulafono a Atenitina, ona faamauina lea i le Malumalu o Buenos Aires Atenitina. Na taua le la faamauga mo tagata talavou o le Ekalesia i Ushuaia: o se faaipoipoga muamua o faaipoipoga faalemalumalu e 17 i lalo ifo o le fa tausaga.

### O Se Tala Maoae Faamanuiaina

E faapefea ona i ai i se itu e na o ni nai tamai paranesi ni mau faaipoipoga i le malumalu i lalo ifo o le fa tausaga? O le tali, e tusa ai ma taitai o le lotoifale e faigofie lava: usiusitai.

“O se tala faamanuiaina sili lenei,” o le tala lea a Marcelino Tossen, o le peresitene na i ai muamua a le itu o Ushuaia. “O loo faatutuina e nei tagata talavou se faataitaiga maoae mo tagata o le Ekalesia. O se tasi o uiga auau mama e ia i latou o le usitai lea i le Alii, perofeta, ma o latou taitai faaleitu, ma e latou te mulimuli i musumusuga a le Agaga. O lenei uiga auau mama e tuufaatasia ai tagata talavou iinei i le itu o Ushuaia.”

Ae peitai, na tautino mai e Peresitene Tossen, o taitai o le lotoifale “e tatau ona galulue i lenei taumafaiga faaleitu atoa mo sina taimi” ae le’i fua mai a latou aoaoga ma faantuaga e uiga i le taua o le faaipoipoga faalemalumalu.

Fai mai Roberto Ignacio Silva, o le peresitene o le itu a Ushuaia, o le mea na ia matauina ina ua uma ona latou siitia atu ma lona aiga i Ushuaia i le 2004 o le toatele o faifeautalai ua uma misiona e lei faaipoipo faapea foi ma tamaitai talavou matutua. Sa avea lona afafine o Gisela ma se tasi o lena vaega. Fai mai a ia o loo i ai se sini a le autalavou matutua ina ia faaipoipo i le malumalu ae manaomia ni faamalosiauga ma le taitaiga.

“Sa ou tauina atu ia i latou afai tatou te moomoo i se soa e faavavau, e le tau manaomia ona tatou saili mo se tasi e atoatoa,” o le tala lea a Peresitene Silva. “Ae e tatau ona tatou tatalo ma fesili atu i le Alii e fesoasoani mai ia i tatou, ma e ao ona tatou tumau faamaoni i le Ekalesia.”

O se faaopoopoga i le faateleina o gaoioiga mo le autalavou nofofua matutua—e aofia ai faeasaite ma gaoioiga tuufaatasi ma le autalavou nofofua matutua mai Rio Gallegos ma isi nuu i matu—na faamamafa mai e taitai le taua o le tatalo, faamaoni, ma le agavaa. Sa latou uunaia le autalavou matutua i Ushuaia ina ia lava le faatuatua e foia ai lo latou fefefe.

### Sa Leai se Mea la I Matou


“O se tasi o popolega tele na i ai i le autalavou matutua iinei o le, pe faapefea lea ona latou faaipoipo pe afai e le tele ni mea o ia i latou,” o le tala lea a Peresitene Silva. “Sa matou fesoasoani e faamalamalama ia i latou e le tau manaomia lo tatou mauaina o mea uma ae tatou te lei faaipoipo.”

Na masani Ruta Rodríguez ia Emanuelu Siliva ina ua talosagaina i laua e fesoasoani i le faatulagaga o se gaoioiga tuufaatasi a le autalavou

*“O le faamanuiaga silisili o le faaipoipo i le malumalu o le lagona fiafia lea sa ou iloaina ua tuufaatasia i maua e avea ma se aiga e faavavau,” o le tala lea a Ruta Silva, o loo i le ata i le ogatotonu taumatau ma lona toalua o, Emanuelu, ma le la tama teine o, Banira. Luga: O Ezequiel ma Marina Frau, ma le la tama teine o, Ailin. Lalo: O Lucas ma Gisela Romano, ma le la fanau o, Benjamín ma Rebeca.*

ATA NA RUINA E MICHAEL R. MORRIS, SEI VAGANA UA FAAMALALAMA; TUA ATU © ISTOCKPHOTO





matutua a le itu i Rio Gallegos, e silia ma le 200 maila (320 km) i matu, ia Fepuari 2006. Na faamoemoe le uo lea na talosagaina i laua e galalue faatasi ina ia la faamasani ai. “Sa aoga,” o le toe manatua lea a Emanuelu, lea ua lua tausaga talu ona foi mai i le aiga mai lana galuega talai i le Misiona a Arisona Tucson.

Ina ua la faaipoipo ma Ruta i le ono masina mulimuli ane, na fesoasoani a la sauniuniga—faaleagaga ma le faaletino—e foia ai lo la popole mo le lumanai.

“Sa ou lagona le alofa o lou Tama o i le Lagi ma na finagalo o Ia ina ia fauina lou aiga,” o le tala mai lea a Emanuelu e faatatau i tali o ana tatalo. “O le taimi lava na ou faatuina ai lena sini, na Ia faaali mai ai le ala ma fesoasoani ia te au e saili se toalua.”

Na faaopoopo mai Ruta faapea o sini na la faatuina o se ulugalii, e aofia ai le galalue malosi e sefe se tupe mo le la malaga i le malumalu, na fesoasoani lea ia i laua ina ia alualu i luma. “O nisi taimi na i ai mea na ma mananao e faatau,” o lana tala lea, “ae na ma fai atu, ‘Leai, e tatau ona ta sefe ina ia mafai ona ta o i le malumalu.’”

O le tau o le la malaga e o ai ma toe foi mai i le Malumalu o Buenos Aires Atenitina i le 2006 na uma lelei ai lava le la tupe na sefe. “E lei toe i ai se ma tupe na totoe,” o le tala lea a Emanuelu, na toe ta’ua ai se faaupuga masani a ulugalii fou. I le taimi nei o loo la talie ma Ruta pe a manatua lena mea, ma faafetai i lo la faatuatua na la maua ai lea “aafiga matagofie” o le faamauina i le malumalu—o se aafiga ua atoa ai mea uma mo i la’ua.

“E mafai ona tatou maua le tele o ni lagona taufaafefe pe a tatou mafaufau i le faaipoipoga,” o le tala lea a Ruta. “Ae faapefea mea tatou te le o maua? Ae faapefea a tatou tulaga tautupe? Ae faapefea le tausiga o fanau? Peitai afai tatou te usiusitai i le upu a le Alii, o i le malumalu, ma amatalia ni o tatou aiga, e le manaomia ona tatou popole. O le a faamanuiaina i tatou e le Alii i auala tatou te lei mafaufauina.”

## E Le Mafai ona E Fuafuaina Mea Uma

Ina ua leai se galuega a Ezequiel Agustín Frau i le amataga o le 2006, na toeitiiti atoa le lua tausaga talu ona ia foi mai i le fale mai lana misiona i Kolomupia. Sa ia nofotoatasi pe a ae na lagonaina e le o i Ushuaia lona toalua i le lumanai. Na ia fuafua e alu i le malumalu e saili se taitaiga.

“Sa ou manao e fesootai atili ma le Agaga Paia, aoao i le finagalo o le Alii mo a’u, ma saili se musumusuga,” o lana tala lea. “Na fesoasoani le malumalu ia te au ina ia mauaina.”

Ina ua ia taunuū i Buenos Aires i le mavae ai o se tietiega pasi e tolu aso, 2,000 maila (3,200 km), sa ia nofo i ni ana uo ona sosoo lea ma se tagata o le aiga ao auai soo i le malumalu. I ni nai vaiaso mulimuli ane ua leai se tupe a Ezequiel ma ua mafaufau e toe foi i Ushuaia. Ae peitai, na maua e se epikopo i le lotoifale se galuega mo ia, ma o lea na ia fuafua ai loa e nofo.

Sa fetau i Ezequiel i se tamaitai talavou e igoa ia Marina Mas, i se gaoioiga a le Ekalesia i se taimi puupuu mulimuli ane. Sa faigofie ona la talatalanoa, ma sa vave ona ia lagonaina le toa pe a la faatasi. Ina ua ia toe vaai ia Marina i se faatasiga a le autalavou nofofua matutua, na ia fai maia se tala na faagaeetia ai o ia.

“E tatau ona ta ola i se tulaga o ituaiga tagata o loo ta sailia e faaipoipo i ai,” na toe manatua e Ezequiel o fai mai ia Marina i le taimi o se talanoaga e uiga i sini.

Mo lana vaega, na tatalo Marina ina ia maua se soa agavaa. E tele alii talavou sa ia masani ai ae na vave lava ona faagaeetia o ia i le tulaga faaleagaga o Ezequiel.

Sa fesoasoani se la uo ia Ezequiel e saili se mea e nofo ai e latalata i lana galuega, nai lo le tolu itula i le pasi mai le mea o loo ia nofo ai. O le taunuuga la o lona fale ma tutogi fou—i se taulaga e 13 miliona tagata—e na o le lua poloka mai le fale o Marina.

“Ou te lei fuafua e nofo e lua poloka le mamao mai lona fale,” o lana tala lea. “Ou te lei iloa le mea e nofo ai o ia.”

O le la nonofo latalata na maua ai e Ezequiel le tele o avanoa e vaai ai ia Marina, lea na tuuina atu e lona aiga se faafeiloaiga mafanafana ia te ia. O le tutupu faatasi o nei mea o se tali lea i ana tatalo.

Na tafafao faamasani le vaega ma amata ona fuafua faatasi lo la lumanai. Ina ua uma ona faaipoipo i le malumalu i le tautoulu o le 2006, sa la siitia atu i Ushuaia.

“E le mafai lava ona tatou malamalama i le fuafuaga o loo i ai a lo tatou Tama o i le Lagi, ma e le mafai ona tatou



## O LE MANATU FAAVAE PAIA O LE FAAIPOIPOGA

“O se mea matagofie lava le faaipoipoga i lalo o le fuafuaga a lo tatou Tama e Faavavau, o se fuafuaga ua faia i Lona poto paia mo le fiafia ma le saogalemu o Ana fanau ma le faaauauina pe a o le tupulaga. . . .

“E moni, e leai se tasi e faitau i tusitusiga paia o ona po ua mavae ma ona po nei, e mafai ona masalomia le moni o le manatu faavae paia o le faaipoipoga. O lagona sili ona suamalie o le soifuaga, o unaiga silisili ona agalelei ma faamalieloto o le loto o le tagata e faatinoina i se faaipoipoga e mama ma lē pisipisia mai mea leaga o le lalolagi.”

*Peresitene Gordon B. Hinckley (1910–2008),  
“O E Ua Ua Faatasia e le Atua,” *Liahona*, lulai 1991, 77, 78.*



fufuaina mea uma,” na fai mai ai Ezequiel. “Peitai e mafai ona tatou usisuitai ma tuu atu ia te la se avanoa e faamanua ai i tatou.”

### O se Mea Matagofie le I Ai o se Aiga

Na fai mai Peresitene Tossen o se tasi o faamanuiaga sili na aumai e le faaipoipoga faalemalumalu i Ushuaia faapea “o le a oo mai le aso o le a taitaiina ai e le fanau o le feagaiga le Eklesia. O le a salalau iinei le talalelei o se taunuuga, ma o le a faamanua e le Alii le Eklesia”—e pei lava o loo Ia faamanuiaina ulugalii faamaoni o e faaipoipo i le malumalu.

“Ao ou laitiiti ma ao talanoa mai o tatou taitai ia i tatou i le faaipoipoga, sa fafia tala uma,” o le tala lea a Ruta Silva. Sa ia iloaina o le “fafia seia oo i le iuga” e manaomia ai le galue, “ae na ou lagona na moni na tala. O le faamanuiaga silisili o le faaipoipo i le malumalu o le lagona fafia lea sa ou iloaina

ua tuufaatasia i maua e avea ma se aiga e faavavau.”

O ana faataitaiga na fesoasoani i lona tama e ui ifo ai i le vai o le papatisoga i le 2008 ma ave lona aiga i le malumalu, lea na faamauina ai i laua i le tausaga mulimuli ane.

“O faamanuiaga na sili ona ou fafia i ai, e faaopoopo atu i le tausia o la’u fanau i le talalelei, o le fafia lea ma le filemu i totonus o lo’u loto i le iloaina ua ou usitaia sauniga faaola o le faaipoipoga e faavavau,” o le faaopoopo mai lea a Lucas Romano. “O le faatasia ma lo’u toalua ma la’u fanau ua toe faafouina ai lena lagona o le fafia. E pei o se polo kiona o loo faataavalevale, ma faaauau pea ona faateleina. Ou te lagona atili le loto faafetai i le Alii i aso uma lava aua ua ou faaipoipo ma amatalia se aiga.”

Na faaopoopo mai Marina Frau, “O se mea matagofie le i ai o se aiga. E mafai ona faigata i nisi o taimi aua e tele lava mea e aoaoina, ae e matagofie.” ■

*“Afai tatou te moo-moo i se soa faavavau, e le manaomia ona tatou saili mo se tagata e atoatoa. Ae e mafai ona tatou tatalo ma aioi atu i le Alii ina ia fesoasoani mai ia i tatou, ma e tatau ona tatou tumau faamoni i le Eklesia,” o le tala lea na ta’u atu e Roberto Ignacio Silva, peresitene o le itu a Ushuaia, i talavou matutua, o le toatele o i latou (o loo pueina ata i luga) ua teuina lena fautuaga i le loto ma ua faaipoipo i le Malumalu o Buenos Aires Atenitina.*



**Saunia e Julie B. Beck**

Peresitene Aoao o le Aualofa



# Talafaasolopito o le Aualofa:

*I le avea ai ma afafine o le Atua o loo sailia le ola e faavavau, e mafai ona tatou agai i luma ma le mautinoa ua musuia e faataitaiga a i latou o e na muamua atu ia i tatou.*

**I**na ua valaauna i matou e avea ma au peresitene aoao fou o le Aualofa, sa tuu mai ia i matou se talaaga o le Aualofa e suesue ai. Sa matou faia ma le agaga tatalo, sailili ina ia iloa po o le a le mea o loo finagalo le Alii matou te aoaoina ona faia lea e avea ma se taunuuga o lena suesuega. Sa faaalia mai e la matou suesuega se talatuu mauoa i le malosi faaleagaga ma saofaga a tamaitai o le Au Paia o aso e Gata Ai. O se faamaumauga faagaeetia o fesoootaiga a le Alii ma Ona afafine ma Ana faamoemoega mo i latou. E ala atu ia matou suesuega ma uunaiga lea na oo mai faatasi ma lena taumafaiga, ua matou iloa ai faamoemoega o le Aualofa. Na matou aoao mai ia matou sauniuniga mo faamanuiaga o le ola e faavavau, e finagalo le Alii i Ona afafine ina ia *faateleina le faa-tuatua ma le amiotonu patino, faamalosia auaiga ma aiga, ma saili ma fesoasoani atu ia i latou e le tagolima*. Ao faitau ma le agaga tatalo e tamaitai i le aso a latou talaaga, o le a latou maua ni malamalamaga, tali, ma uunaiga faapei ona matou maua.

O lo matou faamoemoe e faapea ao tatou suesue i le talaaga ma galuega a le Aualofa o le a tatou vaai i le auala na fesoasoani ai lo tatou


## O SE VAAIGA I LE FAAALIGA A LE ALII MO ONA AFAFINE

Tama Faalelagi i tamaitai i le taimi ua mavae. Ao tatou aoao i le auala na Ia fesoasoani ai ia i latou, o le a tatou maua se molimau o le a Ia fesoasoani foi ia i tatou i le taimi nei. O le a tatou aoao ai afai na mafai, e ala atu i le Agaga Paia, ona taitai e le Atua se tamaitai i le silia ma le selau tausaga ua mavae atu, e mafai foi ona ia faia mo tamaitai i o tatou aso.

O Sister Eliza R. Snow, la tatou peresitene aoao lona lua o le Aualofa, sa avea ma taitai malosi ma faamaoni anamua. Sa ia malamalamo o le Agaga e “faamalieina ma faatumuina e le Agaga Paia mea uma e momoo i ai le loto o le tagata.” I vaitau eseese o lona olaga, sa ia fetaiai ai ma tulaga faaletonu o lona soifua ma le tuua toatasi. E ui i lea, sa faamalosia o ia, ao ia mauaina faaaliga ma galue e tusa ai ma faaaliga patino. Ia te ia, o faaaliga mo ia lava ma le mafutaga faifai pea a le Agaga sa avea ma punavai. Sa ia fai mai, “Ma pe le o so tatou avanoa ea lo tatou ola ina ia mafai ona tafe mai pea lenei mana i o tatou agaga?”<sup>1</sup>

O ia ituaiga faataitaiga faapenei i lo tatou talafaasolopito atoa o le a fesoasoani ia i tatou ina ia manatua o le agavaa e maua ai ma galue i faaaliga patino, o se tomai e tasi e sili ona taua lea e mafai ona tatou maua i lenei olaga.

# *Faateleina le Faatuatua ma le Amiontu Patino*



O le i ai o lena tulaga o le a le mafai ai ona tatou toilalo; a aunoa ma lena, o le a le mafai ona tatou manumalo.

## **O le talaaga o le Aualofa e taua mo tamaitai i le lalolagi atoa i le taimi nei.**

O loo faaalia mai e lo tatou talaaga se laina umi o tamaitai malolosi, amiontu, faamaoni, ma tuuto. Na amata ia Eva lenei talatuu, ma o tala o nei tamaitai o se meatotino a i tatou taitoatasi ma ua aumai ai ia i tatou se vaiga mamaao mo o tatou lumanai. Afai tatou te mananao e faaaauau lenei talatuu o tamaitai amiontu ma le tuuto, o le

a mafai ona o le a tatou fausia i luga o mea na latou faia. O la matou suesuega o le talafaasolopito ua matou iloa ai o loo i ai i tamaitai o le Ekalesia le malosi ma le tomái maoae, lea e sau mai lo latou faatuatua i le Alii o Iesu Keroso ma Lana talalelei toefuataiina. O lenei faatuatua ua maua ai e tamaitai le tomái e faia ai ni filifiliga sao ma manumalo ai i luitau ma faigata. Ua faatagaina ai foi i latou e valaau atu i le nau-nautaiga o lo latou faatuatua ma le malosi o a latou feagaiga ina ia avea ma faataitaiga lelei i o latou aafiaga faaletino. I atunuu uma, o loo maua ai se talatuu o le faatuatua i tamaitai o e na fesoasoani i le faavaeina o le Ekalesia ma faamalolosia aiga o le Au Paia o aso e Gata Ai.

O Silvia H. Allred, fesoasoani muamua o le au peresitene aoao o le Aualofa, na faamatala mai e uiga i lona tina o, Hilda Alvarenga, lea na valaauina e galue o se peresitene o le Aualofa i se paranesi i El Salvador ina ua ia liliu mai i lona 30 tausaga. Sa ia tau atu i le peresitene o le paranesi e le lava lona malamalamā, le lava saunia, ma e laitiit tele. Ae na tofia lava o ia e le peresitene o le paranesi. Ao ia galue ai, sa ia aoaina ni tomái faaletaitai ma atiina ae ni meaalofa fou, e pei o le aoao atu, tautala i tulaga lautele, ma faatulaga ia fonotaga, gaoioiga, ma galuega auaunaga faatino. Sa ia fesoasoani i isi i totonu o le paranesi ina ia avea ma tagata e fausia le malo.<sup>2</sup> I le taimi nei, e pei o aso ua mavae, o loo faamoemoe mai le Tama Faalelagi i

Ona afafine ina ia maua se matafaioi faaletaitai i uarota po o paranesi uma. O uso e pei o Hilda Alvarenga ua avea ma ni paionia ma ni faataitaiga mo tupulaga o le lumanai.

## **E mafai ona fesoasoani le talafaasolopito i tamaitai o aso nei, o e tele ni faafitalui i o latou olaga.**

A o malaga atu la matou au peresitene i le lalolagi atoa, sa matou i ai i fale o tamaitai. Sa matou vaaia a latou tau-iviga ma iloa ia faaletonu nutimomoia latou te feagai ai. O le toatele o tamaitai ua lagona le lofituina. O nisi o i latou ua faigata ona maua se taimi mo tatalo i aso taitasi ma



## *Faamalolosia o Aiga ma Auaiga*

O le faateleina o le faatuatua, faamalolosia o aiga, ma auauna atu i isi e taua i le taimi nei e pei ona i ai i le taimi na faatulaga ai le Aualofa.

Ua aoaoina i tatou e lo tatou talafaasolopito e faapea, o le faatuatua malosi o se uunaiga malosi ma le mautu lea i olaga o tamaitai amiontonu. O le faatuatua i le Togiola a Iesu Keriso e le na o le faamaloloina ai o i tatou, ae ua mafai ai foi e i tatou ona faia mea faigata ma ola i se tulaga atoatoa. Ua aoaoina foi i tatou e lo tatou talafaasolopito e le uma le alofa, le alofa mama o Keriso, lea na fesoasoani i tamaitai ina ia tumau ma le matagofie i nisi o tofotofoga sili ona faigata. Tatou te faateleina lo tatou faatuatua ma le amiontonu patino pe a tatou faia ni filifiliga e faaogatusa ai o tatou loto ma le finagalo o le Atua. Ao tatou faia, tatou te lagona le filemu. Pe a tatou le ola e tusa ai, tatou te lagona le tausalaina. O le Agaga lena o loo tauina mai ia i tatou e manaomia lo tatou salamo ma faaogatusa i tatou lava ma le finagalo o le Atua. O le salamo o se mataupu faavae tatou te faaaogaina i aso taitasi ina ia tumau malosi ai faaleagaga.

Ua tatou aoaoina mai i la tatou talafaasolopito e le o se mea e tupu fua ia aiga malolosi. O le ola i le fuafuaga a le Alii ma le sa'o, faamoemoe, ma le naunautaiga o se filifiliga o le mafaufau ua faatumulia i le faatuatua i le lalolagi i le taimi nei. O se auaunaga ua faatumulia i le faatuatua ma le agaalofa ina ia faamalolosia i latou o loo siomia ai i tatou ma faafailele ai aiga uma.

Ua tumu la tatou talafaasolopito i tamaitai o faataitaiga o e opoina le tiutetauave o le “fesoasoani i e matitiva” ma ia “laveai ia agaga.”<sup>4</sup> Na galue Amy Brown Lyman o se pere sitene aoao lona valu o le Aualofa i le taimi o le Taua Lona II a le Lalolagi. Sa ia fautuaina ia tamaitai ina ia faamalolosia lo latou faatuatua ma pipiimau. Sa ia faaliliuina le mea latou te taulai i ai, i le faia o o latou aiga ma se nofoaga saogalemu ma mea e faamuamua i o latou olaga.<sup>5</sup>

I le taimi e ulufale atu ai i le Aualofa, e avea tamaitai uma ma se vaega maoae o le usoga a tamaitai i le lalolagi atoa, ua tuufaatasia e avea ma soo. O le tulaga lenei pe a amata ona ia auai faatasi ma isi o e ua naunau foi e tausi a latou feagaiga ma tuu atu mea uma o ia i latou i le fausia ina o le malo o le Alii.

suesuega i tusitusiga paia ma faia ia mea o le a fesoasoani ia i latou e lagona ai le Agaga i o latou olaga. Ua tatou ola i ni vaitaimi ua faatupulaia le lu'itauina ma ua siomia e ni talitonuga ma faataitaiga e ono mafai ona faasalaveia i tatou mai a tatou sini e faavavau. Ona o i tatou o ni tamaitai e maoae ni aafiaga ia i latou o loo siomiaina i tatou, o lea e tatau ai ona tatou faia mea uma tatou te mafaia e tausia ai i tatou lava ina ia malolosi faaleagaga.

E fesoasoani lo tatou talafaasolopito o le Aualofa ina ia tatou taulai atu i mea e taua ma ia faatulaga lelei mea ia tatou te faia. Tatou te maua le avanoa i aso uma lava e faia ai ni filifiliga e faateleina ai lo tatou faatuatua ma faamalolosia ai o tatou aiga. Ua silia ma le 60 tausaga, talu ona fesili atu ia Belle S. Spafford, lo tatou peresitene aoao lona iva o le Aualofa, i tamaitai ina ia fuafua le taua o mea latou te fiafia i ai, iloilo a latou gaoioiga, ma faafaigofie o latou olaga e ala i le faia o na mea e sili ona tumau, ma o le a aveesea mai ai i latou mai gaoioiga e le aoga.<sup>3</sup> O loo taua pea lana fautuaga i le taimi nei. O se duesuega o lo tatou talafaasolopito o le a fesoasoani ina ia tatou maua ai se vaaiga tatou te manaomia e taulai atu ai i mea e taua lea o le a faamanuia ai o tatou olaga e faavavau.

# *Sailia ma Fesoasoani ia i Latou e Manaomia le Fesoasoani*

**Ua fesoasoani lo tatou talafaaso-lopito tatou te malamalama ai i lo tatou sootaga e lē mavavaeeseina mai le perisitua.**

E i ai i le Alii le galuega taua mo Ona atalii ma Ona afafine. O korama a perisitua ma le Aualofa e faia le galuega a le Alii. Na saunoa mai le Perofeta o Iosefa Samita, "O le a ou faatulagaina tamaitai e ala i le perisitua e mulimuli i le mamanu o le perisitua."<sup>6</sup>

O le taimi nei e pei o le taimi ua mavae, e galue le peresitene o le Aualofa i lalo o le taitaiga a le epikopo po o le peresitene o le paranesi, o e umia ki o le perisitua e taitaiina ai le uarota po o le paranesi.

Na saunoa mai ia Barbara W. Winder, lo tatou peresitene aoao lona 11 o le Aualofa, "Ou te manao lava, ma naunau ia tatou soofaatasi, ia tasi ma le perisitua, e auauna atu ma fausia le malo o le Atua iinei i le aso"<sup>7</sup>

E le gata i lea, e le o se tulaga laitiiti le iloaina ua mafai e tamaitai uma ona maua ia sauniga o le faaolataga ma ua mafai ona osia ia feagaiga e mafai ai e ia ona faataunuu lana misiona faaletino ma le faavavau. E mafai foi e tamaitai taitoatasai ona maua le mafutaga faifaipea a le Agaga Paia e taitaiina ai o ia, faamafanafanaina o ia, ma faamaonia ana faatinoga amiotonu. E mafai foi e ia ona maua uma meaalofa faaleagaga lea e faaleleia ai ona tomai ina ia ola ai ma le mautinoa ma le saogalemu. Ua aoaoina foi i tatou e la tatou talafaaso-lopito i le auala na faaaoga ai e tamaitai ua mavae nei faamanuiaga.

**O le iloaina o la tatou talafaaso-lopito e fesoasoani lea e saunia ai i tatou mo faamanuiaga o le ola e faavavau.**

I taimi anamua ua tatou aoao ai na fetaiai ia tamaitai o le Aualofa ma taimi faigata, ae o le taimi nei o loo tatou tau foi ma se fili naunautai o le e manao e faataumaoi lo tatou faatuatua ma aiga ma tuua na o i tatou ma le mafatia.



Ua tuuina mai e la tatou talafaasolopito o le Aualofa ni anotusi mo mea uma tatou te faia. Na tuuina mai e le Faaola e ala mai i le Perofeta o Iosefa Samita, i tamaitai o lenei tisipenisione se valaau ina ia fesoasoani e faatino Lana galuega.

Ua tatou aoao e ala i la tatou talafaasolopito po o ai i tatou ma la tatou matafaioi taua i le fuafuaga a lo tatou Tama Faalelagi. E le mafai ona faamatuu atu o tatou tiute-tauave i se isi tagata. Ona e silafia i tatou e lo tatou Tama Faalelagi ma alofa ia i tatou, o lea Na te lagolagoina ai i tatou ao tatou saili e faaogatusa o tatou loto ma Lona finagalo. "O lea, afai tou te fetaomi atu i luma, e fiafia i le afioga a Keriso, ma tumau lava e oo i le iuga, faauta, o loo faapea ona fetalai mai le Tama: Tou te maua le ola faavavau" (2 Nifae 31:20). ■

## **FAAMATALAGA**

1. Eliza R. Snow, sii mai i le *O Afafine i Lo'u Malo: O Le Talaaga ma le Galuega a le Aualofa* (2011), mataupu e 4.
2. Tagai i le *O Afafine i Lo'u Malo*, mataupu e 6.
3. Tagai i le *O Afafine i Lo'u Malo*, faatomuaga.
4. Tagai i le *O Afafine i Lo'u Malo*, mataupu e 2.
5. Tagai i le *O Afafine i Lo'u Malo*, mataupu e 5.
6. Iosefa Samita, sii mai i le *O Afafine i Lo'u Malo*, mataupu e 2.
7. Barbara W. Winder, sii mai i le *O Afafine i Lo'u Malo*, mataupu e 8.

## NA FAATAUNUUINA LANA FOLAFOLAGA

**O**le taimi o le sauniga tuufaatasi i le 2009, na faamatala ai e lo matou taitai vaega o faitaulaga sili le nau-nautaiga a la matou au peresitene o le siteki mo tagata matutua uma e ave se igoa o le aiga i le malumalu i totonu o le tausaga. Sa ia faailoa mai ni polokalama a le siteki ma uarota e fesoasoani i tagata ina ia ausia lena sini. I lana faaiuga, na ia tuuina mai ai se folafolaga mausalii e ala i le mana o lona valaauga i le polokalama o talafaasolopito faaleaiga faapea afai o le a tatou taumafai ina ia ausia le sini a le siteki, o le a tatou manuia.

Ina ua uma le sauniga sa ma tala-noa ma lo'u toalua e uiga i le folafolaga ma ioeina ai e le faatatau lea ia te au; ua uma ona ma faaaluina le 40 tausaga e sailili ai lala uma o le gafa o lo'u aiga. Sa faigata ona maua ou

tuaa, ma e le'i tele se ma saililiga mo le tele o tausaga. Sa ma talitonu e le toe i ai se mea e mafai ona faia. Ae ui i lea, sa lagona pea i lo'u mafaufau le siuleo o le folafolaga a le taitai vaega mo ni nai aso mulimuli ane. Sa ou filifili loa e faataitai i lana folafolaga. Ao ou sioa atu i le pepa o faasologa o lo'u gafa, sa ou taumafai e mafaufau po o le a se mea e mafai ona ou faia.

Ina ua mavae le tolu aso o mafau-fau ma le faaeteete, sa ou lagona le musuia e vaai i se nofoaga faapitoa mo faamatalaga e uiga i se tasi o tagata i le faaiuga o le laina o la'u pepa gafa. E itiiti ifo ma le afa aso sa ou sailili ai i luga o le Initonet, ma sa ou iloa ai sa i ai se isi tamaloa na sailia lena faaiu i le aulotu faa-Peretania. O se tasi o igoa sili ona lata mai na ia maua o le tagata lea e i le faaiuga o le laina o la'u gafa. O le faaaogaina

o ana faamatalaga, na mafai ai ona faaauauina lo'u gafa i le isi lima auga-tupulaga—e oo i tua i le 1650—ma e aofia ai igoa o faaiu o le tele o tamai-tai i lo'u gafa a o le'i faaipoipo, ma igoa o le tele o uso ma tuafafine. Sa ma ofo ma lo'u toalua ma sa ma fiafia.

Sa amata ona ou sailili i se taimi mulimuli ane i faamatalaga i luga o le Initonet e uiga i le tama o le tama a lou tama matua lea na foliga mai ua matuai leiloa lava. Ina ua uma se sailiga puupuu, sa ou mauaina o ia. Sa ou maua na siitia ese o ia mai Penisilevania, ISA ma o atu ai i Wisconsin, ISA, i se taimi mulimuli ane ae faatoa uma le maliu o lona faletua muamua. Faatasi ai ma faa-maumauga a Wisconsin, sa ou faa-opoopoina le silia ma le 400 igoa i le talafaasolopito o lo'u aiga.


Sa ou iloaina mulimuli ane e 100 ou tuaa na tau i Taua a le Lotoifale o Amerika. Sa ou maua ni tupulaga se ono e oo i le 1600.

O le vaitaimi muamua e 40 tausaga o a'u saililiga, sa ou faamaumauina pe a ma le 65 igoa i la'u pepa gafa o gafa ma e toeitiiti 3,000 igoa o loo faila i la'u komepiuta. O le 20 masina talu ona mavae le folafolaga a la'u taitai vaega o faitaulaga sili, sa ou faa-opoopoina le silia ma le 70 igoa i lau pepa o gafa ma e sili atu ma le 17,000 igoa i totonu o faila i la'u komepiuta, e aofia ai ma peresitene o le Iunaite Setete e toalua.

Na fetalai mai le Alii ia i tatou o Lana upu “o le a faataunuuina lava, pe fai atu i lo'u lava leo po o le leo o a'u auauna, ua tusa lava ia” (MFF 1:38). E moni, o le folafolaga a le Tama Faalelagi, na tuuina mai e ala atu i se taitai perisitua musuia ua faa-maonia, na faataunuuina lava. ■

Ted Bainbridge, Colorado, ISA

*Ina ua mavae le tolu  
aso o mafaufau ma  
le faaeteete, sa ou  
lagona le musuia  
e vaai i se nofoaga  
faapitoa mo faa-  
matalaga e uiga i  
se tasi o tagata i le  
faaiuga o le laina  
o la'u pepa gafa.*



# NA TALANOA MAI LE AGAGA E ALA MAI IA TE A'U

Ina ua maua lo'u valaauga e galue i le Misiona a Farani Toulouse, sa ou fiafia lava e galue i se atunuue ese ma aoao ai i se gagana fou. E ui ou te lei aoaoina muamua le gagana Farani, ae sa ou mautinoa o le a faigofie ona ou aoao e tautala i le gagana.

Sa faamanuia au e lo'u peresitene o le siteki i le meaalofa o gagana ina ua ia vaetofiaina au e avea o se faifeautalai. O lenei faamanuiaga na faaopoopo atu i lo'u naunautai o le a mafai ona vave ona ou aoaoina le gagana Farani.


Ina ua ou taunuue i le nofoaga autu e aoao ai faifeautalai i Provo, Iuta, sa ou naunau lava e amata loa, ae o lou taimi i le NAF sa faalotomaulaloina lava au. Sa lofituina au ma tauivi i aso uma. Ina ua ou tuua le NAF, sa ou lagona na i ai sina alualu i luma i le gagana Farani. Sa ou mafaufau po o afea o le a oo mai ai le meaalofa o gagana.

O lo'u nuu muamua lava i le misiona o se tamai nuu i saute o Farani. I se tasi o aoauli, na o ni nai aso talu ona ou taunuue, sa ma talai ai ma la'u soa i magaala. E le'i tele sa'u tala na fai pe a matou talanoa ma tagata—e tau le mafai ona ou malamalama ia i latou, ma e tau le mafai foi ona latou malamalama ia te a'u.

Sa ma feiloai atu i se tamaitai, ma amata ona faamatala e lau soa ia te ia le Ekalesia. Na faalogo le tamaitai mo ni nai minute ona faafuasei lea ona liliu mai ia te au ma fai mai, "O le a sau oe tala e fai mai?"

Sa ou taumafai ma le naunautai

*Na faalogo le tamaitai mo ni nai minute  
ona faafuasei lea ona liliu mai ia te au  
ma fai mai, "O le a sau oe tala e fai mai?"*



ma le popole ina ia manatua se mea sa ou aoaoina. I se leo tetetete, sa ou tuuina atu se molimau faigofie e uiga i le Tama Faalelagi ma le Tusi a Mamona. Ao ou faia lena mea, sa molimau mai le Agaga ia te au faapea e moni mea sa ou fai atu ai. Ou te le iloa pe na lagona e le tamaitai se mea, ae na ataata o ia, toe liliu atu i la'u soa, ma fai atu ia te ia e faaauau lana savali.

Na ou aoao mai i lenei aafiaga se lesona taua. Sa ou aoao e ui lava e le mafai ona ou tautala manino i le gagana Farani, ae e mafai ona tautala le Agaga e ala atu ia te au. Sa ou aoaoina atonu o le faamanuiaga na ou maua mai i lo'u peresitene o le siteki e moni lava o se faamanuiaga ina ia mafai ai ona ou tautala i le gagana a le Agaga.

Na aoao mai Peresitene Thomas S. Monson: "E i ai se gagana e tasi . . . ua silafia uma e faifeautalai—o le gagana

lea a le Agaga. E le aoaoina mai ni tusi ua tusia e tagata popoto aoaoina, pe aoaoina foi i le faitau po o le tauloto. E maua le gagana a le Agaga e soo se tasi e saili ma lona loto atoa ia malamalama i le Atua ma tausia ana polo-aiga paia. O le malamalama atoatoa i lenei gagana e mafai ai e le tagata ona soloia puniala, manumalo i toatuga, ma uunaia loto o tagata" ("O Le Agaga e Ola Ai," *Liahona*, Iuni 1997, 4).

E tele tausaga ua mavae, ae o loo uunaia pea a'u e lenei aafiaga. E le o manaomia ona ou toe talai atu le talalelei i le gagana Farani, ae ou te manaomia le fesoasoani a le Agaga pe a fesiligia a'u e aoao atu se lesona pe fai se lauga i le lotu. Pe a ou lagona o loo ou tauivi e faailoa atu au lava, ou te maua le mafanafana i le manatuaina o le a mafai ona talanoa atu le Agaga i loto o fanau uma a le Atua. ■

Christy Rusch Banz, Iuta, ISA

## NA TAPUNIA LE MALUMALU!

**N**a faatulaga le ma faaipoipoga i le malumalu mo le aso 7 o Iulai, 2009—o se aso sa ma tulimatai i ai ma le naunautai. O le ola ae e latalata i le Malumalu o Aba Nigeria, sa ma fiafia ai lava e ui ina matou siitia ese atu, ae o le toatele o uo ma tagata o aiga o loo nonofo pea i le eria o le a mafai ona matou faatasi a le o totonu i le malumalu po o se taumafataga mulimuli ane.

Sa ma taunuū i Aba ina ua maea se malaga e silia ma le ono itula mai Lagos ma faia a maua sauniuniga faaiu mo le ma faamauga ma le tau-mafataga. Peitai e tolu aso ao lei oo i le aso na atofaina mo le faaipoipoga, ae ta'u mai ia i maua ua tapunia faafuasei le malumalu sei toe fofogaina mai. Sa ma popole ma ua le mautonu. Sa le mafai e se tasi ona ta'u mai ia i maua po o afea e ono toe tatala ai le malumalu, lea ua tapunia ona o vevesiga i le eria. I le le fiafia, sa ma ta'u atu i uo ma aiga ua toe tolopo le ma faamauga, ma ua ma toe foi ma le faanoanoa i Lagos e aunoa ma le iloa po o afea e ono mafai ona toe seti ai se isi aso o le faamauga i le malumalu.

Ina ua ma taunuū atu i Lagos, sa ma tatalo faatauanau ina ia toe tatala le Malumalu o Aba Nigeria. Na tuanai atu le vайасо e aunoa ma ni tala e uiga i se aso e toe tatala ai. O lenei vайасо e tasi na foliga e pei ua tasi le tausaga ia i maua. Na ma tulimatai atu i la maua faaipoipoga i le malumalu ma le faamanatuina faatasi ma uo ma aiga i se taimi vave lava pe a talafeagai.

Ao alu pea le taimi e aunoa ma se tala e uiga i se aso e toe tatala ai, sa ma lagona loa e tatau ona ma toe

*O le ma faaipoipoga o se mea ou te faapelepele i ai ma e aofia ai ma se tala ou te le faagaloina lava.*



mafaufau i se isi fuafuaga. Ona o le Malumalu o Aba Nigeria ua na o le pau lea o le malumalu i Nigeria, sa ma iloaina loa e tatau ona ma malaga i le Malumalu o Accra Ghana pe afai ma te mananao e faamauina i maua i se taimi vave lava. Ae paga lea, sa tau-gata le malaga mo i maua. Ae ua leva foi ona ma fuafua mo se faaipoipoga i le malumalu, ma e ma te iloa e tatau ona ma agai i luma.

Na nono mai se tupe mai aiga ma uo, na faia foi o maua tusifolau faavaomalo, valaau atu i le Malumalu o Accra Ghana e seti se aso, ma totogi o maua pasese i le vaalele e felelei ai i Ghana.

Sa ma taunuū i Accra i le aso 14 o Aokuso, 2009, ma sa ma o i le malumalu i le aso na sosoo ai. Sa na o le tagata e faia le faamauga ma molimau e toluua na matou faatasi i totonu o le potu o faamauga. E leai ni uo, leai se aiga, ma e leai ma se isi

o ē sa matou faatasi, na ma iloaina. Ae peitai i se atunuū ma te le masani ai, i se eria e mamao ese mai o maua aiga, sa ma iloa o le nofoaga lea e tatau ona ma i ai, ma faia le mea e tatau ona ma faia. I lena lava taimi, sa ma lagonaina le mana o le faavavau ma malamalama atili manino ai i le alofa o le Tama Faalelagi mo i ma'ua ma mo Ana fanau uma.

O le tulaga e faanoanoa ai, na maliu lo'u toalua i le 2010 ina ua uma ona fanauina le tama muamua. Ou te matuai misia lava o ia ae ou te maua le mafanafana i le iloaina ua uma ona faamauina i ma'ua i le malumalu. Ou te faafetai ai pea e faavavau ma te lei tolopoina le ma faaipoipoga i le malumalu e ala i le faatali mo se taimi talafeagai. O le ma faaipoipoga o se mea ou te faapelepele i ai ma e aofia ai ma se tala ou te le faagaloina lava. ■

Chinedu Enwereuzo, Lagos, Nigeria

# MATA E MAFAI ONA OU MAUA SE GALUEGA?

Sa ou sioa atu i le tupe pepa o loo gaugau i lo'u lima ina ua ou iloaina e manaomia le totogi o le sefuluai o le tupe lea na ou maua i le vaiaso na tea o la'u galuega o le taumafanafana. E 90 tupe Aferika la'u sefuluai e lei totogiina, ae 100 le tupe Aferika lea sa ia te au.

Faatoa amata lava lo'u tausaga faaiu i le aoga faafomai ma e tele mea tau-tupe o le aoga. Sa ou nofo ai iina ma fefulisai le tupe pepa R100, ma mafau-fau e uiga i le totogiina o le sefuluai. Ua maea la'u galuega o le taumafanafana, ma e le mautinoa le maua o sa'u galuega e fetaui ma lo'u taimi pisi faatulagaina. Ae ui o lea, na aoaoina au e ou matua ina ia totogi atoa le sefuluai. O le tupe lenei a le Alii, ma sa ou iloaina. Faatasi ai ma lena manatu, sa ou tuuina le tupe i totonu o le teusu ma totogi la'u sefuluai.

I aso na sosoo ai, ao su'e sa'u galuega, sa ou tatalo ina ia tatala mo au ia pupuni o le lag. Sa ou manaomia se galuega e fetaui ma le faagasologa o lou taimi, lelei le totogi mo itula laiti, ma ia faatagaina ai pea au e suesue. I se faapuupuuga, sa ou manaomia se vavega.

Sa fautua mai se uo i le lua vaiaso mulimuli ane ina ia ou apalai mo se galuega i le falemai lea na faatoa tatala ai e lo matou aoga faafomai se fogafale fou mo aoaoga. Sa ou savali agai atu i le ofisa ma tuitui le faito-toa. Sa manatua lelei au e le fafine sa i totonu, o le sa faiaoga i le matou vasega i le lua tausaga ua mavae.

"Ou te fia iloa pe o outou saili e faafaigaluega ni faiaoga fesoasoani mo la outou polokalama fou," o la'u tala lea. "Afaia o lea, ou te manao ia

faafaigaluega au."

"Ioe," o lana tala mai. "O loo matou saili mo se tagata e faiaoga fesoasoani mo le itula i aoauli i se vaega o tamaiti aoga faafomai e tausaga lua. E fetuutunai le taimi amata ma o le a manaomia ia tofu le aso ma se tagata ma'i e te suesueina, ona aoao lea o tamaiti aoga. E mafai ona e faia lena mea?" o lana fesili lea.


Na fesoasoani le Alii ina ia ou maua se galuega e fetaui tonu lava ma le mea na ou manaomia!

O le tali lea i la'u tatalo.

Ina ua mavae le masina talu ona ou galue, sa ou iloaina le tulaga na faamanuiaina ai a'u. Na faaalia i le siaki o lo'u totogi o loo totogiina au i se totogi o le masina e faatoluina le mauluga nai lo le mea na ou manatu i ai. E le gata i lea, ae sa totogiina foi ou aso malolo.

Na tatalaina e le Alii ia pupuni o le lag i ma sasaai mai ia faamanuiaiga ua sili atu nai lo le mea na ou faamoemoeina. O se taunuuga la, na faamalosia lo'u faatuatua i le mataupu faavae o le sefuluai. ■

Greg Burgoyne, Aferika i Saute



*Sa ou manaomia se galuega e fetaui ma le faagasologa o lou taimi, lelei le totogi mo itula laiti, ma ia faatagaina ai pea au e suesue. I se faapuupuuga, sa ou manaomia se vavega.*

# LOTOTOA E AUUAUNA ATU



*Na talosagaina e perofeta o nei ona po ia alii tala-vou uma agavaa ma malolosi ina ia auauna atu o se faifeautalai faamisiona ma e talia foi le auaunaga a tamaitai talavou. Ua tali mai le autalavou matutua i le lalolagi atoa i lenei valaau ina ia auauna atu, ae o le mulimuli i le perofeta e manaomia ai le faatuatua ma le lototoa. O tala o mulimuli mai, o loo faasoa mai ai e faifeautalai talavou ua maea misiona le auala na latou maua ai le malosi e manumalo ai i faafitauli lea e o mai faatasi ma le filifiliina ma le sauniuni e auauna atu i se misiona.*

## PIPIIMAU I LA'U FAAIUGA

Na ua atoa lo'u 21, na amata ona ou lagonaina ni uunaiga ina ia auauna atu i se misiona. Ou te le'i fuafua lava mo se misiona, ma o nei mafaufauga e lei faamoemoeina. Sa uunaia au e lo'u taitai perisitua ina ia ou tatalo i ai, ma sa ou faia.

Na matuai manino lava le oo mai o la'u tali: Sa ou iloa e finagalo le Atua ina ia ou auauna atu i se misiona. Sa amata ona ou lagona le fiafia e uiga i le auauna atu, ae o le alu i se misiona na sili atu foi le luitauina nai lo le mea na ou mafaufaufina.

E le'i malamalama lo'u pule pe

aisea o le a ou alu ai mo le 18 masina, ma e na te le'i manao e faataga so'u taimi malolo e sauni ai mo le malaga. Na tuu mai e ia ia te au se lu'i: "Galue pe aua le galue. O lau filifili lena." Sa taufaafefe le leai o se galuega i vaiaso mulimuli ao le'i alu la'u misiona, ae sa ou filifili lava e tuua lena galuega.

Sa faigata foi le faamaeaina o mea e manaomia mo le siakiina i le falemai. E le'i vaai muamua lava lo'u fomai i lou atunuu moni o Rusia, i se pepa e siaki ai le fomai a faifeautalai a le Ekalesia ma sa musu e saini.

O tulaga faigata faapenei na ou mafaufau ai pe o se filifili sa'o lea na ou faia. O nisi o taimi na toeitiiti ai lava a suaia lo'u mafaufau. Ae peitai o taimi na o le le mautonu, ou te

manatua ai le tali na ou maua o la'u tatalo ma mafai ai ona ou pipiimau i la'u faaiuga ina ia auauna atu. Na iu lava ina ou maua ni tali i nei luitau ma isi foi na ma fetaia'i.

Sa valaauna a'u e auauna atu i le Misiona a Rusia St. Petersburg. O nai masina muamua i le galuega e le'i faigofie. Ae ona o mea sa ou aoaoina i le taulimaina o faafitauli lea na feagai ma au i le taimi ao ou sauni i le galuega, sa mafai ai ona ou foia ia luitau o la'u misiona. O la'u misiona —ma faafitauli na feagai ma a'u i le taimi na ou sauniuni ai—na aoaoina ai a'u e mafai ona ou faia mea faigata i le fesoasoani mai o le Alii.

**Elena Ogneva Anderson,  
Iuta, ISA**



## OIA E PULE ILO'U OLA

Ina ua atoa lo'u 18, o le toatele ia o tagata o la'u uarota ma le siteki na amata ona fai mai ia te au e tatau ona ou alu i se misiona. E ui ua leva ona ou fuafua e auauna atu i se misiona, ae ou te le'i fiafia nei uunaiga uma.

E le'i leva ae amata loa lo'u tausaga muamua i le kolisi. O se taunuuga o le galue malosi, sa ou manumalo ai i se sikolasipi e faataga ai ona ou suesue i Siamani. O Siamani e matuai ese lava mai lo'u atunu moni o Mekisiko, ae ua amata ona iloa lelei le aganuu ma vave ona aoaoina le gagana.

Na iu foi ina ofo mai ia te au se galuega tumau i se kamupani tautaua i Europa. Ua faafusei nei ona lagonaina atili le pei o se tiute le auauna atu i se misiona nai lo se manao. Sa ou mafaufau e mafai ona ou faigaluega i lenei galuega ma fiafia i faamanuiaga faalelalolagi.

I se tasi o aso na toulu ai le kiona na ma o ai ma la'u uo o Melanie i le taulaga o Heidelberg. Ina ua mavae le tele o itula, sa uifi e le kiona le auala vave, ma ua amata ona ma tulimomoe. Sa ma o pe tusa o le 65 maila (105 km) i le itula ma na ma pasia se moli mumu ma so'a ai se pasi.

Ina ua ou te'i i luga, sa ou vaai i le leoleo, le taavale falemai, ma Melanie o loo tagi. Na faaleagaina le taavale, ma o sa ou i ai pea i totonu. Na oo mai loimata i ou mata ina ua ou iloaina le faamanuiaina o i maua o loo ma ola pea. Sa amata ona ou tatalo ma faafetai

i lo'u Tama Faalelagi mo le faa-saoina o i maua, ae na oo mai se popolega fou ia te a'u—ua le mafai ona gaoi o'u vae.

O lo matou agai atu i le falemai, na ou faalogo ai o fai mai le teine tausimai afai na lavea lo'u tuasivi, ailoga e mafai ona ou toe savali. Sa ou tatalo atu i lo'u Tama Faalelagi ma lo'u loto atoa. Sa ou toe faafetai muamua atu ia te Ia mo le faasaoina o a'u, ma iloa ai o lo'u ola e le o a'u e pule ai. Ona ou folafola atu lea ia te Ia, "Afa'i e LELEI o'u vae ma mafai ona ou savali, o le a ou auauna atu i se misiona ma lo'u loto atoa ma lo'u malosi atoa."

Ina ua mavae le fa itula i le falemai, sa foliga lelei le taunuuga o le vaaiga o a'u: O le a ou toe savali. Sa le toe i ai se faalotolotolu e uiga i le auauna atu i se misiona. Nai lo lena sa ou lagona se nau-nautaiga malosi e faasoat atu la'u molimau o loo soifua le Atua, ma o Ia o lo tatou Tama o i le Lagi, ma e mafai ona Ia faataunuina vavega i o tatou olaga.

Ina ua mavae lena aafiaga sa ou filifili loa ou te le taliaina le galuega na ofo mai. Sa ou iloa o le Alii e pule i lo'u taimi ma mea uma sa ia te au. Aisea ou te le tuuina atu ai ia te Ia sina vaega o lena taimi ma auauna atu mo Ia mo le lua tausaga?

Ina ua uma le faauuga, sa valauina a'u e auauna atu i Frankfurt, Siamani. O le taimi o la'u misiona sa ou molimau atu ai e uiga i lo'u Tama Faalelagi. Ou te iloa o loo soifua o Ia, o Ia o lo'u Tama, ma e Na te puipuia a'u. Ua Ia tuuina mai ia te a'u lo'u ola, ma o Ia lava e pule ai.

**Mahonry Gonzalez, Morelos,  
Mekisiko**



# SA OU SUIA LO'U MAFAUFAU

**S**a 21 ou tausaga ma o a'u e pule i se isi vaega o se fale oti ulu. Sa ou faiaoga i se vasega Peraimeri i le lotu. Sa lelei lo'u olaga, ae sa ou lagona le le onosai. Na foliga mai sa i ai se isi mea sa manaomia ou te faia—ae ou te le iloa po o le a.

Sa valaauna au e lo'u epikopo i totunu o lona ofisa i se tasi Aso Sa ma fesili mai ia te au pe na ou mafaufau e auauna atu i se misiona. Sa matuai ou le'i saunia lava. E na o le lua tausaga talu ona avea au ma se tagata o le Ekalesia ma e ou te lei mafaufau lava e auauna atu i se misiona.

Sa ou tau atu i le epikopo ou te le manatu e fetaui se misiona mo a'u. Ao ou aluese mai lona ofisa, na fai mai o ia, "Ia, afai e sui lou mafaufau, ta'u mai ia te au." Sa ou mafaufau ua tapunia le autu, ae na faaauau pea ona toe faalogoina i lo'u mafaufau ia upu a le epikopo.

Sa ou fesiligia au lava pe faapefea ona ou auauna atu i se misiona. Sa na o au lava le tagata o lou aiga e auai i le Ekalesia. Pe faapei ni lagona o lo'u aiga? O le a se mea e mafai ona ou faia i la'u vaega o le fale oti ulu? Pe mafai ona ou gafatia le auauna atu mo se tausaga ma le afa?

Ao ou mafaufau i nei fesili, sa musuia au e fatau le Tusi a Mamona. Sa ou aumaia i luga ma sue i le mataupu e valu o le Alema. Ao ou fatau e uiga ia Alema ma Amoleka ma le i ai ia la'u misiona, sa ou iloa sa ou manaomia foi ona "talai atu le afioga a le Atua" (fuiupu e 30). Sa ou tauina atu i lo'u epikopo i le Aso Sa na



## AGAVAA MO LE FESOASOANI A LE ALII

"Atonu o nisi o outou e matamumuli pe mafaufau foi ia te outou lava tou te le agavaa e talia ai le valaau e auauna atu. la manatua, o le galuega lenei a le Alii, ma pe a tatou i ai i le feau a le Alii, ua tatou agavaa foi mo le fesoasoani a le Alii. O le a faamlosia e le Alii le papatua e tuu i ai le avega."

Peresitene Thomas S. Monson, "O Loo Manomia e le Alii ia Faifeautalai," *Liahona*, Ian. 2011, 4.

sosoo ai ua suia lo'u mafaufau ma ua ou manao e auauna atu i se misiona.

Sa fesoasoani lo'u aiga, ma sa mafai ona faatau atu la'u vaega o le fale oti ulu. Sa ou faamisiona i Caracas, Venezuela, ma o loo faaauau pea ona ou seleseleina ia faamanu-iaga o le auauna atu ma le mamalu i le Alii.

Jessica Baksis, Idaho, ISA

## LILIU ATU I LE TALALELEI—MA SE MISIONA

**S**a ou ola ae i le Ekalesia ma ua leva ona i ai se fuafuaga e auauna atu i se misiona. Ae e oo atu i le taimi ou te auauna atu ai, ua ou moomoo ia i ai so'u la aafiaga mamana o le liua e pei ona ou faalogo o talanoa ai isi tagata pe a latou faamatalaina le liliu mai i le Ekalesia.

Sa ou iloa o le alu i se misiona o le a manaomia ai ni osigataulaga. Sa i ai sa'u galuega lelei ma e lelei le totogi, ma sa ou mafaufau pe mata e mafai ona maua se isi galuega lelei pe a ou foi mai. Sa ou popole i le momotuina o la'u aoga ma tuua le aiga ma uo. Ae

sa ou iloa lava i le ta'ele o lo'u loto, o le auauna atu i se misiona e sa'o lea, o lea sa faaauau ai pea la'u tapenaga.

O se vaega o lena tapenaga, sa matou o ai faatasi ma alii faifeautalai i la'u eria i a laua aoaoga na tuu taimi. O se tasi o afiafi sa matou aoaoina ai ma faifeautalai se alii e uiga i le Upu o le Poto, ae na te le'i taliaina le mataupu faavae. Ina ua matou tuua lona fale, sa ou iloaina le faanoanoa o faifeautalai, ma sa ou lagona foi le faanoanoa.

Peitai, ou te lei mautinoa pe aisea e tatau ai ona ou faanoanoa, aua ou te le iloaina moni lenei alii. Sa faaauau pea ona ou mafaufau i ai, ma sa ou iloa ai na ala ona ou mauaina nei lagona ona sa ou lagona le Agaga i le taimi o le lesona. Sa ou faanoanoa ona sa teena e lenei alii se mea na aumaia ia te au le olioli tele.

Faatasi ai ma lena manatu sa ou iloaina ai lo'u *matuā* liua moni. Sa ou iloa e moni le talalelei, ma ua tau le mafai ona ou faatali e faasoaina atu. E lei leva ae valaauna loa au ou te auauna atu i le Misiona a Roma Italia.

Na matuai faamanuiaina au mo ositaulaga na ou faia i le tapenaina mo la'u misiona. Sa ou aoaoina atu le talalelei i le tele o tagata matagofie, sa ou faia ni uo mo le olaga atoa, ma sa aoaoina le gagana Peretania. Sa faaauau pea ia faamanu-iaga ina ua ou toe foi mai i le fale. Sa faafaigaluega-inu au i le galuega lava lea e tasi sa ou galue ai ae ou te lei alu i la'u misiona ma na maua se siitaga o le tulaga.

Ae peitai, atonu o le faamanuiaga sili ona maoae, o le faateleina lea o le molimau i le talalelei. Sa avea lau misiona ma se periota o le tuputupu ae faaleagaga e le mafaatusaina, lea ou te faafetai ai pea lava. ■

Marco Brando, Italia

# O Le Polokalama o le Alualu i Luma o le Tagata Lava la a Lo Matou Aiga

**Saunia e Hillary Slaughter  
ma Elyssa J. Kirkham**

**O**nisi taimi e mafai e se tagata e toatasi ona suia mea uma o loo siomia ai o ia. Pe a fai e te amata ia te oe lava ia—afai o ia oe le lototoa e te amata ai ia te oe lava ia—ona faatulagaina lea e mea uma o loo siomia ai oe i latou lava i lo latou lava taimi,” o le tala lea a Katya Kalashnikova mai Kyiv, Iurukueini.

E ala atu i le faatuatua ma le Polokalama o le Alualu i Luma o le Tagata Lava Ia, na mafai ai e Katya Kalashnikova ma Ivanna Rubanchiuk o le Uarota a Voskresens’kyi ona maua lena lototoa, ma tuuina atu ai ia i laua le avanoa e faamalolosia ai o laua aiga ma sauni ai mo le malumalu.

## Faia o se Suiga

Na liliu mai ia aiga o Katya ma Ivanna i le Ekalesia ao faatoa uma lava ona faatulaga le Misiona i Kyiv

*Na maua e Katya Kalashnikova le malamalamā e ala i le faia o le Polokalama o le Alualu i Luma o le Tagata Lava Ia, lea na uunaia ai ona matua ina ia latou faatasi ma auai i le lotu. Itulau faafesagai: O Katya ma lana uo o Ivanna Rubanchiuk i luma o le Malumalu o Kyiv Lukureini.*

Iurukueini i le 1992. Ae na amata ona le toe toaaga mai aiga uma e lua ao lei oo i le taimi e papatiso ai teineiti uma e toalua.

Na sitia ese atu le aiga a Ivanna ina ua 13 ona tausaga i se fale e latalata i se falesa o le Au Paia o aso e Gata Ai. Ao la pasiaina ma lona tina, sa manatua e lona tina mea lelei lea na aumai e le Ekalesia i lona olaga. Na ia faamalosiauina ia Ivanna e alu i le lotu. “Sa iloa e lo’u tina e na o mea lelei lava o le a aoaoina ai au i le Ekalesia pe a faatususa lea i le lalolagi,” o le tala lea a Ivanna. Na amata ona ia toe auai i le lotu ma gaoioiga ma feiloai ma faifeatalai, ma ina ua fesili atu faifeatalai ia te ia pe fia papatiso, na ia ioeina.

## Tala a Katya

O le 15 o tausaga o Katya na toe foi mai ai mai se malaga a se vaega o le autalavou o le alalafaga. Sa tei o ia ina ua tau atu e lona tama sa ia

valaaulia ia faifeatalai e aoaoina o ia. Na ia faamanino mai e ui ina talia o ia e faalogologo, ae na te le fiafia i ai.

Sa setiina e Katya se taimi e feiloai ai ma faifeatalai. “Ao ou faalogologo, sa ou lagona o le auala sao lava lea e ui ai. Na ou manatuaina na lagona sa ou maua ao ou alu i le lotu i lou laititi. Ma i sina taimi mulimuli ane, sa ou filifili ai loa e papatiso,” o lana tala lea.


## Alualu i Luma Faaletagata Lava la

Sa fai e tamaitai talavou uma ni fetuunaiga ina ia avea ma ni tagata o le Ekalesia, ma na fesoasoani ia i laua le Polokalama o le Alualu i Luma o le Tagata Lava Ia e faia lena fesuaiga. “Sa ou tuputupu ae pea. Sa i ai ni au lava mausa. Na oo lava i le tulaga o ou ofu na manaomia e fai se suiga,” o le toe manatua lea a Katya. “Na fesoasoani ia te au le Polokalama o le Alualu i Luma o le Tagata Lava Ia e fai sina suiga i lea taimi ma lea taimi. Na tuuina mai ia te au le malosi ina ia avea ma se afafine o le Atua, e le na o le i ai lea i le lotu ae i aso uma.”

O le Polokalama o le Alualu i Luma o le Tagata Lava Ia, na mafai ai e Ivanna ma Katya ona faavaeina ni maua lea o le a faamalosia ai i laua faaleagaga, e pei o le tatalo, suesue i tusitusiga paia, ma le matamata i ata talafeagai. Sa la aoaoina foi le auala e aoao atu ai lesona ma auaua atu ai i isi. O le sili o na mea uma, na fesoasoani lea la te latalata atili ai i le Atua ma avea ma ni faataitaiga sili i o laua aiga.



*Na fesoasoani le Polokalama o le Ahualu i Luma o le Tagata Lava Ia i tamaitai talavou e toalua i Kyiv, Iukureini, e faia ni suiga lelei i o laua olaga ma i olaga o o laua aiga.*



“Na fesoasoani ia te au le Polokalama o le Alualu i Luma o le Tagata Lava Ia. O galuega uma na faamaeaina na ou maua ai le alualu i luma; na faaopoopo maia le malamalamo le lototoa,” o le tala lea a Ivanna. “Na matuai lelei lava mo au aua o le toatele o tagata o lo’u aiga e le ni tagata e malolosi i le Ekalesia.”

### Taitai e ala i le Faataitaiga

O suiga na faia e Ivanna e ala i le Polokalama o le Alualu i Luma o le Tagata Lava Ia na fesoasoani ia te ia e avea ma se faataitaiga i lona aiga. “Na vaai ou matua i ou suiga i lenei taimi atoa. Sa matuai fiafia lava i laua ma sa ou alu i le lotu,” o le tala lea a Ivanna. Sa alu na o ia i le lotu ma auai i gaoioiga ae na oo i se tasi aso ae fuafua loa lona tina la te o i le sauniga faamanatuga. Ua la o faatas nei i le lotu.

O le faataitaiga a Katya na pa’i atu ai foi i olaga o lona aiga. I se taimi puupuu lava ae faatoa auai Katya i le Ekalesia, na amata ona la o mai ma lona tina ma sosoo ai ma lona tama. Na vaaia e aiga o nei tamaitai uma e toalua se suiga na faia i olaga o Katya ma Ivanna e le Polokalama o le Alualu i Luma o le Tagata Lava Ia. Sa latou vaai i lo la fiafia ma mananao loa e avea ma se vaega o lena fiafiaga.

*Na vaaia e Ivanna  
le Polokalama o le  
Alualu i Luma o le  
Tagata Lava la i le  
fesoasoani atu ia te  
ia e seti se faatai-  
taiga lelei mo lona  
aiga. Ua o faatasi  
nei Ivanna ma lona  
tina i le lotu.*



### Ulufale Atu i Maota o le Alii

Sa faaauau pea ona tuputupu ae le fiafia o Katya ma lona aiga. Ao auai Katya i le Polokalama o le Alualu i Luma o le Tagata Lava, sa ia matauina o loo taulai atu i le taua o le malumalu. “O loo i ai se vaega atoa o loo ofoina atu mo le alu i le malumalu, ma sa ou matuai fia alu lava i le malumalu, ae e lei saunia ou matua,” na ia manatuaina.

Peitai, na mafai ona auai ia Katya i le malumalu faatasi ma lana vasega seminare. Na ia manatuaina, “Sa ou faia galuega o le malumalu mo le taimi muamua. Sa ou matuai fiafia lava, ma sa ou manao e toe alu. Sa ou manao lava i lo’u aiga e o iina ma faamauina ai mo le faavavau.”

Sa tapena le aiga o Katya ma na iu ai lava ina lagona ua latou sauni e o i le malumalu. E lua tausaga talu lana asiasiga muamua, na toe foi mai ai Katya, ao le taimi la lenei ua faatasi ma lona aiga. “Ua ou malamalamo o se nofoaga moni lava e mafai ai ona faavavau aiga,” o le tala lea a Katya. Sa faamauina i latou i le Malumalu o Freiberg Siamani.

### Faaauau Pea i le Faatuatua

E lagona e Katya ma Ivanna le agaga faafetai mo le Ekalesia, ma ua faamanuiaina uma i laua mai ana



### ATIINA AE O LE MALOSI FAALEAGAGA

“O loo i ai foi lena lava mamamu mamana i le polokalama a Tamaitai Talavou, ina ia atiina ae

le malosiaga faaleagaga i tamaitai talavou ma ofoina mai ai le avanoa ia i tatou e fesoasoani atu ai. O le Polokalama o le Alualu i Luma o le Tagata lava la, e fesoasoani i Tamaitai Talavou ia saunia mo le mauaina o sauniga o le malumalu. E fesoasoani atu ia i latou faataitaiga a tina, tinamatutua, ma tamaitai amiotonu uma e siomia i latou i le Ekalesia.”

*Peresitene Henry B. Eyring, Fesoasoani Muamua i le Au Peresitene Sili, “Fesoasoani ia i Latou i lo Latou Toe Foi Atu i le Aiga [i le Lagi],” Liahona, Me 2010, 25.*

taulaga, aemaise lava le Polokalama o le Alualu i Luma o le Tagata Lava Ia. “O la’u molimau e uiga i le Polokalama o le Alualu i Luma o le Tagata Lava Ia, o le faamalosia lea ma fesoasoani ia i tatou ina ia atoatoa i soo se vaega o o tatou olaga,” o le tala lea a Katya.

Na lagona e Ivanna na fesoasoani ia te ia le faalapotopotoga a Tamaitai Talavou e saunia e avea o se faifeatalai. E lelei lagona o Ivanna e uiga i le galuega faafafeatalai. Fai ma a ia, “Aua e te faavaivai, ae ia avea pea ma faataitaiga o le auala na suia ai e le Ekalesia o tatou olaga. O loo tatou fiafia i le i ai i totonu, ma e mananao uma lava tagata ina ia fiafia. Ma afai tatou te aveina tagata ma faaali ia i latou lena fiafia, ona latou mulimuli lea i a tatou faataitaiga. E mafai lava e le aunoa ona tatou fesoasoani i na tagata—i nai laa laiti—, auauna atu ia i latou, ma i nisi taimi matagofie, o le a latou saunia.” ■

# TASI LE UPU

## MA SE LESONA O LE OLAGA ATOA

**Saunia e Heather Wrigley**

Mekasini a le Ekalesia

*O le amiosa'o o le auala lea e te  
amio ai pe a e mafaufau e leai  
se tasi o loo tilotilo atu.*

**S**a matuai vevela lava fafo e 115 tikeri F (46°C), o se tulaga masani ai mo se aso o le taumafanafana i fafo i le faatoaga i Brawley, Kaledonia, ISA. Sa ou kikiina le pa'u o le lolivai lapoa lea ua faatolu ona leaga i aso e fa. Sa ou faalagolago i la'u galuega o le taumafanafana e totogina mea tau faafiafiaga, ofu aoga, ma faai ai lava i le kolisi. E ui i le vevela, ae ou te ita tele pe a ou vave manava, peitai e foliga mai o le a faapea foi ona tatau ona ou vave manava.

Na savali mai Tavita, o se tagata o la matou uarota ma o se uo faaleaiga, mai le fale gaosimea e vaai i le loli. O le faailoaina atu o lou le fiafia ia te ia, sa faaososoina au e fai atu se upu sa ou faalogo i isi o faaaogaina pe a lē fiafia. Ae ou te lei lafo atu le upu, na oo mai se manatu i lou mafaufau e le tatau ona ou faia aua ou te iloa o se upu e le lelei. Peitai i se taimi vave lava, sa ou lē amana'iaina, ma mafaufau e leai lava se tasi o le a iloaina. Sa ou faia le upu, ae ou te lei maua ai se lagona lelei.

Ina ua tilotilo mai i luga, ma fai mai David o le a la faia



### AMIOSA'O MA LE FAAALO- ALO O LE TAGATA IA TE IA LAVA

"Atonu o le iloiloga mautinoa e iloa ai le faamaoni o se tagata, o lona le faia lea po o le le tau-tala foi i se mea e leaga ai lona manatu lelei ia te ia lava."

Peresitene Thomas S. Monson, "O Le Sailiga o le Ola Atili," *Liahona*, Aok. 1988, 6.

ma Tamā le loli pe a la mafaia. Ae i le taimi nei, ua ou maua isi galuega e fai mo le vaega o totoe o le aso.

Na ou oso atu i totonu o le loli a Tama i le faaiuga o le aso, ma amata le ma tietiega i le fale. E lei leva ona ma o i le auala, ae tilotilo mai Tama ia te au ma fai mai na tau atu e David ia te ia ou uiga na faaalia i le leaga o le loli, o la'u paulauvate ma mea uma lava. "Fai mai David na te lei mafaufaina e faalogo i se upu faapena o tautala i ai so'u afafine," o le tala lea a Tama. "E na te faaaloalo tele ia te oe, lau pele."

Sa faatautau lo'u ulu, ma na vave ona oo mai ou loimata. Sa ou faamaualaloina au lava i vaaiga a tagata o e sa ou popole tele i o latou manatu. Ae o le sili o ia mea uma, sa ou lagona le faanoanoa ia te au lava ia ma na ou iloa e faapena foi le Atua. Sa ou iloaina ai o le ala lea sa ou le maua ai se lagona lelei ina ua ou faia lena upu.

Sa ou faia se folafolaga ou te le toe faia lava se upu po o soo se mea lava e le fiafia i ai le Atua, e le faapea ona ou te le fia manao e maasiasi tamā ma David ia te au ae ona o se mea sa'o e fai. Sa ou aoaoina, o le amiosa'o o le auala lea e te amio ai pe a e mafaufau e leai se tasi o loo tilotilo atu. ■

# O Au ea o Se Atalii o le Atua?

**Saunia e Valarie Schenk**

*E tasi se mau i le Feagaiga  
Tuai na fesoasoani ina ia  
ou malamalama ai i lo'u  
natura paia.*

Le avea ai ma se teineitiiti e 21 tau-saga e a'oga i le kolisi, sa ou saili mo le upumoni ma fiafia e faalogo i le savali o le talalelei mai faifeautalai. Sa ou taliaina lemu ma le loto atoa le savali. Sa ou auai i le Ekalesia, ae sa na o au lava le tagata o lo'u aiga e auai.

Pe a ma le tasi le tausaga talu ona avea au ma se tagata o le Ekalesia, ae ou iloaina le tuputupu ae malosi o la'u molimau i aso taitasi, peitai sa i ai se mea na misi. Ou te lei iloa o au o se afafine o le Atua.

E moni sa ou taliaina le Atua o le Tama o tagata uma. Ae peitai, ou te lei iloa pe faapei le lelei o Lona silafia i Ana foaoaga. "Faatasai ai ma mea uma lava o loo i ai i lenei lalolagi," sa ou fesili ai ia te au lava ia, "e faapefea ona Ia silafia patino au? E faapefea ona Ia mafaufau ia te au o Sona afafine? E faapefea ona alofa o Ia ia te au e pei o Sona afafine?"

O le i ai o nei fesili i lo'u mafaufau na ou liliu atu ai i le Tama Faalelagi i le tatalo. I se taimi puupuu mulimuli ane, i le taimi o le sailiga mau, sa ou


maua ai le 1 Nofoaiga Tupu 28:9. Na fai atu le Tupu o Tavita i lona atalii, "O oe foi Solomona e, lo'u atalii, ia iloa e oe le Atua o lou tama; ma auauna ia te ia ma le loto atoa ma le loto fiafia: aua e suesue e Ieova o loto uma, ma ua silafia o mafaufau uma o manatu: afai e te saili atu ia te ia, ona e maua ai lea o ia; a e afai e te tuua o ia, ona tuulafoaiina lea o oe e ia e faavavau."

E leai lava se isi mau i tusitusiga paia na ou latalata atili ai i lo'u Tama o i le Lagi nai lo le mau lenei. Na molimau mai ia te au e le gata o au o se afafine o le Atua ae afai ou te saili ia te Ia, e mafai ona ou mauaina o Ia. Na molimau mai ia te au e uiga i lo'u natura paia. Ou te lei liua atoa, i lo'u loto, i le manatu o au o se afafine o le Atua. Sa ou faamoemoe e moni nei mea ae le mafai ona ou talitonu i le malamalama o se Tama o i le Lagi alofa. E le mafai ona ou malamalama i se Tagata Soifua e silafia ou manatu tutotonu ma moomooga. E le mafai ona ou taliaina Lona alofa, i le iloaina o o'u faaletonu ma le tele o mea sese na ou faia.

Na aoao mai ia te au e le mau le tele o mea. Muamua, o Tavita, o le na faia ni ana lava mea sese se tele, na fautua atu i lona atalii o Solomona e saili le Alii ma auauna atu ia te Ia ma

se faamoemoega atoa. E ala i lenei mea na mafai ai e Solomona ona maua le Alii. O le faitauina o nei upu na fagua ai ia te au se naunautaiga malosi e atiina ae se fegalegaleaiga patino ma lo'u Tama o i le Lagi. Na ou aoao atili e uiga i auala alofa a le Tama Faalelagi. Sa ou iloa lena mea, faapei o Tavita ma Solomona, ma e mafai ona ou mauaina o Ia. Na faatupulaia le ma fegalegaleaiga. Na aumai e lenei mau se mamanu ou te ola ai, ma sa ou iloaina e moni.

Ua ou iloaina e silafia patino au e le Tama Faalelagi. Sa faaauau pea ona ou suesue i lenei mau seia oo ina pipii lenei fuaiupu "e suesue e Ieova o loto uma" i lo'u mafaufau. O taimi uma lava ou te faitauina ai, e musumusu mai le Agaga Paia i lo'u loto e silafia e le Tama Faalelagi mea uma lava, e oo lava "i manatu uma o le mafaufau." Sa ou iloa ua le na o Ia o lo'u Foafoa a e o Ia o lo'u Tama alofa ma o au o Lona afafine faapele-pele. Na iu lava ina ou taliaina e Na te silafaina au. Na te silafia ou manatu lilo, manaoga, miti, naunautaiga, popolega, taumafaiga, ma le mea sili ona taua ia te au, o ou mafaufauga. E Na te silafia au e pei ona iloa au e o'u matua iinei i le lalolagi ae sili atu. O nei vaiga na ou maua ai se molimau o au o se afafine o le Atua. ■



### O AFAFINE FAAPELEPELE O LE TAMA FAALELAGI


"I le itulau muamua o la outou tusi o le Alualu i Luma o le Tagata Lava la o Tamaitai Talavou, tou te maua ai upu nei: 'O oe o se afafine faapelepele o le Tama Faalelagi, ua saunia e te sau i le lalolagi i lenei taimi faapitoa mo se faamoemoega paia ma le mamalu' [(tamaitusi, 2009), 1].

"Tuafafine, e moni na upu! E le oni upu fatu i se tala faafagogo! Pe le ofoofogia ea le iloa e silafia e lo tatou Tama Faalelagi faavavau oe, e faafogfa mai ia te oe, e leoleo ia te oe, ma alofa ia te oe i se alofa e le uma? O le mea moni, o le tele naua o Lona alofa mo oe ua la aumaia ai lenei olaga i le lalolagi o se meaalofa taua 'i aso a la ua leva,' fauma ane i lau lava tala moni o se malaga, tofotofoga, ma avanoa mo mea silisili, tamalii, lototoa, ma le alofa. Ae o le mea aupito ofoofogia o mea uma, ua la ofoina mai se meaalofa e le mafai e tupe ona faatau ma e le oo foi i ai le malamalama. Ua ofoina atu e le Tama Faalelagi ia te outou le meaalofa aupito silisili o meaalofa uma—o le ola e faavavau—ma le avanoa ma le faamanuiaga e le i'u o lou lava 'ola fiafia ai lea.'

"Ae o lena ituaiga o faamanuiaga e le aumaia fua e aunoa ma se tau. E le na ona aumaia ona ua e manao i ai. E oo mai i le na o lou malamalama i lou faasinomaga ma lou tagata e tatau ona avea ai oe ina ia mafai ai ona e agavaa mo lena meaalofa."

**Peresitene Dieter F. Uchtdorf, Fesoasoani**  
**Lua i le Au Peresitene Sili, "O Lou Ola Fiafia Ai Lea," *Liahona*, Me 2010, 124–25.**

# AOAO, GALUE, FAASOA ATU



**Saunia e Adam C. Olson**

Mekasini a le Ekalesia

**O** Helamana Ayala e fiafia i le ninjitsu (o se tomai faa-Iapani e tau pe fusu ai). Na faaalu e lenei ositaulaga mai le Uarota a Hacienda, le Siteki o le Aai o Mekisiko Tecamac, le tele o le taimi e faataitai ai mea na ia aoaoina. O le tele o taimi e fesili atu ai ana uo e faaali atu ia i latou ni metotia eseese.

*E tolu upu e tuu  
atu ai ia te oe le  
ki e faataunuu  
ai lou tiute i le  
Atua.*

E fiafia o ia i le musika ma e ave ni ana lesona i le ta kitara. "Ae e le tele so'u taimi e faataitai ai," o lana tala lea. "Ma o lea e le tele ai so'u alualu i luma. Ma e le mafai ona tele se mea ou te faasoaina atu."

E malamalama Helamana i le taua o le faataitai o mea na e aoaoina ona faasoa atu lea. "E le faapena e na o le iloa. E tatau ona e faia," o lana tala lea. "E mafai ona tatou aoaoina ni mea, ae afai tatou te le faataitaia, e le aoga lea ia i tatou. Ma o le faasoaina atu e taua e fesoasoani ai ia te oe ina ia mautinoa ai ua e aoaoina."

O le mea lena e na te fiafia ai i le polokalama fou o le Tiute i le Atua. "Ou te fiafia i le manatu o le 'aoao, galue, faasoa atu,'" o lana tala lea. Sa fesoasoani tele ia te au. O le tele o mea e iloa ma le faaaogaina o mea na ou aoaoina ua fesoasoani lea i la'u molimau."


Na te faaaogaina le ata o le faaolataga o se faataitaiga. O se aoaoga faave na ia faalogo i ai i le tele o taimi. "Ae o le aoaoina mo au lava ia, sa ou vaai ai i le alofa o le Tama Faalelagi mo i tatou. Na pa'i mai le Agaga Paia i lo'u loto, ma sa ou lagonaina i totonu e moni. Na ou lagona Lona alofa mo au ma o le a Ia auina mai Lona Alo."

Ao faatulagaina ma galue Helamana i ana sini o le Polokalama o le Tiute i le Atua, na te talisapaia le lagolagosua na te maua mai ona matua. "Na uunaia au e o'u matua, ma faamanatu mai ia te au pe a galo ia te au, ma e la te fesili mai ia te au pe ua faatuina a'u sini," o lana tala lea.

E faaalu e lona tama, lea e avea ma epikopo i lo latou uarota, se taimi

e fesoasoani ai ia te ia. "Na te fesoasoani mai ia te au ina ia ou malamalama i mea ou te le malamalama i ai," o le tala lea a Helamana. "E lagolagoina tele a'u e o'u matua i lena tulaga."

Fai mai Helamana o sini na talosagaina e le polokalama o le Tiute i le Atua i alii talavou ua faatuina mo lo latou lava lelei. Ua faamalosia e le polokalama o le Tiute i le Atua lona faatuatua ma fesoasoani ia te ia e tetee atu i faaosoosoga. Na fesoasoani foi e saunia o ia mo le lumana. "E fesoasoani lenei tusi ia te oe ina ia saunia e maua le Perisitua Mekisateko ma aoao atu oe i le tele o mea e te manaomia o se faifeatalai."



E pei lava foi o lona alualu i luma i le ninjitsu e ala i le faatuina o ni sini e aoao ai, ma galue i mea na ia aoaoina, ma faasoaina atu i isi, ua iloa e Helamana o le "alualu i luma i le olaga, e manaomia ai lo tatou faatuina o ni sini ma vaai atu i le lumana."

O le faaaogaina o le polokalama o le Tiute i le Atua ma le fesoasoani a ona matua, ua faia ai e Helamana se amataga lelei. ■



## MAELEGA MA LE FAA-TUATUAGA

"I ni nai vaiaso talu ai, sa ou vaai ai i se tiakono fou o amata atu i lena [ala] o le maelega. Sa faaali mai ia te au e lona tamā se ata na tusia lava e lona atalii, o loo faaalia ai laina nofoa uma i totonu o lo latou falesa, o se numera mo tiakono taitasi o le a tufaina le faamanatuga, ma le faiga o le a pasi ai le faamanatuga i tagata i totonu o le falesa. Sa ma toē ma lea tamā pe a mafaufau i se tamaiti, e lei faatonuina e faia lena mea, a ua nofo ma fai se ata ia mautinoa ai e faamanuiaina i lana auauanga faaleperisitua.

"Sa ou iloaina lona maelega, le mamanu mai le tamaitusi o le *Tiute i le Atua*. O le aoaoina lea o mea ua faamoeoeina e le Alii mai ia te oe, fai se fuafuaga e fai ai, galue ma le maelega i lau fuafuaga, ona faasoa atu lea i isi pe na faapefea e lou aafiaga ona suia oe ma faamanuiaina ai isi. . . .

"O le a atili ona outou maelega, pe a outou lagonaina le tele naua o le faatuatua ua tuuina atu e le Atua ia te outou. O loo i ai se feau mai le Au Peresitene Sili mo outou i lena tamaitusi o le *Tiute i le Atua*: 'Ua ia te oe le faatuatua ma le talitonuga tele o le Tama Faalelagi, ma ua i ai se misionataua mo oe e te faataunuina. O le a fesoasoani o la ia te oe pe a e liliu atu ia te la i le tatalo, faalogologo mo uunaiga a le Agaga, usitai i poloaiga, ma tausifeagaiga ua e osia' [*Faataunuina o Lo'u Tiute i le Atua: Mo e Umia le Perisitua Arona* (tamaitusi, 2010), 5]."

**Peresitene Henry B. Eyring, Fesoasoani Muamua i le Au Peresitene Sili, "Galue i le Maelega Atoatoa," *Liahona*, Me 2010, 60–61.**

# Polokalama o le Tiute i le Atua faatasi ma **TAMĀ**

**Saunia e Paul VanDenBerghe**

Mekasini a le Eklesia

*Pe e te manaomia se fesoasoani i le polokalama o le Tiute i le Atua? E lata i le aiga.*

na ua uma ona aoaoina e uiga i le tamaitusi fou o le *Tiute i le Atua* i se faeasaite i le tausaga ua mavae, na naunau lava Aleks Miller—peresitene o le korama a tiakono mai le Uarota a North Shore, Siteki a Vancouver British Columbia—e amata loa. Sa la faatuina ma lona tamā se faagasologa o la feiloaiga i Aso Sa taitasi e galulue faatasi ai i se vaega o le tamaitusi.

“O vaiaso uma lava, ma te nonofo ai i lalo ma lo’u tama ma matamata solo i se vaega o le tusi,” o le tala lea a Aleks. Ma te amata i se tatalo, ona ma aoaoina lea o ni mea ma faiatia ia mau. Ma te taliina ia fesili i le vaega ona tusi lea i lalo o le auala e mafai ona ma faatinoina ai mea na ma aoaoina.” O le tele o taimi e faasoai e Aleks i lona tina ia mea na la faatinoina ma lona tama. “Sa ou talanoa i lo’u tina e uiga i le faamanatuga ma le uiga o tatalo faamanatuga ma tusi i lalo nisi o manatu e uiga i le auala e mafai ai e au, o se tiakono, ona fesoasoani ina ia avea le faamanatuga ma se mea sili ona anoia ia te ia.”

E na o ni nai vaiaso o nei feiloaiga o le *Tiute i le Atua* faatasi ma Tama, ae iloaina e Aleks ua i ai se eseesege i lona olaga. “Sa ou maua ai le lagona lelei,” na fai mai ai o ia. O le saofafai



## O LOO TAUVALALAAU MAI LOU LUMANAI

“O le tautua mataalua i le Perisitua Arona o le saunia ai outou alii talavou mo le mauaina o le Perisitua Mekisateko, auana atu i misiona, ma faaipoipo i le malumalu paia.

“O le a outou manatuina pea a outou faufautua o le Perisitua Arona ma o outou uso o le korama. . . .

“Alii talavou o le Perisitua Arona, o loo tauvalalaaau mai lo outou lumanai; sauni i ai. la taialaina pea outou e le Tama Faalelagi a o faapea ona outou faia. la taialaina e la i tatou uma a o tatou tauivi e faamamaluina le perisitua lea ua tatou umia ma ia faalautele o tatou valaauga.”

**Peresitene Thomas S. Monson,  
“Fai Lou Tiute —E Sili Lena,”  
Liahona, Nov. 2005, 59.**

faatasi i lalo ma lona tama e le o se mea muamua lea e manao Aleks e fai i le aoauli o Aso Sa, “ae o le taimi lava e amata ai ona ma suesue ma faiatia, ua sili atu lo’u fiafia ma ua sili atu foi ona lelei ou lagona e uiga i le faataunuina.”

Ua faatuina e Aleks ni sini fou ma ua mauaina se malamalamā sili atu e uiga i le talalelei ao ia suesue ma aoao faatasi ma lona tama. “O se tasi o vaega i le tusi o le *Tiute i le Atua* o loo fautuina mai lo tatou suesue i ni autu se lima i le *Mo Le Malosi o le Autalavou* ona tusi lea i lalo o se sini mo mea taitasi ina ia mafai ona e faaleleia,” o le faamalamalamā mai lea a Aleks. “Sa ou filifilia le faamaoni. O se tasi la o a’u sini o le faailoa atu i ou matua pe a ou faia se mea sese nai lo le teuina ia te au lava.”

O le isi autu na filifilia e Aleks o le aoaoaga, “O la’u sini o le alu i le aoga mo se masina atoa e aunoa ma le faalogogata i le vasega ma ia faamaea uma au meaaoga ina ia leai sau meaaoga e fai i le fale. Ua manaia tele le aluga, ma o le taimi nei ua matua tele lava lou taimi avanoa.”

Ua uunaia e Aleks i le taimi nei ia tiakono uma i lana korama ina ia galulue e faataunu lo latou tiute i le Atua. Ma e na te tuuina atu lea lava fautuaga i soo se isi lava alii talavou o e o mafaufau e uiga i le tatalaina o a latou tamaitusi ma amata loa ona galulue: “Na o le faia lava, “o lana tala lea. “Afai e le mafai ona e faia na o oe, fai e pei ona ou faia ma fesili atu i lo’u tamā lua te faia faatasi. ■

Valaaauina o Lau

# KORAMA

## Saunia e Mark Tensmeyer

*Sa ou auauna atu i se aiga i la'u uarota, ma sa ou manaomia se fesoasoani e faataunu ai mea uma.*

**S**a ou mauaina se valaaau mai le telefon i le aoauli o se tasi Aso Toonai mai se tama o se aiga ou te faiaoga asiasi ai. "Sa ou mafaufau pe mafai ona e vaiai le ma fanau ae sei ma o ma Cindy e asi lona tinamatua," o le fesili mai lea a Brother Stevens (ua suia igoa). "E le o malosi o ia, ma e ma te manatu atonu o le ma avanoa mulimuli lea e vaai ai ia te ia."

Sa ou faamautinoa atu ia Brother Stevens ou te fiafia e fesoasoani atu. "Matuai lelei!" na ia fai mai ai. "Ma afai e te mafai, e matuai lelei lava pe a mafai ona e faasa'osa'oina mea i totonu o le fale, leaga o nei e faamanatu ai le ma faaipoipoga.":

Ina ua ou taunu atu, na tuu e Brother ma Sister Stevens ni saimini e faavevela i le microwave mo au ma se lisi o feau e fai i totonu o le fale. Ona la malaga lea. Sa ou maua se uunaiga malosi e tatau ona ou faia se mea sili atu nai lo le vaai o le la fanau. O se aso faigata lea mo i laua, ma sa ou manao ina ia taumafai e faaleleia. Sa filifili e fai uma feau lea sa i le lisi ma isi mea, e aofia ai le

fufuluina o ipu ma le moaina ma le veleina o le vao.

Na mautinoa lava, e le mafai ona ou faia na mea uma ma tauis le la fanau e toatolu i le na o le tolu itula, o lea sa ou mafaufau



ai e tatau ona valaaau i nisi o tagata o la'u korama o aoao. Na i ai se faafitauli se tasi: e le lelei tele se matou faauoga ma alii o la'u korama. E lelei lava la matou faifaiga, ae a tuuese la le Ekalesia, e le tele ni mea matou te tutusa ai. E eseese a matou aoga, ma e seasea ona ou vaai ia i latou i fafo atu o gaoioiga a le Ekalesia. Sa ou lagona le faaletonu e valaaau i latou i se mea faapenei.

Sa ou valaaau i le peresitene o Alii Talavou ma fesili atu pe mafai ona ia tuufaatasia nisi o alii e fesoasoani. Na ia tali mai ma le agalelei ua na o ia o se faufautua ma e tatau ona ou valaaau ia Peteru, o le fesoasoani muamua i le epikopo, lea e i ai le valaauga e fesoasoani ia te au i ou tiutetauvae faaleperisitua. O le mea tonu lava lena sa ou fefe i ai o le a ia fai mai ai.

O le popole ma le le mautonu, sa ou valaaau ia Peteru ma fesili atu pe mafai ona ia sau. "Ioe, o lana fai mai lea. "O lea matou te iinei ma Scott ma Kevin, ma o le a matou o atu uma."

Na matou moaina faatasi ma vele le vao, fufulu ia ipu, ma faasa'osa'oma mea o i le fale. Na toe foi mai ia Brother ma Sister Stevens ae faatoa mae'a lava.

Na aoaoina au e lena aafiaga o le korama a le au perisitua ua tuufaatasia e ala i le faatuatua ia Iesu Keriso *ma* i auaunaga, e ui lava i le eseeseaga o mea e fiafia i ai, o uiga faaletagata, po o talaaga. ■

O SE SINI

# E SILI ATU

*O le valaauliaina o isi i gaoioiga a le Eklesia o se auala sili lea e fesoasoani ia i tatou e faamaea ai o tatou tiute faaleperisitua o le valaaui na o “tagata uma ia o mai ia Keriso” (MFF 20:59).*

## Saunia e Nereida Santafe de Salinas

**N**a fuafua le matou siteki o San Cristóbal Venesuela, e faatu-laga se taamilosaga o le lakapi faa-Amerika mo le autalavou a le Perisitua Arona. Na sili atu ma le tasi le faamoemoega o lenei gaoioiga, e aofia ai le fausia o ni faauoga ma faamalosia le tele o vaega o le korama a perisitua.

Na saunoa mai taitai o le siteki e na o alii talavou o uarota ma paranesi taitasi e faataga e auai ma e latou te uunaia tagata fou ma e le toaaga mai ina ia latou auai faatasi ina ia atoa au mo vaitausaga taitasi. I la matou uarota, o le Uarota a Táriba, sa na o le toalua tiakono, tasi le aoao, ma ni nai ositaulaga.

## Fausiaina o se Au

Olou' atalii o, José Francisco, lea ma te valaaui na ma le alofa ia "Junior," sa avea ma se vaega o le korama a tiakono, faatasi ai ma lana uo mamae o Oscar Alejandro. Sa manino lava le le lava o tama e auai i le taamilosaga soka. O lea sa latou galulue faatasi ma faifeautalai ma taitai o uarota ina ia saili uma le autalavou e le toaaga mai. Sa latou faaluina le

taimi i vaiaso taitasi e sailia ai nei alii talavou, uunaia i latou ma mauaina lo latou faatuatuaga. Ona o taumafaiga a tamaiti e ta'i 12 tausaga, sa mafai ona lava alii talavou mo se au. O se tasi o vavega ma mafua mai i a latou tau-mafaiga o le mauaina lea e lo matou uarota o le tele o nisi talavou malolosi!

I le aluga o le vaiaso latou te pikiina a latou uo fou ma fai faataitaiga i se malaetaalo o le nuu. Sa tele naua le galuega, ma sa latou le lavava i taimi uma. E laitiiti se latou aaooga po o se fuafuaga, ae e lei taofia ai e alii talavou. Sa latou fiafia i mea na latou faia.

## Amataina o le Taamilosaga

Na iu lava ina oo mai le aso muamua o le taamilosaga. Sa taunuu la matou au lototoa o tiakono i le nofoaga autu. E lei tele nisi e tapua'ia i latou, ma e lei i ai foi se latou faiaoga e fesoasoani ia i latou po o ni ofu taalo e pei o le tele o isi au. Peitai sa latou taaalo ma le naunautai, lotogatasi, ma le alofa.

Sa latou faiaina tigaina i le taaloga muamua. Ae latou te lei solomuli ai, ma na amata ona faamalosiau le siteki atoa ia i latou, ma fai atu o alii mai le Uarota a Táriba o ni faataitaiga lelei.


O Junior sa avea ma tagata e

puipua le laina sikoa. Sa ia pui-pua ma le malosi le laina sikoa ma o polo na ia polokaina na tuua ai ni maka i ona lima. O lena po i le fale, na ia ta'u maia ia te au ua matuati gava ona lima ma e na te manao-mia ni totigilima. Sa ma aumaia i fafo le matou tupe teu ina ia ma faatauina se pea totigilima mo ia. Ae na le lava le ma tupe aua na sili atu le tau o totigilima i le faleoloa o lea la sa ma faatauina mai ni totigilima faitogalaau. Sa ia faaaogaina ma le faafetai tele.

Ou te le iloa po o fea na maua mai ai e lana au le uunaiga e faaauau ai pea. Sa mulimuli lava i latou i le faatulagaga, ae na faaauau pea ona latou taaalo.

Na oo i le taimi o le pau ma nofo. Ona o le le lava o tiakono i le siteki, o lea na mafai ai ona taaalo lenei vaega lototoa i suega siamupini, ae na latou taaalo ma se au na lava le latou sauniuniga ma o le latou fai-aoga o se tagata taalo lelei tele. Sa ia faaluina le tele o taimi e koleni ai lana au. O le latou au o le au pito i luga; sa tutusa uma o latou toniga ma na faaalia le usiusitai lea e mafua





ona o toleniga. Sa matuai lagona lava e le latou faiaoga le latou malo aua e le lelei le au a si ou tama.

E lei leva ona foi mai lo'u toalua mai sana malaga, ma o lea sa ia fuafua ai e fesoasoani i tiakono. Sa ia uunaia i latou, ma tuuina atu nisi o fesoasoaniga, ma o se mea na ofo ai na latou malo. Ma o lea sa mafai ona latou fetaui ma au a le isi siteki. Sa toe malo foi a matou alii talavou!

Ina ua uma le taaloga, sa patipati tagata uma. Sa le talitonu le au

maimoa na malo nei alii talavou i le tulaga muamua o le vaega a tiakono ma o le tulaga tolu i le siteki mo le au Perisitua Arona atoa.

#### Ausina o a Latou Sini


Na aoaoina i matou e lenei aafiaga e uiga i mataupu faavae ma upumoni faavavau lea o le a tatou faaaogaina

iinei i lenei olaga. Na avea ia alii talavou o le siteki ma ni faataitaiga o le alofa, faatoaagaina mai, onosai, naunautai, ma le galulue faatasi o se au. Sa latou faaalia le autu moni o le gaoioiga. Sa latou fausia ni sootaga o le faauoga ma isi. ■

# Avea o se Faufale Faaleaiga

Pe na e mafaufau ea i aiga uma o avea ai oe ma se itutino? O aiga uma o loo faamatalaina i nei itulau e taua ma o le a fesoasoani ia te oe e tuputupu ae ai. Mo aiga taitasi, saili mai auala e lua o loo i lalo e faailoa ai le ala e avea ai oe ma se e fausia se aiga.

*"O a'u o se faufale e galue i aso uma e fau lo'u aiga"*  
("O Lo'u Aiga e Faavavaau," 2009 Otootoga mo le Taimi o Fetufaaiga ma le Polokalama a Tamaiti i le Sauniga Faamanatuga, 10–11).



## AIGA O LE TAMA FAALELAGI

Ua ia te oe ni matua faalelagi atoatoa ma ola pea o e alolofa ia te oe ma le atoatoa ma silafia mea uma o loo tupu i lou olaga. E avea pea oe ma se tasi o lenei aiga, ma e faapea uma lava isi fanau agaga a le Tama Faalelagi. O lona uiga o tagata uma lava o i le lalolagi o sou uso po o sou tuafafine agaga.

## LOU AIGA

O tagata nei e sili ona e iloaina—tina, tama, tuagane, ma tuafafine. Na tuuina oe e le Tama Faalelagi i se aiga ina ia i ai ni tagata e alolofa ia te oe, aoaoina oe, ma fesoasoani i lou tuputupu ae.

## LOU AIGA LAUTELE

Matua matutua, tausoga, uso ma tuafafine o outou matua, o vaega uma ia o lou aiga lautele. Ua tuuina atu ai ia te oe le tele o tagata e te alofa i ai!



### LOU AIGA MO LE LUMANAI

O le tagata o le a e faaipoipo i ai i se aso ma fanau o le a e mauaina o le a avea ma se vaega o lenei aiga sili ona taua. Fuafua e faamau i le malumalu ma ola i le talalelei i lou fale ina ia mafai ona faatasia lou aiga e faavavau.

### LOU AIGA FAALELOTU

O tagata o lau uarota po o paranesi e pei o ni tagata o le aiga o e popole ma taumafai e fesoasoani le tasi i le isi. E valaau e tagata o le Ekalesia isi o "Uso" ma "Tuafafine" aua ua papatisoina i latou i totonusi o le talalelei a Iesu Keriso. O tagata uma o le Ekalesia i le lalolagi atoa o se aiga maoae e tasi! ■

# Saunia e Faia Papatisoga mo e ua Maliliu

Saunia e Elyssa J. Kirkham

**P**e atoa lou 12 tausaga, e mafai ona e maua le avanoa e alu ai i le malumalu ina ia papatiso ma faamau mo e ua maliliu ae lei maua le avanoa e talia ai le talalelei. O nisi nei o auala e te saunia ai e ulufale atu i le malumalu ma lagonaina le Agaga Paia iina.

## Auala e Saunia Ai

- Ia faatuatua ia Iesu Keriso. Ia papatiso ma faamauna o se tagata o Lana Eklesia. E tatau i alii ona umia le Perisitua Arona.
- Tausi ia poloaiga ma faia ni filifila lelei. Salamo pe a e faia se mea sese.
- Fai se faatalanoaga ma lau epikopo po o le peresitene o le paranesi. Afai o e agavaa, o le a ia tuuina ia te oe se pepa faataga o le malumalu e faatapulaa le aoga.
- Fesoasoani e fai le galuega o talafaasolopito o le aiga ina ia mafai ona e aveina igoa i le malumalu, pe afai e mafai.
- Suesue i tusitusiga paia ma meka-sini a le Eklesia (e pei o le *Liahona* o Oketopa 2010) lea o le a fesoasoani ia te oe e te malamalama ai i galuega o le malumalu.

## I le Aso

- Ofu ou ofu lotu. Ia mama ma selu faalelei le lauulu.
- Faitau i tusitusiga paia po o mekasini a le Eklesia, po o le faalogologo i musika musuia.
- Tatalo ina ia lagona le Agaga Paia pe a e i ai i le malumalu.
- Aua nei aveina ia tuni, mea faa-elettonika, po o musika pe a e alu i le malumalu lea o le a le fesoasoani ia te oe e lagona ai le migao.

## I totolu o le Malumalu

- O le a tuu atu ia te oe laei papae e sui ai. O le paepae o se faailoga

o le mama a'ia'i ma le tumama.

- E ono mafai ona e matamata i le faatanoa vai o le papatisoga ao papatiso nisi mo e ua maliliu.
- Ao e faatali, e mafai ona e tatalo ma mafaufau loloto. O le malumalu o se nofoaga faapitoa e mafai ona e latalata ai i le Tama Faalelagi.
- O le a faamauna oe mo tagata ua uma ona faatinoina o latou papatisoga.
- Mafaufau ia i latou na e papatiso ma faamau ai ma faamanuiaga o le a avanoa nei mo i latou ona o lau auauanaga i le malumalu. ■



# Fiafia i le Talalelei

*"Tatou te mitamita i le Atua; ioe, tatou te olioli, aua ua atoatoa lo tatou fiafia" (Alema 26:16).*



**I**na ua atoa lo'u 14, sa faafesagai la'u aoga ma le falesa o le Au Paia o aso e Gata Ai. Sa ou vaai i ni alii i ofutino papae o o i totonu ma o mai i fafo o lena fale tele. Sa ou mafaufau po o a ni mea o loo faia i totonu.

I se tasi aso sa matou mananao ai ma au uo matou te taaalo lakapi, ae sa leai se avanoa i le malae o

la matou aoga. Na fai mai se tasi, "Tatou taaalo i le falesa. E i ai so latou nofoaga manaia i fafo e taaalo ai." O la'u fesootaiga muamua lena ma le Ekalesia—i fafo o le falelotu.

O le lua tausaga mulimuli ane sa valaaulia ai e se tasi o uo a lo'u uso ia lo'u tuafafine la te o i le Lotu AAG, ma sa ou alu ai foi. Sa ou fiafia lava o le a mafai ona ou iloa mea o



*Mai se faatalanoaga ma Elder Carlos A. Godoy o le Fitugafulu, saunia e Jacob Fullmer*

loo fai i totonu o lena falesa.

Ina ua matou taunuui iina, sa matou vaaia nisi o tagata o loo taaalo i se taaloga faigofie. Sa foliga fiafia tele i latou, ma sa ou matauina lena mea. **"Aisea latou te fiafia ai?"** Na ou mafaufau ai.

**Sa ou iloaina ina ua fai au lesona e faifeautalai ma papatisoina.** O le fiafia e sau mai totonu. O lo'u liua na suia ai lou olaga, olaga o la'u fanau, ma augatupulaga a sau ma ua mavae atu.

Po o le a lava sau mea o fai i fafo atu o aoaoga a le Ekalesia o le a le aumaia ia te oe le fiafia. Atonu o le a e ata ai po o sina taimi laitiiti o le fiafia, ae o le fiafia moni o totonu lea o le talalelei.

E tusa lava pe ulagia oe e au uo i nisi o taimi, ae o le a latou faame-melo ia te oe mo lou tu atu mo au mataupu faavae.

E alolofa ou matua ia te oe. Po o le a lava se mea la te fai mai ai ia te oe e le faapea ua la soona faia oe; ae ona la te fia puipui ia te oe.

Ia faafetai pea e le aunoa mo ou matua, le talalelei, ma le fiafia o loo aumaia ai i lou olaga. ■

# O La Tatou Itulau

## FAATASI AI MA LE TATALO, NA VAVE ONA TE'A LE FFE MA LE TIGA

**I**se tasi o Aso Sa sa oo mai ai i totonu o lo matou fale se pusi ma'i. Sa tagi leotele ma e le masani ai, ma sa le alu lava i fafo o le fale. Sa ou fefe i le pusi, o lea sa ou filifili loa e tatalo. Ina ua uma la'u tatalo, ua mafai e Mama ona ave i fafo le pusi mai le fale.

Talu ai nei lava na fai ai se taotoga tiga o Mama. Sa ou tatalo malosi ina ia manuia lena taotoga. Ina ua sau o ia i le fale mai le falemai, sa ou vaai ia te ia o tagi, ma na fai mai o ia sa tiga tele. Sa ou fai atu ia te ia pe manao ou te faia se tatalo, ma sa ia fai mai ioe. Sa ou tootuli ifo i lalo ma aioi atu i le Tama Faalelagi ina ia aveese ona tiga. Ina ua uma le tatalo, sa ataata lo'u tina, ma sa ia opoina atu ma kisi mai ia te au.

Ou te iloa e alofa ma agalelei le Tama Faalelagi, ma afai ou te fefe pe i ai se mea e tiga, e mafai ona ou tatalo ia te la ma e le umi ae alu ese le fefe ma le tiga.

**Helamana F., 5 tausaga,  
Pasila**

*O Helamana  
ma lona uso  
o, Ezra, e 10  
tausaga*



Milagros T., 11 tausaga, Peru



Guo J., 10 tausaga, Taiwan



*O loo faatalitali ma le migao tamaiti o le Peraimeri a le Uarota a Tumán, le Siteki a Pomalca Peru, mo le taimi e amata ai le Peraimeri.*

**A**fai e te manao e auina mai sau ata tusi, ata pue, aafiaga, molimau, po o se tusi mo la Tatou Itulau, ia i-meli mai i le liahona@ldschurch.org, ma tusi ai le "Our Page" i le laina o le mataupu. Pe lafo mai foi i le:

*Liahona, Our Page  
50 E. North Temple St., Rm. 2420  
Salt Lake City, UT 84150-0024, USA*

O tusiga taitasi e auina mai e tatau ona i ai le igoa atoa o le tamaitiiti, itupa, ma lona matua (e tatau ona 3 i le 12 tausaga le matua) faatasi ai ma igoa o matua, uarota po o le paranesi, ma le siteki po o le itu, ma le faatagaga tusitusia a matua (e taliaina i-meli) e faaaogaina ai le ata o le tamaitiiti ma le tusiga na auina mai. E ono faasa'oina tusiga e auina mai mo le manino po o le uumi.

TAMAITI

MANATU LELEI

**“E te lē sē lava pe  
a mafai ona e iloa  
atu le malumalu.”**

Elder Gary E. Stevenson of the Seventy, “O Aiga [Fale],  
O Malumalu Paia,” *Liahona*, Me 2009, 101.

E mafai ona e faaaogaina le lesona ma le gaoioiga lenei e aoao atili ai e uiga i le autu o le Peraimeri i le masina lenei.

# O Le a Talai Atu Le Talalelei **I LE LALOLAGI UMA**



**Saunia e Ana Maria Coburn  
ma Cristina Franco**

*"O le a talaiina atu foi lenei tala lelei i atunuuma, ma ituaiga, ma gagana, ma nuu"* (MFF 133:37).

**N**a e iloaina ea e toalaiti lava tagata i le lalolagi e maua faamanuiaga ia e te maua ona e te auai i le Eklesia moni a Iesu Keriso? O le toatele o tagata e le iloa o i latou o ni fanau a le Tama Faalelagi ma e mafai ona latou tatalo atu ia te Ia ma e Na te taliina mai. Latou te le iloa e uiga i faamanuiaga e mafai ona latou maua ona o le talalelei. E finagalo le Tama Faalelagi ina ia tatou faasoa atu le talalelei i tagata uma.

Ona o le matuai toatele lava o tagata o e manaomia e faalogo i le talalelei, o lea ua valaauna ai faifeautalai e auauna atu i vaega eseese o le lalolagi. E aoao atu e faifeautalai ia tagata i mea latou te manaomia ona iloa ma faia ina ia toe foi atu ma nonofa faatasi ma le Tama Faalelagi ma Iesu.


Na saunoa mai Peresitene Thomas S. Monson e mafai ona e saunia e avea nei ma se faifeautalai, e tusa lava po o e laitiiti. E mafai

ona e valaaulia au uo i le lotu, gaoioiga, po o afiafi faaleaiga. O le auala sili lava e mafai ona avea ai oe ma se faifeautalai i le taimi nei o le faaali atu lea o le alofa ma avea ma faataitaiga lelei i au uo.

## Gaoioiga

Faapipii le itulau 65 i pepa mafafia ma tipi ese ia kata e 16. Faapipii ia kata e faasaga i lalo o se mea mafolafola. Ia auauai e fuli ni kata se lua i le taimi, ma taumafai e saili ia kata o upu ma se kata o ata o loo tutusa. A o outou taaalo, mafaufau i mea e mafai ona e faia e avea ai ma se faifeautalai i le taimi nei. ■


**AVE SE UO I LE  
PERAIMERI**



**FILIFILI  
LE MEA SA'O**



**"O LE A TALAI  
ATU LENEI  
TALALELEI I  
ATUNUU UMA."**



**ALII  
FAIFEAUTALAI**



**TAMAITAI  
FAIFEAUTALAI**



**PAPATISOGA**



**TUSITUSIGA  
PAIA**



**NOFOAGA  
AUTU MO  
AOAOGA A  
FAIFEAUTALAI**



# O Le Taaloga i le 'Aiga o le Afiafi

*"Ua tofifofifi foi le areto i lea fale ma lea fale, ua flatou aai a latou mea e ai ma le fiafia ma le loto faamaoni"*  
*(Galuega 2:46).*

**Saunia e Rene Riding**

E faavae i se tala moni

**N**a sasala solo le manogi o le sosi o le supoketi ao saofafai Iosefa ma lona aiga mo le toonai i le afiafi o le Aso Sa. Na fai e Tama le lotu, ma amata loa ona faasolo meaai i luga o le laulau.

“Tatou taaalo i Upusii mai Ata Tifaga!” o le fai mai lea a Iosefa.

O Movie Quotes o lana taaloga lava lea e fiafia e taalo ai i luga o le laulau ‘ai. E fiafia foi i ai lona tina, tama, ma ona tuafafine e toalua o Jill ma Julia. E sii mai e se tasi se mea mai se ata na matamata i ai le aiga. Ona taumafai lea o isi tagata e vaai po o ai e muamua ona mate maia le ata e sau ai lea fuaiupu.

“Masalo e tatau ona tatou taaalo i se isi taaloga,” na fai mai ai Tina. “Talu ai ona o le Aso Sa, atonu e tatau ona tatou taaalo i Upusii mai Tusitusiga Paia.”

“O le a lena mea?” na fesili mai ai Iosefa.

“O le a ou mafaufau i se upusii mai tusitusiga paia, ae taumafai outou uma e mate mai po o ai na fai mai ai,” o le tala lea a Tina.





“E le manaia lena mea,” o le tala lea a Iosefa. “Aemaise, ou te le iloa ni upusii mai tusitusiga paia.”

“O le a ou alu muamua la!” o le tala lea a Jill. “Ou te alu ma fai ia mea ua poloaiina e le Atua.”

Na lele i luga le lima o Julia. “O le tala lena a Nifae!”

“Ua e matea, Julia. O oe la lea o le a mafaufau i se mea se tasi,” o le tala lea a Jill.

“Faatali la sei ou vaai. . . . Ia ua lelei, mate mai le tasi lea pe tou te mafaia: ‘O Lo’u Atalii Pele Lenei. Faalogo ia te Ia!’”

O le taimi la lea na sii i luga le lima o Tama. “O le mea lena na saunoa mai ai le Tama Faalelagi ia Iosefa Samita i le Vao Paia.”

“E sa’o,” o le tala lea a Julia. “Malo, Tama!”

Na amata lemu ona nofo sa’o ia Iosefa i lona nofoa.

“Ou te fia manao e tau atu se mea matuai faigata lava,” na fai mai ai Tama. “Ae a la lea: ‘Ia tuuina mai lo’u nuu ia latou o.’”

Na oso ae i luga le lima o Iosefa. “E, o Mose na faia le tala lena. Matuai faigofie tele lena mea.”

“E sa’o lelei. Ia mafaufau la oe i se mea se tasi,” na fai mai ai Tama.

Na aluga le auvae o Iosefa i ona lima. Ona oo ae lea o se ataata i ona foliga ao ia manatuaina lana lesona o le Peraimeri mai aso ua mavae. Sa talanoa mai Sister Morris e uiga i le taimi na taumafai ai soo o Iesu e taofi tamaiti mai le oo atu ia te Ia. “Ina tuu mai ia o tama iti e o mai ia te au,” na fai mai ai Iosefa.

Toe sii foi i luga le lima o Julia. “Iesu na faia le tala lena.”

“Ua e mateina!”

Sa latou taaalo seja maea ona aai tagata uma.

I se taimi mulimuli ane i lena po, ao tuu e Tina ia Iosefa i lona moega, na ia fai mai, “Ou te matea e manaia lava lena taaloga.”

“Na e aumaia se upusii e sili ona lelei i le aso,” o le tala lea a Tina. “Faafetai. E mafai ona tatou taaalo ai i le Aso Sa a sau?”

“Ou te iloa o se manatu lelei tele,” na fai mai ai Tina. Na ia opoina mai ma kisi atu ia te ia ma aluuese mai lona potu.

Na faapupuu Iosefa i lona ie afu ma ataata. Ua faatoa amatalia se aga masani fou o le Aso Sa. ■

**I**a faamasani i lesona e aoao mai i tusitusiga paia. . . . Suesue i ai e faapei o latou saunoa mai ia te oe, aua o upumoni na.”

Peresitene Thomas S. Monson, “Ia Avea Ma Tagata Sili E Mafai Ona Avea Ai Oe,” *Liahona*, Me 2009, 68.

## AUALA E TAAALO AI I UPUSII MAI TUSITUSIGA PAIA

E tolu ni auala eseese nei e taaalo ai i Upusii Mai Tusitusiga Paia

- Taumafai e taaalo e pei ona faia e le aiga o Iosefa, ta’u mai le igoa o le tagata e ona le upusii:
- Taumafai e mate le tusi o tusitusiga paia lea e maua ai le upusii. Mo se faataitaiga, “Ou te alu ma fai ia mea ua poloaiina e le Atua” o loo maua i le 1 Nifae.
- Ta’u se tusi o tusitusiga paia ona fai atu lea i isi e ta’u mai se upusii po o se tala mai lena tusi. Mo se faataitaiga, o le tusi a Eteru o loo i ai ni tala i le aiga o sa lareto na sopoia le sami.



# Na Aoao Mai Iesu ile Auala e **Taulimaina ai Isi**



## AU SAMARIA

**E**nnonofo tagata Samaria i se eria i sisifo o le Vaitafe o lortana. E i ai sa latou talatuu e aafia tagata lutaia. E tapuai tagata Samaria ia leova, ae na latou suinaisi o poloaiga. Na mafaufau tagata lutaia e sili atu i latou nai lo tagata Samaria.

### Saunia e Diane L. Mangum

**E**le galulue faatasi tagata Iutaia ma tagata Samaria. E le fiafia tagata Iutaia i tagata na nonofo i Samaria. Sa latou mafaufau ua sili atu i latou nai lo tagata **Samaria** ma taumafai ai e aua nei o latou malaga i o latou laueelele. Afai latou te vaaia se Samaria, latou te le talanoa i ai.

Peitai na aoao atu Iesu e tatau ona latou taulimaina tagata e pei foi ona latou mananao e faia mai e isi ia i latou. Pe o le uiga o lena mea o le taulimaina ma le agalelei o tagata e tusa lava pe e te le iloaina i latou pe o latou o ni Samaria?

Na fetalai mai Iesu e tatau i tagata ona alolofa atu i o latou tuaoi. Peitai o se tuaoi ea ua na o se tasi o loo ola i ou autafa po o se tasi e pei lava o oe? Na faamatala

e Iesu se tala ina ia fesoasoani i tagata ina ia malamalamā i le auala e tatau ai ona latou taulimaina isi.

Sa i ai i le tala se tagata Iutaia na malaga i le ala mai Jerusalema e agai atu i Ieriko. O se auala faigata e a'e i mauga maualuluga. E tele ina o mai tagata faomea ma lalafi i tua o papa tetele ona taumafai lea e taofi ma gaoi mea a tagata malaga.

Na osofaia e tagata faomea le tagata malaga ma na matuai faatiga ia te ia. Sa latou aveina ona ofu ma tuua na o ia i autafa





## FAITAULAGA MA TAGATA SA LEVI

**O**Faitaulaga ma tagata Sa Levi o ni tagata lutaia o e auauna atu i le malumalu. E tatau ona latou amiontonu ma faia ni faataitaiga lelei mo isi.

o le auala e otai ai.

Sa malaga ifo se **faitaulaga** i le auala ma vaai i le tagata manua. Ae na ia alu faatopetope i le isi itu auala na faaauau lana malaga.

Na sosoo ai ma se tagata **sa Levi** na ia oo ane ma iloa atu le tagata manua. Na ia ui atu foi i le isi itu ma faaauau pea, e aunoa ma le tu e fesoasoani.

O le tagata mulimuli na oo ane o le Samaria lea. Ina ua ia vaai atu i le tagata Iutaia lea na osofaia, sa ia lagona le alofa ma tu e fesoasoani atu.

Na fufuluina e le Samaria ia manua o le tagata, faatietie i lana asini, ma ave o ia i se faletali malo, lea na mafai ona ia malolo ma 'ai ai. Sa totogi e le Samaria le tupe i le pule o le faetalimalo e tausi ai le tagata manua seia toe malosi.

Sa faaali atu e le Samaria le agalelei ma le alofa mutimutivale i le tagata na manua. Sa ia tausia o ia e pei o se tuaoi.

E finagalo Iesu ina ia tatou agalelei i isi e pei ona faia e le Samaria agalelei. ■

*Mai le Luka 10:25–37.*

## TULAFONO FAAAURO

**O**le aoaoga a lesu ia faia le isi e pei ona e manao e fai mai ia te oe ua ta'ua o le Tulafono Faauro. Pe a tatou mulimuli i lenei tulafono, ua tatou fiafia ma fesoasoani foi i isi ina ia fiafia.




# Valaauliaina o Iakopo

**Saunia e Chad E. Phares**

E faavae i se tala moni

*“O le mea lea, afaia ia te outou le manao e auauna atu i le Atua ua valaauiina outou i le galuega” (MFF 4:3).*



**3.** Sa maua e Eric ma Iakopo le fiafia i le lotu. Sa la aoao e uiga i le tatalo ma usu ni pese i le taimi o le fetufaaiga. Na fiafia Eric sa na valaauliaina ia Iakopo.



**4.** O le vaiaso na sosoo ai, na toe valaaau atu foi Eric ia Iakopo.



5.



6.



7. Na toe valaau atu Eric ia Iakopo i le vaiaso na sosoo ai.




8. Na fiafia Eric na toe o ma Iakopo i le lotu.

Na iloa e Eric e mafai ona filifili Iakopo mo  
ia lava ma afai e fia alu pe leai foi, ae ua ia  
filifili e na te valaaulaina ia Iakopo i vaiaso  
uma ina ia maua ai e ia le avanoa.



# Aluile Lotu

Eric ma lona aiga o loo o e piki Iakopo ma ave o ia i le lotu faatasi ma i latou. Fesoasoani ia Eric e sue lona auala i le fale o Iakopo ona sosoo lea ma le falesa.



# Faia o se Uo Fou

Saunia e Val Chadwick Bagley



**O**le tamaitiiti i le ata lenei o loo valaauliaina se isi tamaitiiti latou te taaaalo faatasi ma ana uo. Vaai pe mafai ona e mauaina mea nei i le ata: mea faapipii, fa'i, uati, selu, fuamoa ua

ta'e, valigao, ipuinu, teutusi, i'a, ofe fagota, apefai, manu fetolofi, pulumu valifale, saluvao, lake tenisi, pulumu fufulu nifo, anufe, ma le uati taulima.

# Tala Fou o le Ekalesia

## Valaau e Auauna Atu: O Oe

Saunia e Heather Whittle Wrigley

Mekasini a le Ekalesia

**U**a talosagaina e le Au Peresitene Sili o Le Ekalesia a Iesu Keriso o le Au Paia o Aso e Gata Ai ia iunite uma o le Ekalesia e faamanatu le 75 tausaga o le fuafuaga o le uelefea a le Ekalesia e ala i le faatulagaina o a latou lava aso o auaunaga i le 2011.

“E mafai ona faataunuina le auaunaga i soo se taimi o totoe o lenei tausaga ma o le umi atonu e fetuunai lava e faalagolago i le ituaiga o auaunaga e faatinoina,” o le fuaitau lea mai se tusi a le Au Peresitene Sili.

O le valaau e auauna atu na oo mai ina ua maea le sau-noaga a Peresitene Henry B. Eyring i le sauniga i le taeao o le Aso Toonai o le konafesi aoao ia Aperila.

“O le a faateleina e le lagona o le lotogatasi ia aafiaga lelei o le auaunaga tou te tuuina atu,” o le saunoaga lea a Peresitene Eyring, Fesoasoani Muamua i le Au Peresitene Sili. “Ma o na lagona o le a faatupulaia ai le lotogatasi i aiga, i le Ekalesia, ma nuu, ma avea ai ma talatuu tumau pe a maea le galuega faatino” (“O Avanoa e Fai Ai Mea Lelei,” *Liahona* ma le *Ensign*, Me 2011, 25).

Sa tuuina mai e le Au Peresitene Sili ni taiala mo tagata o le ekalesia e fuafuaina ni galuega auauna atu, e aofia ai le valaaulia o tagata o nuu ma faifeatalai faamisiona ina ia aofia ai ma ia fuafuaina ni galuega faatino e mafai ona auai ai aiga ma tagata taitoatasi. Sa uunaia foi le faalauiolaina faalauaitele o galuega faatino ina ia toatele ai ni tagata e silafaina ma fafia i ai.

E tele uarota, paranesi, itu, ma siteki ua uma ona tali atu i le valaau. O nisi o vaega sa galulue sa ofuina ni mitiafu samasama o Mamona Lima Fesoasoani, ae o isi na o le afe lava i luga o lima o o latou ofu, ae na matua maoae le tali atu o tagata o le au paia, e le gata i le foai atu o toto ae faapea foi i le faamamaina o fale i nuu ma alalafaga.

O Elder Walter F. González o le Au Peresitene o Fitugafulu o loo pulefaamalumalu i galuega a le Ekalesia i le Eria a Matu Amerika Sautesasae. Sa ia luiina muamua i le 2009 ia aulotu uma o lana eria ia i ai se aso e fai ai se auaunaga.

O tausaga uma lava talu mai lena taimi, ua faatulagaina ai e au paia i le itu i saute o le Iunaite Setete ni aso o auaunaga faaletausaga. Na saunoa Elder González, ua fafia o ia i le iloa o le a maua e aulotu uma o le Ekalesia atoa lena avanoa i lenei tausaga.

“Tatou te auauna atu aua o se uiga faa-Keriso lea, ma o se avanoa foi e avea teisi ai faapei o Ia, ia atiina ae se *uiga* o le auauna atu—o se mausa o le auauna atu e masani ai,” na ia saunoa ai. “A tatou auauna atu e aunoa ma le mafau-fau i tapuaiga po o aulotu po o ituaiga, o le a avea o tatou lima fesoasoani ma ni lima fesootai, e atiina ae ai fegalega-leaiga ma tagata o nuu.”

I Jacksonville, Florida, ISA, e 11 aulotu na tali atu i le valaau e auauna atu e ala i le foai atu o taumafa ma toto i le aso 16 o Aperila. Sa faaaoga nisi o falelotu o le AAG o ni nofoaga e momoli atu i ai foai o taumafa, a o isi sa faatulagaina nisi o nofoaga mo le foaiina atu o toto.

O tagata o le Ekalesia o le Uarota a Jonesboro i Georgia, ISA, o e iiloa faaaoga iliafi, sa faapotopoto faatasi i le Faatoaga i Stately Oaks, o le nofoaga laulioa lea na pueina ai le ata tifaga o le *Gone with the Wind*, i le aso 14 o Me, e la’u ese lala laau na tatipi.

O le vaiaso mulimuli o Aperila, sa auai faatasi ai le Au Paia i Kalefonia ma Hawaii, ISA ma le au volenitia i le lotoifale mo le faamanatuga faaletausaga o le Aso o Mamona Lima Fesoasoani.

I San Diego, Kalefonia, ISA, e 150 volenitia sa fesoasoani e faamama le 3,000 o maa faamanatu i le Fort Rosecrans Memorial Park, o se fanuamaliu o tagata matutua.

Sa galulue faatasi le Au Paia o Aso e Gata Ai i Palos Verdes, Kalefonia, ISA, ma se faalapotopotoga e le saili tipe e ta’u o le Clean San Pedro e salu ma faamama le alatele ma auala savali i le eria tutotonu o San Pedro, ma taalao ai le silia ma le tasi le tone (900 kg) o mea ua le toe faaaogaina ma otaota.

Na saunoa le faauluuluga o le Clean San Pedro, o Steve Kleinjan e faapea, “Matou te fafia lava e galulue faatasi ma le Ekalesia lenei. O taimi uma lava e toatele o latou tagata volentia e auai mai.”

Na tali atu tagata o le Siteki a Charlotte North Carolina (ISA) South i le valaau a le Au Peresitene Sili mo se aso o auaunaga i le 2011 e ala i le faipaaga ma se vaega i le lotoifale e faia galuega alofa e faatinoina se gaoioiga o le aoina mai o mea e fai ai ni ato faafeiloai.



**Faamatalaga a le faa-tonu:** O loo aoina mai e le Matagaluega o le Uelefea a le Ekalesia ni tala mai le au paia e auai i le faatinoina o se aso o auaunaga i le 2011 e tali atu ai i le valaau a le Au Peresitene Sili. Ina ia faasoa o outou aafiaiga, alu i le **providentliving.org**, kiliki i le **75 Years of Self-Reliance and Service**, sosoo ai ma le **Day of Service** i le itu taumatau, ona kiliki lea i le faamau **share** o loo i lalo o le "Share your Service Activity."



E silia ma le 2,000 tagapepa na i ai se lisi o aitema na sili ona manaomia sa tuuina atu i le alalafaga. O se vailaso mulimuli ane, na toeitiiti 130 volenitia na faaluina le 150 itula i le aoina mai o ato ma foai atu anomea i aiga na siitia atu mai le leai o ni fale i ni fale fou.

Sa fai e tamaiti o le Peraimeri o le uarota ni faailo "Afio Mai" mo ia aiga.

I Georgia, ISA, sa faapotopoto ai le Uarota a Griffin i le Aso Toonai, 21 o Me, e fufulu mama totolu ma fafo o se nofoaga i le lotofale o le, Fale o le Faamoemoe, mo tagata e leai ni fale.

I Clinton, Misuri, ISA, sa faatasitasi ai le Au Paia o Aso e Gata Ai e faamama le Jackson Zoo, fola ia peti o togalaau, vali, ma lipea ia masini.

Sa faamamafa atu e Elder González, o auaunaga a tagata o le ekalesia o le a faamanuiaina ai i latou i totonu o le Ekalesia ma i latou e le auai i le ekalesia.

"E tele ma anoanoai auala eseese e auauna atu ai ma fatu ai ni sootaga ma tagata o afioaga," na ia saunoa ai. "Ma a o tatou auauna atu i isi, o le a tatou vaiai ai foi le aao o le Alii i olaga o o tatou tagata." ■

**Ua faamama e tagata o le ekalesia i Kalefonia, ISA, io latou afioaga.**

# Toe Faatuina e le Ekalesia le Nofoaga na Toefuatai Mai ai le Perisitua

**U**a fofogaina e le Au Peresitene Sili ni fuafuaga e toe fauina ai se nofoaga lauiloa sa ta'ua muamua o Haremoni (lea e latalata i Susquehanna i le vaitaimi lenei), Penisilevania, ISA, lea na faaliliuina ai e le Perofeta o Iosefa Samita se vaega tele o le Tusi a Mamona, ma o le nofoaga foi na toefuatai mai ai e Ioane le Papatiso le Perisitua Arona i le 1829.

O le galuega o le a aofia ai le fauina o fale iloga o le talafaasolopito ma le tulaga o le faatoaga i Haremoni faapea foi ma maa faamanatu e faamanatu ai le toefuataiga mai o le Perisitua Arona ma le Mekisateko i le 1829. Ua faamoemoe e faataunu le suataina o le eleele i le 2012, ma o le galuega faatino ua fuafua e mae'a i le lua tausaga.

O Haremoni, Penisilevania, o le nofoaga lea sa faaliliuina ai e Iosefa Samita se vaega tele o le Tusi a Mamona i le va o le 1827 ma le 1830. O iina na maua ai e le perofeta ia uluai faaaliga e 15 o loo i le Mataupu Faavae ma Feagaiga.

I le nofoaga lava lea, e pei ona tusia i le Iosefa Samita—Talafaasolopito 2:66–75, na maua ai e Iosefa Samita ma Oliva Kaotui le Perisitua Arona mai ia Ioane le Papatiso i le 1829. Na faaee atu e Peteru,

Iakopo, ma Ioane le Perisitua Mekisateko i o laua luga i se nofoaga na lata ane i ai i se taimi e le'i mamao mulimuli ane.

Fai mai Mark Staker, o le tagata suesue sinia o le vaega o nofoaga anamua o le Matagaluega o Talafaasolopito o le Ekalesia, ua amataina nei e le matagaluega ni suesuega o elieliga o mea anamua, ia iloa ai mea na uluai fausia ai ni fale i lena eria.

Fai mai a ia, “O loo matou vaavaai e toe fau le maota na nonofo ai Iosefa ma Ema i Haremoni, faapea foi ma le nuu na fanau ai Ema Samita ma le maota o lona aiga.”

O loo ua i ai i le fanua e 90-eka (36 ha) se faatagata o le Perofeta o Iosefa Samita ma Oliva Kaotui a o la taliaina le Perisitua Arona. O loo ua mamaruina foi ni maa faamanatu fou. O loo i ai foi se fuafuaga e fausia se nofoaga autu mo tagata e asiiasi atu i lea lava nofoaga.

Ua valaaulia e taitai o le Ekalesia le au paia o ē fia tuuina atu se saofaga itiiti, e tasi lava le taimi e fai ai, i lenei galuega faatino. E mafai ona faia lenei mea i le tusia o le “Nofoaga o le Toefuataiga o le Perisitua” i le vaega o le “Isi” i le lisiti sefuluai e maua atu i epikopo ma peresitene o paranesi. ■



**O se nofoaga e 90-eka (36 ha) i Penisilevania ua toe fausiaina e faamanatu ai le toefuataiga mai o le perisitua ma le faaliliuga o le Tusi a Mamona.**

## Faatumauina o Talafaasolopito o le Ekalesia i le Lalolagi

E i ai ni matagaluega a le Ekalesia o loo galulue faatasi ma tagata tusi talafaasolopito, enisinia tusiata, tagata suesue o toega anamua, loia, tagata tomai faapitoa i galuega taulima, konekarate, ma teufuna e faasao nofoaga e taua i le talafaasolopito o le Ekalesia atoa. O nei nofoaga e tolu ni vaega ua vaevae i ai:

**Nofoaga iloga** o nofoaga na tutupu ai ni mea e sili ona taua i le talafaasolopito o le Ekalesia, e pei o le faatoaga a losefa Samita po o Katalani anamua. E tusa ma le luasefulufa nofoaga taua o loo i ai i le lunaite Setete, ma le nofoaga e tasi e i fafo atu o le lunaite Setete, o le—Falesa i Worcestershire Gadfield Elm, o le falesa muamua lava lea o Le Ekalesia a lesu Keriso o le Au Paia o Aso e Gata Ai i Egelani.

**Vaaiga iloga**, lea e tusa ma le fasefuluvalu, e aofia ai malumalu, tapeneko, ma falelotu e tulaga ese fausaga pe tulaga ese i le vaai.

Ma le mea mulimuli, talu ai ona e le o nofoaga taua uma e mafai ona toe fausiaina, **ofaailo iloga**—e silia ma le 100 o ia mea—e iloa ai isi nofoaga ua manao le Ekalesia e faasao i loto ma mafaufau o le Au Paia o Aso e Gata Ai. O faailoga e mafai foi ona avea o ni eria atofaina (e pei o le tulaga o le Malumalu o Sisifo Mamao) lea e le o lava ni faamatalaga o i ai e toe fauina sa'o ai lea nofoaga. E tele ia faailoga taua o loo i atunu i fafo.

## Ua Faateleina e le Liahona Mea e Ofo Atu i Luga o le Initoneti

O loo galalue le Ekalesia e faaleia atili le mafai ona maua i luga o le initoneti o ‘anomea ua faaliliuina i isi gagana e ese mai i le gagana Peretania, aemaise lava o le *Liahona*, o le mekasini faavaomalo a le Ekalesia.

O le sini, ia oo atu i le faaiuga o le 2011, o masina taitasi e lolomiina ai le *Liahona* i se gagana faapitoa, o le a mafai foi e tagata o le Ekalesia ona maua le lomiga atoa i luga o le initoneti i le mamanu PDF, faapea foi ma vaega taitasi o le mekasini i le mamanu e na o anotusi. E na o mekasini lava e lolomiina ia Aperila 2011 ma talaatu e aofia i lenei faiga.

O loo galalue foi le Ekalesia ia lomiaina e le aunoa ia Savali a le Au Peresitene Sili ma Faiaoga Asiasi i luga o le initoneti i gagana e 80. O nei savali e masani lava ona aofia ai i le *Liahona* pe lolomiina foi o se aitema e ese mai ai mo gagana e le i maua ai le *Liahona*.

E amata atu i le lomiga o Iuni 2011, o le a pueina ma tuu i luga o le initoneti i gagana Sipaniolo ma le Potukale ia lomiga faalogologo o mea uma e lolomiina i le *Liahona*. Ma le

isi, o lomiga muamua e fa o le 2011, o le a pueina e pei ona sa faia i taimi ua mavae. E le o toe mamao foi ae oo mai lomiga faalogologo o le *Liahona* i isi gagana.

Ua faateleina foi le aofai o mea ua faaliliuina o le konafesi aoao e maua i le initoneti. Mo le konafesi aoao o Aperila 2011, sa faaliliuina ai lauga i gagana e 92. O lomiga e faalogologo i ai o ia gagana uma ua i luga o le initoneti i le conference.lds.org E lolomi e le *Liahona* le lomiga i le 33 o na gagana. O loo maua ia mea i le itulau faasino mataupu o le *Liahona* o Me 2011 i le liahona.lds.org

O loo faagasolo foi se galuega faatino o le lolomi i luga o le initoneti o taualumaga o le konafesi aoao mai le 1990 e oo mai i le taimi lenei i gagana e 25. Mai lava i le 1990, afai sa lomia se sauniga o le konafesi aoao i mekasini a le Ekalesia i se tasi o na gagana e 25, o le a kopiina ma tuu i le initoneti i mamanu PDF ma le HTML. ■

## Ua Lolomiina le Tagavai a le Ekalesia i Gagana e 100

Faatasi ai ma le faalauiloaina lata mai nei o le tagavai a le Ekalesia i gagana Posenia, Masetonia, Montenegrin, Peresia, Silupa, ma le Iapese, ua silia ai nei ma le 100 gagana ua lomiaina ai le tagavai a le Ekalesia.

Sa amataina le galuega faatino ia Tesema 1995, ina ua faailoa mai e Peresitene Gordon B. Hinckley (1910–2008) e tatau ona faaaoga se tagavai fou a le Ekalesia. Sa mamaunuina le tagavai ina ia avea le suafa o le Faaola ma vaaiga aupito iloga i le

igoa aloaia o le Ekalesia, ma ua faaliliuina ma ta’iolomi i ni gagana eseese talu mai lena taimi.

Ona o le igoa ma le tagavai a le Ekalesia o ni faailoa taua—ma ona o ni faailoga aloaia faavaomalo ua lesitalaina pe ua puipua i le lalolagi atoa—ua fatuina ai e le Ekalesia ni taiala mo le faaaogaina tatau o le igoa ma le tagavai a le Ekalesia.


E mafai e iunite i le lotoifale ona faaaoga le igoa tusia o le Ekalesia (ae le o le faailoga o le tagavai) pe afai ua faamalieina tulaga uma nei:

- O le gaoioiga po o le faatasiga lea e faaaoga ai le igoa e lagolagoina aloaia e le iunite—mo se faataitaiga, o se polokalama o le sauniga faamanatuga.
- O le igoa o le iunite i le lotoifale o loo faaaoga e tomua i le igoa o le Ekalesia.
- O foliga o mataitusi e le faataitai pe tutusa ma le tagavai aloaia a le Ekalesia.

O le tagavai aloaia a le Ekalesia e na o mea lava ua faamaonia mai e le Matagaluega o le Faamaoopopoga i le laumua o le Ekalesia, e pei o vaega nei:

- Lomiga ma tusi ma mea e faaaoga aloaia a le Ekalesia
- Pine o igoa o faifeautalai
- Faailoga i fafo o falelotu

E le mafai ona faaaogaina le tagavai e avea o se elemene teuteu po o se uflau [screensaver] o le komepiuta. E le mafai foi ona faaaogaina i soo se mea faaletagata lava ia, mea faapisini, po o ni mea faalauiloa. ■



### O Le Uepisaite ua Ave atu ai le Faleoloa a le Ekalesia i le Au Paia i le Lalolagi Atoa

Faatasi ai ma le faaopoopoga o gagana e tolu i le store.lds.org, ua faapea ona atili faigofie ai ona maua e le faitau afe o le au paia ia 'anomea a le Ekalesia. O le uepisaite, lea ua suia ai le ldscatalog.com, sa muai faalauiloaina i le gagana Peretania, Rusia, ma le Sipaniolo, ae o lea ua maua foi i gagana Farani, Siamani, ma Italia.

O anomea o le Talalelei—o fesoasoani mo suesuega, musika, ala o faasalalauga, faatufugaga, ofusa, laei o le malumalu, ma isi punaoa—e auina atu e aunoa ma se totogi i soo se nofoaga e maua ai le saite.

Ua i ai ni fuafuaga ia maua i le lumanai le store.lds.org i gagana Saina, Iapani, Korea, ma Potukale.

### Faalauiola Faafouga mo le Polokalama Komepiuta o le Faletusi o le Talalelei

Ua faalauiola e le Ekalesia faafouga i le polokalama o le Faletusi o le Talalelei mo le Android, iPad, ma le iPhone i le mobile.lds.org.

O le polokalama o le Android sa i ai muamua sa na o ni nai lomiga autu na ofoina atu ai, ae o le faafouga ua mafai ai ona maua mekasini a le Ekalesia, tusi lesona, ma isi mea e tele.

O le faafouga i le polokalama o le iPad ma le iPhone o le a mafai ai e tagata e faaaogaina ona faafeataui faamatalaga o mau i le va o le polokalama feaveai ma le My Study Notebook i le LDS.org, e mafai ai ona vaavaai i faamatalaga, itu e sili ona taua, ma faailoga i luga o le initoneti ma luga o se masini feaveai. ■



*O Le Malumalu o Atlanta Georgia*

### Ua Faamanatu e Tagata o le Ekalesia le 50 Tausaga o le Ekalesia i Filipaina

O le faamanatuina o le 50 tausaga o le toe faapaiaina o Filipaina mo le talaiga o le talalelei, na faapotopoto ai le faitau afe o le Au Paia i le Aai o Quezon e auai i se lupeli o faaliga faaleaganuu i le aso 30 o Aperila, ma se konafesi faale-eria i le aso 1 o Me.

E sefuluiva siteki na faatasitasi i le Aso Toonai e faamanatu le talatuu matagofie faaleaganuu ma le tuputupu ae o le Ekalesia i Filipaina e ala i pese ma siva. I le Aso Sa, 8 o Me, na faapotopoto ai le au paia mo se konafesi faaleatunuu faatasi ma taitai o le lotoifale ma le Au Pulega Aoao e ala i le satelite.

### Ua Ofo Atu e le USNS Comfort le Fesoasoani i Nofoaga e 12

O Aperila, na tuuvaatatu ai le USNS *Comfort*, o se manua o se tautua atoa faafomai, mo ni nofoaga e 12 i le Atu Keripeane, Amerika Tutotonu, ma Amerika i Saute e tuuvaatatu ni tausiga faafomai ma fai ni aoaoga faamasani i tagata faigaluega faafomai.

O le a tuuina atu e volenitia mai le Ekalesia, le Neivi a le lunaite Setete, ma isi faalapotopotoga fesoasoani alofa ia auaunaga fesoasoani ma aoao atu tomai o le a fesoasoani ai i tagata e fesoasoani ia i latou lava pe a tuuva ese le manuao.

### Ua Tatale Faitotoa o le Malumalu o Atlanta ina ua maea Faafiafiaga, ma le Toefaaapaiaga

Ina ua maea faafiafiaga faaleaganuu i le faaiuga o le vaiaso ma ni sauniga se lua o le toefaaapaiaga i le Aso Sa e Peresitene Thomas S. Monson, na tatalaina loa faitotoa o le Malumalu o Atlanta Georgia i le aso 3 o Me, 2011, mo le toe amatalia aloaia o galuega i le malumalu. O i latou na auai i le toefaaapaiaga o Peresitene Monson, Elder M. Russell Ballard o le Korama a Aposetolo e Toasefululua ma Elder Walter F. González ma William R. Walker.

O le malumalu, lea na muai faapaiaina i le 1983, na tapunia i le aso 1 o luni, 2009, mo se toe faafouga tele. ■

## Ua Faalauiloa DVD o le Feagaiga Tuai i Gagana Fou

Ua maua nei DVD o Punaoa Vaaia o le Feagaiga Tuai i gagana e 11 faatasi ai ma isi gagana e 10 e le o toe mamao ae maua ai.

Ua maua i le taimi nei i gagana e Fai i Faailoga Amerika, Kenitonisia, Peretania, Farani, Siamani, Italia, Meniterini, Potukale, Samoa, Sipaniolo, ma le lukureini; o isi gagana o Tenimaka, Take, Finelani, Initonesia, Nouei, Rusia, Suetena, Takaloka, Tai, ma le Toga o le a maua i le va o le taimi lenei ma le faaiuga o le tausaga. ■

O le seti o DVD e tolou e silia ma le 300 punaoa vaiaia ma vitio e 54

e taiala ai le au paia i a latou sue-suega o le Feagaiga Tuai ma o loo maua i faletusi o le Ekalesia po o le store.lds.org.

## Ua Maua le Tusi Fusitolu i le Gagana Samoa

Ua maua nei le lomiga i le gagana Samoa o le tusi fusitolu o tusitusiga paia—o le Tusi a Mamona; o le Mataupu Faavae ma Feagaiga; o le Penina Tau Tele; ma le Taiala i Mau, o se fesoasoani i suesuega, ua fusi faatasi uma lava—i faletusi autu ma i le store.lds.org. ■

*O lenei lomiga e aofia ai tusiga ma gaoioiga e mafai ona faaaoga mo afiafi faaleaiga. O nai faataitaiga nei.*

## "Mauaina o le Filemu i Taimi

**Faigata,** itulau e 12: A o lei fai-



tauina le tusiga, atonu e te manao

e fai atu i lou aiga e lisi mai nisi o

luitau faapitoa o latou feagai. Ona

faaaoga lea o fautuaga a Elder Malm e talanoa ai i auala e maua ai le filemu i taimi o faigata.

## "O Le Sauniga o le Faamauga e Fesootai Faatasi

**ai ia Aiga e Faavavau,** itulau e 16: A o lei fai tauina le tusiga, atonu o le a e fai atu i lou aiga e talanoa pe o le a le uiga o le upu folafolaga. Mafaufau e fai tauina le Mataupu Faavae ma Feagaiga 82:10 ma talanoa i le mafuaaga e taua tele ai le osia ma le tausia o folafolaga ma le Alii. A o outou fai tauina faatasi le tusiga, mafaufau e tuu atu lau molimau i le ala ua faamanu-iaina ai lou olaga i le tausia o feagaiga.

## "Tiute i le Atua faatasi ma Tamā,"

itulau e 54: O le musuia ai e lenei tusiga, e mafai ona e amata

galue i se gaoioiga mai le Tiute i le Atua po o le Alualu i Luma o le Tagata Lava la, e tusa lava pe le o i ai sau fanau talavou (e mafai ona e maua ia tusi i le DutyToGod.lds.org ma le PersonalProgress.lds.org).

Afai e le o i ai sau fanau talavou ua auai i nei polokalama, mafaufau e faagalulue faatasi tamā ma afafine ae o tina ma atalii.

## "O Le A Talai Atu le Talalelei i le Lalolagi Uma,"

itulau e 64: E faaopoopo atu i le faia o le taaloga o mea e manatua mo tagata laiti ifo o le aiga, e mafai ona outou usuina le pese "Tofia e Auauna" (Viiga, nu. 156). Mafaufau e fai se fuafuaga faafaifeatalai faaleaiga, ia aofia ai ni sini e pei o le valaaulaina o se aiga i se gaoioiga a le Ekalesia po o le tusia o ni tusi i faifeatalai o la outou uarota o loo i ai i le galuega. ■

## FAAMATALAGA

### O Se Faamanuiaga e le Mafuatia

E le o i ai se paranesi a le Ekalesia i le nuu o loo matou nonofo ai, ma e faigata ona faagasolo se vайао а тоа о ма se fesootaiga ma isi tagata o le ekalesia. O le lagona matou te maua pe a matou faitau i se tusiga po o se lauga mai le *Liahona* e faapea, o le tagata na tuisaina o loo talanoa tonu mai lava ia te i matou. O le maua o tuleiga a le perofeta i totonus o lo matou fale o se faamanuiaga lea e le mafuatia. O le auala lenei, matou te lagonaina ai le fesootai malosi atu i le Ekalesia e ui lava ina matou nonofo mamao mai i se falelotu.

Fábio André Haab, Pasila

### O Fautuaga e Fausia ai le Malosi ma le Faatuatua

Faafetai mo le faamanuiaga maoae o le mekasini—o masina

taitasi ou te maua ai savali e faagaeetia ai lo'u loto. O fautuaga tatou te maua mai sui o le Korama a Aposetolo e Toasefululua e aumaia ia te au le malosi ma faatumulia ai lo'u agaga i le faatuatua.

Dorris Cantor, Honetura

### O Se Alaleo mo Tali

O se tasi o a'u sini o le fai tau o le *Liahona* i masina taitasi. O vaega uma lava o le mekasini e fesoasoani ia te au ia ou avea atili ai e faapei o lesu Keriso. O se tasi lea o auala e tali mai ai e le Alii a'u tatalo. ■

Gilberto Júnior de Paula Rodrigues, Pasila

*Faamolemole auina mai sou finagalo faaalia po o fautuaga i le liahona@ldschurch.org. E ono faapupuuina tala mo le uumi po o le manino.*

# O FAAMANUIAGA O LE MALUMALU LE TAIMI NEI MA LE FAAVAVAU

Saunia e Stacy Vickery

**O**u te manatua le vaai i nei ata o le malumalu mai le taimi sa ou laitiiti ai lava. E ui sa ou laitiiti tele e malamalama i faamanuiaga o le malumalu, ae na ou iloa lo'u fia alu i ai iina i se aso. I Tamaitai Talavou, ua amata ona ou malamalama i faamanuiaga lea o le a oo mai mai le malumalu. I le taimi la lena, sa lei toaaga lo'u aiga, ma sa ou tatalo i aso taitasi ina ia faamauina i matou e avea ma se aiga e faavavau.

I le tautoulu o le 1993, toe lua vaiaso ae atoa loa lo'u 18 tausaga, sa o ai lo'u aiga i le malumalu. Ou te manatua le lagona sa i ai i le Malumalu o Provo Iuta, i le avea ai o se aiga e faavavau faatasi ai ma ou matua ma nai ou tei. Ao ou tuua le malumalu i lena aso, sa ou manatu ua ou malamalama i faamanuiaga na aumaia ia te au.

E lua tausaga mulimuli ane, i le taumafanafana o le 1995, sa ma faamau ai o le a ma faaipoipo, ma o lea sa ou alu ai i le malumalu ina ia maua so'u lava faaeega paia. Oka se matagofie o le mauaina o se isi faamanuiaga o le malumalu! E tolu aso talu ona maua o'u faaeega paia, ae ou faamau atu loa i lo'u toalua mo le taimi nei ma le faavavau atoa i le Malumalu o Manti Iuta. Sa ou iloaina se isi faamanuiaga ou te lei lagonaina muamua—ua mafai ona avea i ma'ua ma lo'u toalua o se aiga e faavavau. Na ou toe manatu foi ua ou tofo i faamanuiaga uma o le malumalu.

I le ono tausaga talu ona ma faaipoipo, sa ma iloa ai ua faateleina lo ma aiga. Sa ma fiafia lava e fafailele le ma tama tama ma aoao o ia i le talalelei. Peitai na oo i le vaiaso 24 o lo'u maitaga, ua fanau le ma pepe tama ma o loo tauivi pe ola. Na o le valu vaiaso, ae toe foi atu o ia i le Tama Faalelagi. Ao ou afisiina o ia mo



*Ua tuputupu  
ae lo'u mala-  
malama e  
uiga i faama-  
nuiaga o le  
malumalu a  
o faateleina  
lo'u manao-  
miaina o ia  
faamanuiaga.*


le taimi mulimuli, sa ou iloaina ai se isi faamanuiaga matagofie o le malumalu: na fanauina le ma tama tama i totonus o le feagaiga ma o le a avea o ia ma a ma'ua tama mo le faavavau.

E sefuluvalu masina talu ona mavae atu le aveeseina atu o le ma tama, ae o ma maua se valaau mai le Tautua a le AAG mo Aiga fai mai o loo i ai se tamaitai talavou ua ia filifili e tuu lana pepe ma te tausia. I le iloaina e le mafai ona ma toe mauaina sa maua lava fanau, na le mafai ai ona tatalia lo ma fiafia.

Ina ua atoa le ono masina o le ma pepe teine, faatoa mafai ai ona ma vaetamaina o ia ma ave o ia i le malumalu ina ia faamauina ia i maua. E fa tausaga talu ona avea le ma tama teine ma se vaega o lo ma aiga, ae filifili foi se isi tamaitai talavou ia avea i ma'ua ma matua o se pepe tama agamalu. Na ma toe maua foi le faamanuiaga o le ave o se pepe e ono masina i le malumalu. O le a le galo lava ia te au lo'u lagona ina ua ou vaai i la'u fanau, o ofu papae uma, i le malumalu faatasi ai ma lo'u toalua ma a'u ina ia faamauina ia i maua mo le faavavau.

Ua ou iloa nei ou te lei malamalama atoa i faamanuiaga uma na mafai ona aumai e le malumalu ao ou i ai i Tamaitai Talavou pe ina ua faamauina au i lou toalua po o le taimi na toesea ai le ma tama tama. Ma e ui lava ua ou iloaina le tele o isi faamanuiaga ua ou maua i tausaga ua mavae, ae ua ou iloa nei o le malumalu o se nofoaga o *faamanuiaga* e faavavau, faamanuiaga o le a tatou maua i lenei olaga ma le faavavau. O nisi ua faigofie ona tatou iloaina i le aso, ao isi o le a aoaoina ai i tatou, faamalolosia ai a tatou molimau, ma fesoasoani ia i tatou i se aso ina ia ausia lo tatou aiga e faavavau.

O le malumalu o se nofoaga o le filemu ma le mafanafana, olioli ma le toe faafouina. Ua sili atu lo'u faafetai mo le malumalu nai lo se isi lava taimi ma ou te tatalo pe a ou toe foi atu iina, o le a mafai ai pea ona ou aoao ma talisapaia ia faamanuiaga o le malumalu. ■



### Faaaliga i Katelani, saunia e Al Rounds

O le Aso Sa o le Eseta, 3 Aperila, 1836, na tuumuli atu ai Iosefa Samita ma Oliva Kaotui i le puelaela o le Malumalu o Katelani ina ua faatoa maea lava ona faapaia ma tootutuli ai i le tatalo. Mulimuli ane, na faaali mai Iesu Keriso ia i laua ma fetalai mai:

“O a'u lē muamua ma lē mulimuli; o a'u o lē o loo ola, o a'u o lē na fasiotia; o a'u o lo outou fautua i le Tama.

“Faauta, ua faamagaloina a oulua agasala; ua mama oulua i o'u luma; o lea, ina faaea ia o oulua ulu ma olioli.

“Ia olioli loto o oulua uso ia olioli foi loto, o lo'u nuu uma, o e ua atina a'e lenei fale i lo'u igoa, i lo latou malosi.

“Aua faauta, ua ou talia lenei fale, o lo'u igoa foi o le a iinei; ma o le a ou faaali a'u lava i lo'u nuu i le alofa mutimutivale i lenei fale. . . .

“O le a faasalalau atu foi le tautaua o lenei fale i nuu mamao; o le amataga foi lenet o le faamanuiaga o le a liligi atu i lo'u nuu. E faapea lava. Amene” (MFF 110:4–7, 10).



"Afai tatou te ola i tulafono e patino i le faaipoipoga faaselesitila, o le a tatou maua faatasi ai ma o tatou taitoalua ma o tatou aiga, se vaega itiiti o le lagi i le lalolagi," na aoao mai ai Elder Robert D. Hales o le Korama a Aposetolo e Toasefululu. "Ma pe a tatou ola ai i na tulafono, ua tatou faatinoina ia tulafono lava ia e tasi o loo faatino i le lagi." Tagai i le "O Se Tamai Lagi i le Lalolagi," itulau e 22.